

*H Briggs.*

LA LEGENDE  
DE CHARLES, CAR-  
DINAL DE LORRAINE,  
& de ses freres, de la mai-  
son de Guise.



Descrite en deux livres, par Fran-  
çois de Vigne.



A REIMS,  
Del'Imprimerie de Pierre Martin.

M. D. LXXIX.

$$\begin{array}{r} 32 \\ 64 \\ 232 \end{array}$$

$$\begin{array}{r} 62 \\ 22 \\ 22 \end{array}$$

$$\begin{array}{r} 344 \\ 172 \end{array}$$

$$\begin{array}{r} 344 \\ 172 \end{array}$$

$$\begin{array}{r} 216 \\ 680 \\ 175 \\ 214 \end{array}$$

$$\begin{array}{r} 2 \\ 44 \\ 6 \\ 10 \\ 6 \\ 22 \end{array}$$

$$\begin{array}{r} 176 \\ 164 \\ 24 \\ 164 \\ 129 \\ 24 \\ 9 \\ 64 \end{array}$$

# FRANÇOIS DE LISLÉ

aux lecteurs S.



Le reuerendissime Cardinal de  
Lorraine (amis lecteurs) nous a-  
uoit repeus souventes fois en son  
viuant, de certaine esperance de  
nous faire voir la Légende de son  
frere le Duc de Guise tué deuant  
Orleans. Ce que nous attendions en grande de-  
uotion, pour autât que chascun tenoit pour asseuré  
que de tant d'hommes d'esprit que le Cardinal a-  
uoit à commandement, il choisiroit le plus habile  
de la main, & de l'entendement, pour bastir vn  
ouure si digne des yeux de nostre France, qui dès  
long temps ne void gueres de choses qui luy puis-  
sent plaire. Nous sauions aussi que le Cardinal a-  
uoit prouision de memoires pour l'enrichissement  
de l'ouurage. Mais après auoir beaucoup attendu,  
nous auons esté entierement deceus par le décès  
de ce reuerendissime, qui a laissé sa legende  
aussi bien que celle de ses freres. Ce qui a donné  
occasion à plusieurs de iuger sinistrement de ceste  
promesse du Cardinal: entant qu'on a estimé qu'il  
auoit voulu ainsi tenir en suspens les vns & les au-  
tres, de peur que son pot aux roses luy fust descou-  
uert en son viuant, & que l'ordure cachée dessous,  
rendist luy & sa race puants & detestables à nostre  
nation. Toutesfois, sans nous arrester trop à dis-  
puter ici qui l'a esmeu à nous ietter ainsi de la pou-  
dre aux yeux, en nous voulant arrester à les men-

# P R E F A C E.

longes, il me faut rendre raison de mon fait, & dire pourquoy i'ay releué les heritiers du Cardinal (si d'avanture il en a, car ie ne le suis, ni ne le veux estre) de ceste peine d'escrire ceste legende, en laquelle non seulement les vies du Duc de Guise & du Cardinal, mais aussi celles de leurs autres freres sont delcrites, non pas tout au long, mais en partie seulement. Il y-a quelques annees que pensant aux miseres de nostre France, & les voyant croistre à veue d'œil, encores que ie ne fusse pas tant aveugle de ne voir le bras de Dieu irrité contre les pechez des François, si est ce que regardant les pierres & bastons, dont il nous vouloit humilier, j'apperceu que ceux de Guise entre autres estoient comme les premiers en ce rang: & que leurs ruses & cruautéz exercees contre grands & petits, & ia publiées en beaucoup d'elcrits, ne deuoient pas meurer tousiours esparles, en danger de pourrir au tombeau de silence, & n'estre iamais descouvertes de la posterité. Cela fit que peu à peu ie commençay à chercher parmy mes papiers quelques liures & memoires cōformes à ceux que le Cardinal tenoit si chers en sa vie, les ayant souvent sur sa table, & disant (comme il fit nommément sous François second en l'assemblee des principaux du Royaume à Fontainebell'eau) que c'estoyent les couronnes de sa vie, pour le rendre immortel. D'iceux ie cōmençay à recueillir quelques passages & traits notables, d'esquels i'esperois accommoder vn mien amy qui commençoit à manier ceste besongne heureusement. Depuis, luy ayant quitté du tout ceste besongne, pour va-

quer



quer à chose aussi importāce, qui se verra quelque iour en lumiere, & les massacres de saint Barthelemy estans entreuenus, ou ceux de Guise auoyēt esté des premiers executeurs, ie pensay qu'il ne seroit pas mauuais de conter à ceux qui ne le scauent, vne partie de leur vie, puis que eux prenoyēt plaisir à y continuer : & que le meschant doit ouir & voir ce qu'il ne voudroit pas, puis qu'il fait ce qu'il ne deuroit.

Or tant s'en faut que par ces memoires cueillis de costé & d'autre (comme ceux qui ont leu les discours publiez depuis quinze ans en ça, le cognoistrōt presque de prime face) i'aye voulu retenir l'esprit & la main de ceux qui pourront auoir de telles ou plus exactes Legendes de ceux de Guise, qu'au contraire ie les prie instamment de ne plus frauder la France nostre mere commune, de memoires & aduertissemens qui luy deuroyent estre aussi souuent mis deuant les yeux, comme ceux de Guise ont tasché iusques à present, & taschent encor de les luy arracher du tout, pour la conduire & manier puis apres à leur plaisir, & selon leurs ambitieux desseins. Souuent ie me suis esmerueillé de la stupidité de plusieurs François qui font profession d'auoir de l'esprit à reuendre, & cependant font semblant de croire que nous n'auons bien quelconque, sinon de ceux desquels la pluspart de nos maux decoulent. Si les affections particulieres n'auoyent corrompu la veue de leurs entendemens, ie m'asseure qu'ils seroyent d'autre aduis: & quand il plaira à Dieu leur oster ceste verriere d'ambicion, de vengeance, & de semblable

## P R E F A C E.

couleur qui les esblouit, ils fuiront l'ordure qu'ils cherissent & adorent.

Et quant à ceux qui voyét ces maux avec moy, qu'ils considerent comment & iusques où ils y peuuent remedier, afin d'y mettre la main à bon esciét, cōme la loy de nature mesmes les y oblige.

Quant aux matieres par moy deduites, du commencement ie faisois mon compte de reduire en douze fueilles de papier ce que i'auois à publier en cest endroit: mais estant ambarqué, i'ay esté emporté en si haute mer d'affaires, qu'auant que gagner le portt à trauers tant de rochers & gouffres perilleux, ie seray contraint de faire vne lōgue navigation. Et comme ceux qui ont perdu terre de long temps ne la regaignent pas aisément, encor qu'à voiles & à rames ils s'y efforcent de tout leur pouuoir: Aussi estāt venu si auant en la mer Guy-sienne, ie tascheray de venir au bout au plustost qu'il sera possible, en telle sorte neantmoins que i'espere estre excusé de vous, si vous ne me voyez si tost desembarqué que l'eussiez desiré. Les courses & trauerses sont si longues & diuerses, tant de vagues l'une sur l'autre, tant de vents contraires soufflans & agitans le cours de mon vaisseau en diuerses parts, que souuentefois c'est à recommencer, & y a tousiours infinies nouuelles routes. Toutesfois à l'aide de Dieu, ie gagneray le bord au plustost qu'il sera possible, en vous faisant voir le reste de ceste Legende.

Le stile est tel que le voyez, asauoir simple & nud, en façon de memoires & recueils. Car ie me suis contenté le plus souuent de reciter les propres  
mots

## P R E F A C E.

mots des escriuains qui m'ont precedé en ceci. Et encores que quelquesfois ie les couche tout au long, si n'ay-ie point fait cela pour remplir le papier, ains d'autant qu'il me sembloit necessaire au point qui lors se presentoit à traiter.

Quelque iour nous pourrons voir vne histoire ou ces rudes & petis commencemens ou descriptions des gestes de ceux de Guise seront proposez en tels termes qu'il appartiendra à tel suiet. Ce m'est assez, si mō rude & simple discours peut seruir à quelques vns de nos François, pour voir & sentir le feu qui les a consumez, & semble fumer encores par trop, pour acheuer de tout perdre, si vn plus grand que les hommes n'y pouruoit.

On pourra demander, pourquoy i'ay differé de mettre ceci si tard en lumiere. A quoy ie respondray qu'il n'est encores que temps, & il seroit bien à desirer aussi que ceste Legende fust vn discours des maux du tout passez, & qu'on n'eust plus aucune occasion de craindre pour l'auenir. Mais l'esprit du Cardinal de Lorraine vit encor en la France, & ne fait pas moins d'efforts qu'autresfois pour amener l'Estat au but par luy tant pretendu en sa vie. Si plusieurs ne voyent ny n'entendent cela, ie seray tres-ioux si le temps ne le leur fait sentir à leur confusion. De ma part, il m'a esté impossible d'estre traistre à celle de qui ie tien la vie. Je commence donc à l'auertir des fraudes & embusches qu'on luy a dressees pour la deuorer sous pretexte de la maintenir. Que mes freres & compatriottes fassent (si bon leur semble) leur prouffit de la bonne affection que ie leur

porte, laquelle ie leur feray toucher encor cy apres, si Dieu me preste la vie, & ne permettray qu'autre me deuance en volonté de resister par moyens legitimes aux menees & pratiques des tyrans estrangers. Si ie ne le puis faire en tât de sortes que beaucoup d'autres, ce sera pour le moins de si bonne main, que les marques en demeureront. Ie voudroy bien auoir autre suiet à traiter, & ie ne doute point qu'aucuns n'estiment que ie pouuois faire autre chose. ce qui est vray : mais ils ne nieront pas que c'est vn temps & traual bien employé, de descouurir à la posterité & à ceux mesmes qui viuent encor, ce qui leur est tres-necessaire pour leur instruction.

Au reste, ie n'ay point monstré en la deduction des choses, le but où il les falloit rapporter, ny comme chascun en doit faire son proufit, attendu qu'il sera aisé à chascun de le comprendre, ioint que les choses passees & ce qui est contenu en ce liure, & sera declairé es autres suyuant, est si cler & tant bien cognu de tous que ce seroit faire tort à leur memoire & iugement de faire des longs discours là dessus. Seulement ie desire, que les François se souuiennent de leur ancienne generosité & liberté, & opposent au contraire l'esclauue seruitude, en laquelle ils ont esté tirez par les factions de ceux de Guise, qui abusans de la simplicité de nos Roys, ont mis l'Estat du Royaume au danger ou chascun le void.

Ie ne doute point que certains courtisans & autres seruiteurs de ceux de Guise, relisans en ceste Legende ce qui est escrit en leurs consciences, ne  
hochent

## P R E F A C E.

hochient la teste & froncent le nez contre moy, pour contredire à cecy, où à cela. Mais ie les prie d'auoir patience iusqu'à tant qu'ils ayent veu les autres liures qui suyront cestuy-cy bien tost, si Dieu le permet: & peut estre mettront-ils de l'eau en leur vin, ou s'il leur prend enuie de dresser autres Legendes à leurs maistres, pourueu que ce soit en meilleure conscience qu'ils ne les ont seruis, i'en seray content. Mais s'ils font tort à verité, qu'ils sachent que leurs flateries & faussetez serōt descouuertes à tout le monde, afin qu'on s'en donne garde, & qu'à l'auenir nul ne soit pippé qu'à son escient.

Le Cardinal auoit vn axiome ordinairement en la bouche pour l'auancement de ses entreprises, Qu'un mensonge entretenu trois heures ou trois iours durant valoit beaucoup: pratiquant aussi ce qu'un ancien disoit, qu'un méteur doit estre effronté iusques au bout. Ses seruiteurs & partisans retiennent bien ceste regle, & estiment qu'en niant hardiment ce qui est cler comme le iour, le temps se passera: & comme vne grand' partie d'eux se soucie peu ou point du tout de Religion, ce n'est de merueilles s'ils foulent aux pieds l'equité & l'honnesteté, colonnes & appuis de la vie humaine. Mais de disputer beaucoup avec eux, c'est presque peine perdue: il suffit de les remettre au siege iudicial de Dieu, deuant lequel ils comparoistront tost & tard, encors qu'ils taschent de persuader le contraire à eux melmes & aux autres.

Si lon demande maintenant, pourquoy ie ne presente qu'un liure de ceste Legende, & i'en ay

promis

EJMS

12-5172

## P R E F A C E.

promis dauantage au tiltre : ie confesse auoir en main les memoires de l'œuure entier , mais ayant esté surpris & cōme lié par les mains d'un empeschement ineuitable, & l'Imprimeur desirant publier quelque chose de ce que i'auois commencé, il a tiré de mes mains ceste premiere partie, en laquelle si vous rencōtrez des fautes d'impressions, j'espere que les excuseres, n'ayant eu la commodité de me trouuer avec l'Imprimeur, ny le loisir de faire transcrire ce que i'auois assez rudement tracé de ma main. J'espere que les liures seront plus corrects, & que si en quelques endroits de ce premier liure, il y a eu quelques particularitez omises, elles se retrouueront en autre endroit propre cy apres. Si dauanture ceux qui restēt de la maison de Guise receuoient ceste faueur de Dieu que de laisser le Royaume en repos, & se contentoyent du passé, l'effaçans par gracieux & fideles deportemens à l'auenir, ie ne voudrois tenir ma promesse, ains enfeuelirois le premier les memoires des maux passés : mais s'ils continuent, comme ils ont fait iusques à present, ils trouueront des cerueaux & des mains qui leur resisteront. Et combien que par finesses & trahisons eux & leurs semblables se soyent auancez iusqu'à present, plus que par force d'armes : si est-ce que la verité aura finalement son cours, & ne gagneront rien à suyre le mauuais train de leurs deuanciers, sinon de se rendre tant plus odieux à Dieu & aux hommes.

Ils hausseront tellement leur pyramide que la pointe leur tombera finalement sur la teste, & les accablera de tout. S'ils preuient ce danger, en se mettant

## P R E F A C E.

mettant en leur deuoir, i'en seray tresaise: & ne  
veux pas nier que si ceux de Guise se fussent te-  
nus en leur rang, ils pouuoient faire seruice à la  
Couronne de France: mais de seruiteurs voulans  
deuenir maistres, ils ont gasté tout, & ruiné eux &  
les autres. Or craignant d'estendre ce propos trop  
auant, ie vous prie, lecteurs, receuoir de bon œil ce  
premier liure, en attendant les autres, qui vous se-  
ront bien tost presentez: ce que ie m'asseure que  
ferez, si vous estes vrais François, c'est à dire, affe-  
ctionnez au seruice de Dieu, au bien de vostre pa-  
trie, & à la conseruation de vostre ancienne & ge-  
nerouse liberté.



[illegible]



# LA LEGENDE DE CHAR- LES CARDINAL DE LOR- raine, & de ses freres, de la maison de Guise.



<sup>1</sup> An mil trois cens soixante & deux, leā *Genes*.  
Duc de Lorraine estant mort, eut pour *logie de*  
successeur Charles premier du nom, *ceux de*  
son fils aîné, lequel eut trois fils de *Guise*.  
Marguerite fille de Robert de Bauieres,  
Conte Palatin, aſauoir Charles, Robert  
& Federic, qui moururent tous trois  
ieunes: & trois filles, dont l'aîſnee Ma-

rie fut donnee à Enguerand Conte de Coucy, qui mourut  
ſans hoirs: la ſecōde, Caterine, fut mariee à Iaques Marquis  
de Baden, en faueur duquel mariage le Duc de Lorraine dō-  
na audit Marquis les trois Preuoſtez de Sainct Dier, Arches  
& Bruettes avec quelque ſomme de deniers: au moyen de-  
quoy ce Marquis renonça à la ſucceſſion de la Duché de  
Lorraine. La troiſieſme fille nommee Iſabeau fut mariee à  
René d'Aniou, fils de Loïs d'Aniou, ſecōd fils de Iean Roy  
de France. Ce René premier du nom, ſucceda à ſon beau  
pere Charles de Lorraine, & eut la Duché de Bar de par Yo-  
land d'Arragon ſa mere. Mais Antoine Conte de Vaude-  
mont, fils de Ferry frere du Duc Charles donna empeche-  
ment à René, & maintint la Duché de Bar luy appartenir.  
A ce luy aida le Duc Philippe de Bourgongne qui n'eſtoit  
pas content du mariage de René avec Iſabeau. Si fut donnee  
bataille pres Bulainuille, où le Duc René demeura prifon-  
nier & fut amené à Diion ſous la garde du Duc de Bour-  
gongne, où il le tint quinze ans prifonnier, à l'appetit des  
Anglois & Bourguignons, au ſervice deſquels eſtoit Ferry  
de Vaudemont fils de ce Conte Antoine. Finalement fut  
appointé que René prifonnier donneroit ſa fille aîſnee Yo-  
land à ce Ferry de Vaudemont avec la ſomme de deux cens  
mil eſcus de rācon. Sur ces entrefaites, Loïs d'Aniou frere  
aîné de René, mourut ſans enfans, eſtant à la pourſuite du  
Royaume de Naples, duquel le Pape Clement l'auoit cou-  
ronné Roy. Ces nouuelles entendues René delibera d'en-

trer en possession de ces Royaumes : mais nonobstant le secours des Geneuois , du Duc de Milan & autres potentats d'Italie, il fut finalement chassé de Naples par les Espagnols & contraint se retirer en France vers Charles septieme son beaufrere . Et apres quelque guerre contre ceux de Metz, entendant la mort de sa femme Isabeau , laissa le gouvernement de Lorraine à Iean son fils aîné , & delibera finir le reste de ses iours en ses parties de Prouence & d'Aniou.

Iean surnommé de Calabre ayant tenu la Lorraine environ dixhuit ans laissa vn fils nommé Iean d'Aniou , viuant encor son grand pere René, lequel fiança Anne fille du Roy Loys vnzième : mais estant despité contre son beau-pere, & pratiqué par le Duc de Bourgogne , comme il estoit sur le point de traiter mariage avec Marie fille de ce Duc de Bourgogne & laisser celle de France , il mourut. Par ce moyen René deuxiesme du nom , fils de Ferry de Vaudemont & d'Yoland fille du Duc René d'Aniou , & sœur du Duc Iean succeda aux Duchez de Lorraine & de Bar l'an 1473. à faute d'autres heritiers, viuant encor son grand pere maternel René d'Aniou, & sa mere Yoland que les Lorrains ne vouloyent auoir pour gouuernante. Ce Duc cy eut de grandes guerres contre le dernier Duc de Bourgogne , lequel finalement fut defait deuant Nancy. Or viuoit encor le grand René d'Aniou ( qui s'appelloit Roy de Sicile ) pere grand de ce René deuxiesme , & se tenoit en son repos sur son vieil aage en ses Duchez d'Aniou & de Prouence , fort chery & caressé du Roy Loys vnzième , qui l'entretenoit paisiblement , craignant qu'il prestât l'oreille aux Bourguignons & Anglois , desquels il estoit fort sollicité . Si enuoya ce Roy René vers son petit fils l'auertir que s'il vouloit estre son heritier il eust à prendre les armes plaines de la maison d'Aniou . Ce qu'il refusa faire , bien accorderoit il de les porter mi parties d'Aniou , Prouence , Sicile & Lorraine . Pour ce refus, le Roy René institua son heritier Charles Conte du Maine son neveu, à cause de Charles son frere aussi Conte du Maine. Le Duc René aduertty de ceste institution se hâta de venir voir son grand pere : mais les choses estoient ia faites & passées : au moyen dequoy tout indigné il s'en retourna soudainement . Le Roy René mourut l'an 1482. Vn peu apres

après mourut aussi Charles du Maine son neveu . & partant le Roy Loys vnziésme, demeura seigneur des pays de Prouence, Aniou & le Maine, par donation testamentaire que ledit Charles luy en fit : lequel encor luy, laissa la Duché de Bar.

Après la mort du Roy Loys vnziésme . René de Lorraine ( qui s'estoit retiré en Italie à la persuation du Pape Sixté , pour essayer de conquerir les Royaumes de Naples & Sicile : & auoit esté quelque temps à la solde des Venitiens ( vint en France demander son droit aux Contez de Prouence & d'Aniou, & à la Duché de Bar . Quant à ceste Duché , elle luy fut rendue à condition que luy & ses successeurs en feroient hommage au Roy , qui en demeureroit souuerain : mais touchant la Prouence & Aniou , fut fait responce qu'elles estoient de la Couronne , & qu'elles ne tomboyent en quenouille . Finalement par accord du Roy Charles 8. & de ce Duc , le different fut remis au iugement de trois deleguez . Ce pendant , le Roy donna au Duc vne compagnie de cent hommes d'armes avec trente six mil francs d'appointement . L'an 1489. ceux de Naples ennuyez de la tyrannie du ieune Alphonse , appellerent le Duc René à leur aide : mais ainsi qu'il s'apprestoit, fut prononcé l'arrest des trois iuges deleguez, qui fut tel: que non seulement Aniou & Prouence, mais encor Naples & Sicile appartenoyent au Roy de France . Par quoy Charles huitiésme entreprit ce voyage pour luy-mesme . Mais nonobstant cest arrest, Yoland mere de René n'en laissa de porter ( après la mort de son pere René le grand ) le tiltre de Royne de Sicile . René deuxiésme aussi se nomma Roy de Sicile & de Ierusalem, à cause des vieilles conquestes de ses predecesseurs : & fit appeller son fils aîné Antoine, Duc de Calabre, & porta tousiours les armes d'Aniou mi parties avec les siennes . Pour ceste audace & autres entreprises, il fut mal voulu du Roy Loys douziésme chassé de France & priné de ses pensions : mais il trouua moyen de faire sa paix, puis mourut à la chasse, ayant esté Duc l'espace de trente cinq ans . Il eut de sa femme Philippe sœur du Duc de Gueldres douze enfans desquels les sept moururent en ieunesse, & laissa seulement cinq fils, asauoir Antoine, Claude, Iean, Loys & François.

## LA LEGENDE DV

Antoine succeda à son pere René aux Duchez de Lorraine & de Bar, pareillement au Conté de Vaudemont & Marquisat de Pont: & (par la mort de Charles Duc de Gueldres frere de sa mere) la Duché de Gueldres & Conté de Zutphan. Il laissa trois enfans, François qui fut Duc apres luy. Anne mariée au Prince d'Orange, & Nicolas qui fut Euesque de Verdun, & depuis Euesque de Metz, & finalement (comme il est encores auiourd'huy) Conte de Vaudemont & beaupere de Henry troisieme Roy de France. François successeur d'Antoine eut vn fils & deux filles de Chrestienne fille du Roy de Dannemarch. Le fils nommé Charles deuxiesme succeda à son pere l'an 1545. & vit encor de present, ayant en mariage Claude fille du Roy Henry 2. de laquelle il a plusieurs enfans viuans.

Claude second fils de René Duc de Guise & Baron de Guinille, vint en la Cour de France, où il obtint le gouvernement de Champagne & Bourgongne ayant espousé Antoinette de Bourbon tante des feus Roys de Nauarre & du Prince de Conde: de la quelle il eut François, Charles, Claude, Loys, René & le grand Prieur: desquels, specialement de François qui depuis fut Duc de Guise, & tué par Poltrot deuant Orleans, & de Charles Cardinal de Lorraine nous ferons en apres ample mention, y adioustant ce qui viendra à propos touchant les autres freres, l'un desquels à sauoir Claude fut Duc d'Aumale, tué au siege de la Rochelle, René Marquis d'Allebeuf, Loys Cardinal de Guise, & le grand Prieur.

Iean troisieme fils de René, Euesque de Mets, fut fait Cardinal par recommandation speciale faite au Pape Leon dixiesme, l'an 1518. & depuis estant ordinairement à la Court de France, fut fort aimé du Roy François premier, pource qu'il ne se mesloit point d'autres affaires que de plaisir. Les deux autres a sauoir Loys & François moururent en bataille, l'un au Royaume de Naples, & l'autre à la journée de Paue. Le Duc Antoine fut assez bon homme, & vint volontairement trouuer le Roy François à Dijon, où il luy fit hommage de la Duché de Bar, & fut bien marry d'une grand faüte qu'il auoit faite: car ayant le feu Roy François acouis la Duché de Gueldres, luy qui pre-tendoit que par succession ceste Duché luy deuoit escheoir, pratiqua par vn Iacob Canis Bourgmastre de Neme-gue de

gue de faire soufleuer le peuple & empecher que le Roy n'en entraist en possession. Puis, voyant que le peuple ne vouloit point de luy & se donnoit au Duc de Cleues, il tascha de r'adouber ceste faute, mais il ne peut. Toutefois en faueur de Iean Cardinal de Lorraine son frere, le Roy François luy pardonna le tout. Quant à ce Cardinal, ce fût vn des premiers attrappeurs de benefices, & chascun à veu iusques à quel poinct il poussa l'Eglise Gallicane. Toutefois pource qu'il ne fut pas homme fort violent, & d'ailleurs estoit despensier & liberal, on le comporta assez doucement. Quant au pere du Duc de Guise & du Cardinal de Lorraine, en son temps il n'eut pas de grandes charges, & ne se fia lon pas de luy de grandes affaires. Ayant mené sans congé les forces du Roy secourir le Duc Antoine son frere, qui estoit (ce disoit on) trauaillé d'Anabaptistes, cela fut trouue fort mauuais, & sans le Connestable, qui estoit lors grand maistre, & Marechal de France, il eust esté emprisonné & mal traité du Roy François qui ne vouloit souffrir que ceux qui n'estoyent rien que par sa bienueillance, eniambassent ainsi sur son autorité. Et de fait, estant auenu vne autre fois que ce mesme Sieur de Guise gouverneur de Bourgogne voulut entrer au chasteau d'Auffonne, qui pour lors estoit vne charge à part, où le Sieur de Roueray gentil-homme François & Lieutenant de la compagnie du Marquis de Rotelin commandoit là mesme: l'entree luy en fut refusee, ce que Roueray n'eust fait s'il eust tenu ledit Sieur de Guise pour Prince. Il s'en plaignit au Roy François, lequel loua en cela grandement le gentilhomme, & se moqua de celuy qui auoit voulu faire le Prince de son sang. Au reste il pinsoit viuement, & persecuta iusques au bout plusieurs marchans des meilleures villes du Royaume: mais s'estant attaché aux marchans de Paris, qui n'estoyent encoir accoustumés au rasoir, la ville print le fait en main, fit reuoker les commissaires, & furent les amputeurs du Sieur de Guise partie prins prisonniers, les autres fondirent comme neige au Soleil. Depuis, il en porta tousiours vne telle dent de lait aux Parisiens qu'en temps de cherté ny en autre saison, quelque abondance de blez, vins ou autres viures qu'il y eust es pays de Champagne & Bourgogne, tant comme il en a esté l'vn apres l'autre Gouverneur, iamaiz

ceux de Paris n'en ont peu tirer pour leur ville, qu'avec force lettres de traites bien chèrement achetees. Si est-ce qu'il ne s'attacha pas depuis à vne generalité d'estat de ville. Bien alloit-il halletant tousiours apres quelque confiscation par cy par là, & quelque vne s'acrochoit. Mais son grand effort fut sur ceux de son gouvernement, qu'il pluma à toutes restes. Pourtant le Roy Henry, par l'aduertissement du Roy son pere ne le voulut iamais appeller aux affaires d'estat, combien que ses deux premiers fils, assauoir le Duc de Guise & le Cardinal de Lorraine ses enfans en fussent: & les conduisoit le bon Seigneur iusques à la porte du Roy, puis s'en retournoit: enquoy, ie ne scay, à vray parler, de qui lon auoit plus de honte, du pere ou des enfans. Or mourut-il empoisonné, & comme bon Chrestien pardonna sa mort à celuy ou à celle qui par mesgarde luy auança le terme deses iours en le prenant pour vn autre.

*Comme  
ceux de  
Guise su-  
rent a-  
uancer.*

Ses enfans furent auancez par son frere Iean Cardinal, lequel se voyant chargé de beaucoup de benefices, choisit Charles pour estre son successeur, & l'entretint specialement au college de Nauarre, par quelques anneés, d'où il fut retiré pour venir gouverner le Roy Dauphin: car combien qu'il y eust d'autres personnages en France, pour faire telle charge, toutefois le credit de l'oncle gaigna cela sur le grand Roy François, ioint quelque promptitude d'esprit qu'on voyoit en cestuy cy. Toutefois du temps du grand Roy François ils n'estoient pas en grand credit. Charles estoit simplement Monsieur de Reims, son frere François Conté d'Aumale (car leur pere viuoit encor) & les autres freres se poussoyent comme ils pouuoient. Or fauoit le Roy François que ces esprits pourroyent remuer quelque chose, & sous le pretexte des Duchez d'Aniou & Conté de Prouence brouiller le Royaume, pour ceste cause ne les fauorisoit-il que bien à poinct. Il auoit fait cest honneur à leur sœur aisnée pour l'amour de sa beauté, qu'à l'entree de la Royne Léonor, elle fut habillée en princesse: mais voyant que ces estrangers s'en preualoyent, comme s'ils eussent esté desia princes de France, il denia à la femme du Marquis du Maine le manteau Royal. Chascun scait que ce mesme Roy sur la fin de ses iours porta peu d'affection au Cōestable, lequel se retira en sa maison. La principale occasion de ceste colere fut, qu'il entendit que par la recom-

mandation



mandation dudit Sieur Conneſtable, le feu Roy Henry lors Dauphin de France, les auoit approchez de ſoy : en conſequence de quoy & de leur alliãce avec la grande Senefchale de Normandie qui gouuernoit le Dauphin, le Roy François qui l'auoit aimée auſſi ſe deſpita contre.

Ceſte grande Senefchale fille du feu Sieur de S. Vallier auoit racheté la vie de ſon pere de ſon pucelage. Et de puis, au grand malheur & deſhonneur de noſtre France, eſtant à demy vſee auoit eſté baillee à Henry, duquel elle gaigna ſi bien le cœur qu'elle deuint Duchefſe de Valentinois, & Roynede France, quant à l'effect, Ceux de Guiſe voyans que c'eſtoit là vne planche propre pour paſſer bien auant en la France, eſtiment qu'il faut s'en ſeruir, encor que ce fuſt vn tref-vilain expedient. Ils procurent le mariage du troiſieſme frere, depuis Duc d'Aumale avec la derniere fille de ladite Senefchale. Par ce moyen s'approcherent de Henry, duquel ils pratiquerent ce pendant deux choſes, eſquelles on deſcouurira aiſément tous leurs deportemens ſubſequens contre la France. Le premier fut qu'ils oſerent par le moyen de ceſte Senefchale tirer de la bonté & ſimplicité de Henry lors Dauphin, en mariant leur frere, vne promeſſe de leur rendre, luy venu à la Couronne, la Conté de Prouence. Mais comme Dieu rembarre ſouuent par les plus petis l'orgueil & la fierté des plus grans, vn ſeul General de la Cheſnaye eut bien de la vertu aſſez de leur faire rendre honteuſement & maugré eux ceſte promeſſe : eſtans heureux en vn poinct, c'eſt qu'en la iettant au feu, l'on y iettoit auſſi la preuue & le iugement tout aſſeuré de leur deſloyale ſelonnie : ioinct que ſi le Roy François en euſt ſenty le vent, c'eſtoit fait d'eux & de la Senefchale avec. Venons à l'autre poinct, le Roy François peu auant ſa mort, auoit aupres de ſoy deux perſonnages qu'il aimoit ſingulierement, aſauoir le Cardinal de Tournon Chancelier de l'ordre & maiſtre de l'Oratoire, & le Sieur d'Annebaut Mareſchal & Amiral de France. Le Conneſtable eſtoit pour lors en ſa maiſon, & eſtoit grand maiſtre de France auſſi le Dauphin au contraire eſtoit enuelpé de la grande Senefchale, laquelle auoit à ſes coſtez ces deux freres de Guiſe, François Conte d'Aumale, & monſieur de Reims, par le moyen de ce mariage ſuſmentionné. Sur tous autres, le Dauphin aimoit le Sieur de Saint André, le

pere duquel auoit esté son gouuerneur. Or comme la maladie de laquelle le feu Roy François mourut à Rambouillet fust longue & incurable, au iugement de tous les medecins : messieurs de Guise proposent au Dauphin de faire (si tost qu'il sera Roy) vne ordonnance, que nulle personne ne tiendroît doréſnauant deux offices : & là dessus s'asseurent de piller ces Seigneurs susnommez, & auoir par ce moyen telle entree aux affaires qu'avec le temps ils viendroyent au dessus de leurs desseins. Quant aux Princes du sang, pour ce que personne d'eux ne monstroît semblant de se vouloir trop auancer, ceux de Guise s'asseuroyent d'en venir aisément à bout.

Mais auant que passer plus outre, faut considerer deux autres traits notables en la mort de François premier. Ce Roy estant au liêt de la mort, fit appeller le Dauphin son fils, pour parler familièrement à luy : & comme l'ame prochaine de son issue est communement plus alaigre & deliurée de tout faix terrien, soin & cures mondaines & moins attachée au corps : aussi auient-il souuent que les hommes en ces temps, lieux & accidents là, traitent souuent de choses plus hautes que de coustume, & par vne certaine prouoyance, qui surpasse l'ordinaire de nature humaine, predisent les choses auenir. Ainsi donc entre beaucoup de notables auertissemens que ce Roy donna à son fils, il le pria tres instamment, qu'il ne s'acostast des enfans de Guise, & ne les approchast de luy ny de ses affaires : car disoit il, Mon fils, i'ay bien apperceu & cognois pour vray que la race n'en vaut rien, & que si vous faites le contraire, ils vous mettront en pourpoint & vostre peuple en chemise. Cest aduertissement estoit bien digne d'estre note & executé : toutesfois la simplessse du Dauphin enforcé par la Seneschale & l'ire de Dieu sur la France, ne permit que le fils obeist au conseil de son pere, qui en cest endroit ne parla que trop veritablement. Et ce qu'il auoit dit que ceste race ne valoit rien, apparut bien tost apres. Car le iour que ce grand Roy François mourut à Rambouillet, le Dauphin trauaillé de regret & desplaisir de l'estat où il voyoit son pere languissant, s'estoit ietté sur le liêt de la Dauphine, laquelle estoit à terre & faisoit de l'esplorcee & dolente : au contraire la grande Seneschale & le Duc de Guise, qui n'estoit lors que Conte d'Aumale y estoient, celle

François I.  
haussait  
ceux de  
Guise.



celle là toute gaye & ioyeuse, voyant le temps de ses triomphes approcher: cestuy cy se proumenant par la chambre de la Dauphine, & de fois à autre alloit à la porte sauoir des nouuelles, & quand il reuenoit, il s'en va (disoit-il) le galand. Mais sans ce galād là, puis qu'il l'appelloit ainsi, tous ceux de la maison de Guisse n'eussent iamais esté que petis cadets de Lorraine.

Voyons maintenant l'execution de ceste ordonnance que nulle personne ne tiendrait à l'auenir deux offices. Ceste ordonnance ainsi arrestee & le Roy François mort, s'executa premier que d'estre veue ne publice: car sur le champ, Monsieur de Reims despouilla le Cardinal de Tournon de l'office de Chancelier de l'Ordre, lequel leur ietta aussi & despit leur quitta celuy de maistre de l'Oratoire, l'Amiral d'Annebaut laissa l'estat de Marechal. Il laisse les autres, pour venir à ceste grāde maistrise, pour laquelle auoir ceux de Guise presserent instamment le nouveau Roy d'escrire au Connestable, que premier que venir en Cour il enuoyast procuration pour resigner l'un ou l'autre de ses offices de Connestable & grand maistre, esperans bien qu'il retiendrait celuy de Connestable, comme le plus haut & le plus apparent. Mais soit que deslors le Roy eust arresté d'exempter son compere de leur ambition, ou que le desir qu'il auoit que le Sieur de S. André, auquel il s'en estoit descouuert, fust preferé en cest estat par vne resignation qui s'en feroit en sa faueur, (afin de frustrer par tous moyēs la fiere attente du Conte d'Aumale) l'en engardast: il escriuit bien au Connestable qu'en toute diligence il le vinst trouuer; mais point de resigner, remettāt le Roy à en parler de bouche luy venu en Cour. Mais tant s'en fault, que le Roy (qui estoit affamé & brusloit d'un ardent & furieux desir de voir ce Connestable qui si long temps auoit esté eslongné de luy) eust le courage d'oster à son compere pas vn de ses estats: qu'au contraire à leurs premiers embrassemens il se trouua si honteux de n'auoir estat en main pour luy en donner, & honorer sa bien venue, que de sa propre personne il fit vn present à son compere. Monsieur de Reims, s'estoit faisny du Cachet: le Conte d'Aumale auoit prins les clefs du chasteau, comme faisine de succession escheuē. Mais quand ils ouyrent le Roy criant tout haut à l'un, rendez les clefs, à l'autre, portez le cachet au grand Maistre, & qu'il

*Ceux de Guise pillent le Cardinal de Tournon.*

fallloit dormir sous la clef du grand Maistre, marcher au commandement du Connestable, & n'auoir cognoissance des affaires que par distribution du compere: chascū peut penser quelle route print l'ame de l'un & l'autre de ses deux freres, voyās mesme qu'à l'heure fut erigé vn nouuel office de Marechal de France pour Iaques d'Albon Sieur de S. André, qui estoit tout ce qui restoit au Roy, & sur quoy le Conte d'Aumale fichoit sa derniere esperance.

*Leur ingratitude enuers le Connestable.*

Ce fut la vn des fondemens de leur querele contre le Connestable & sa maison. Mais outre le tort qu'ils se faisoient à eux-mesmes en cest endroit, ils se monstroyent merueilleusement ingrats enuers le Connestable: car ceux qui ont esté en France du regne de François le grand, ont veu & conu que le pere & l'oncle desdits de Guise n'eurent onques en tout le Royaume, ne par tout le cours de leur vie, vn tel ne si bon amy que le Connestable, lequel dès leur arriuee en France estoit ia en grand credit enuers le feu Roy François son maistre, ayant depuis succédé à vne incroyable faueur de deux grans maistres de France, l'un Seigneur de Boisy son cousin germain, l'autre de Sauoye son beau pere, & finalement venu iusqu'au plus haut degré qu'hōme de quelque grandeur, hors les Primats de la Couronne, ne de quelque pays qu'il soit, peust attaindre en France. A luy seul plus qu'à nul autre sont tenus tous ceux de Guise de ce qu'ils sont issus d'une Princesse de France fille de Vendosme, ayant le Connestable moyenné le mariage de leur mere avec leur feu pere, lequel n'esperāt pas que iamais tel bien luy deust auenir, auoit desia ietté les yeux sur vne damoiselle de moyenne maison. Les prieres du Connestable seul valurent tāt enuers le Roy François à son retour d'Espagne que leur dit pere euita la prisō, obtint pardon de ce que sans aucu ny congé il auoit mené les forces du Roy en Lorraine, & entra en grace. Estant auenu le decez de la Roynne d'Escosse fille du Roy, & desirāt le feu Roy d'Escosse reprendre femme en France, le Connestable fut cause que madamoiselle de Guise leur sœur, penultiesme Roynne d'Escosse, & mere de Marie Stuard, fut preferee à beaucoup d'autres plus mariables, & vrayement plus sortable qu'elle n'estoit. Mais il estoit bon de l'enuoyer hors de cognoissance, car du temps qu'elle estoit nourrie à Nancy, elle auoit voulu laisser la Cour de Lorraine pour estre

courti-

courtisanne de l'Abbé de Beaulieu grand oncle du feu Duc de Bouillon : & sans l'aduertissement que la Contesse de Lignanges en donna à madame Renée de Bourbon, ceste-cy s'en alloit avec l'Abbé en son ferrail de Beaulieu. Mais l'Abbé en receut vn traitement qui monstre le naturel de ceste maison : car apres l'auoir receu sur leur foy, & fait semblant d'auoir oublié la legereté de la damoiselle, ils le firent tuer de sang froid, adioustans à la cruauté vn periure accompagné de grande ingratitude: car la maison de Lorraine à tiré infinis plaisirs de celle le Sedan, laquelle neantmoins a esté depuis persecutée en diuerses sortes par ceux de Guise.

Pour reuenir à leur ingratitude enuers le Connestable, le Roy Henry à son auenement à la Couronne, assauoir au mois d'Auril 1546. ayant mis entre les mains dudit Sieur Connestable, son bon compere l'vniuersel maniemēt, charge & cōduite des affaires du Royaume, quelques iours apres print le Conte d'Aumale, Monsieur de Reims son frere, les Sieurs de Sedan & de S. André Mareschaux de France, les presenta au Cōnestable, & luy dit en ses termes, Mon compere, voicy les disciples que ie vous presente pour apprēdre de vous, & vous obeyr, comme à moy mesme. Ie vous prie de les instruire en mes affaires pour m'y faire seruice sous vous tant que vous viurez : & en se tournant vers eux. il leur dit, Ie le vous baille pour vostre pere & maistre d'eschole, aimez-le & l'honnez, & faites ce qu'il vous dira : car ie le tien moy-mesmes pour mon pere & mon meilleur amy, & pour le plus loyal & fidele seruiteur que le feu Roy mon pere ait eu ne que ie saurois auoir. Apres cela, le pere desdits de Guise à la premiere entreueüe de luy & du Cōnestable leur dit en ces mesmes termes. Mes enfans, voila vostre pere, car ie suis moy mesmes sa creature: faites luy toute vostre vie honneur & seruice, car nous le luy deuons. Le tesmoignage q̄ le feu Cardinal leur oncle fit en presence du feu Cardinal de Lenoncourt est encores plus grand : car ce fut en l'absence du Connestable, & sur quelque chose qu'ils vouloyent remuer contre luy, Gardez vous bien (dit il) d'offenser ce personnage là: car sans luy vostre pere & toute vostre maison eust beaucoup souffert: vous ne fussiez pas ce que vous estes, ny vostre sœur aussi.

ie luy doy moy mesmes mon auancement, & tout ce que i'eus onques de bien, de faueur & credit enuers le feu Roy. Mais tout cela ne les peut destourner de nuire couuertement & ouuertement au Connestable, enquoy ils profiterent peu durant le regne d'Henry: mais sous François, second ils luy payerent le salaire de leur escholage, comme nous le verrons cy apres.

*Comme  
cement de  
la haine  
de ceux  
de Guise  
contre  
l'Amiral  
de Cha-  
stillon.*

Il a esté parlé du mariage de leur frere le Marquis du Maine avec la fille de la Seneschale. Ils prindrent la vne accroche cõtre le Sieur de Chastillon depuis Amiral, qui s'agrandit tellement avec le temps par nouuelles occasions, qu'ils l'ont fait mourir finalement, ensemble ses freres, & taschènt tous les iours de voir le bout de sa race, si la leur ne perit la premiere. Pour entendre donc le fondement de tant de maux qui ont tout ruiné la France, faut se souuenir que le Connestable desirieux d'auancer ses neueux de Chastillon, fit esleuer à dixhuitans l'aisné de leur maison en la dignité de Cardinal, ardamment desirée pour l'ignorance du temps: & fit monter les deux autres assauoir Gaspar & François de degré en degré par toutes les charges & exercices militaires tant par mer que par terre: où ayans acquis reputations entre tous autres Seigneurs du Royaume, il fut aisé à l'Amiral, qui lors s'appelloit le Sieur de Chastillon, tant par la faueur du Connestable, que pout les debats qui s'estoyent esleuez entre les Sieurs de Dampierre & de S. André, de tenir l'un des premiers lieux pres le Roy Henry lors Dauphin. Ce que voyant le Conte d'Aumale defauorisé plus que nul autre enuers le Roy François 1. se ioignit tres-estroitement & de familiarité & d'amitié avec ledit Sieur de Chastillon, pour s'insinuer tant plus aisément en la bõne grace du Dauphin. Ceste amitié reciproque continua tellement par l'espace de quatre ou cinq ans entre ces deux Seigneurs qu'ils ne pouuoient viure l'un sans l'autre & estoyent ordinairement habillez d'une mesme parure. Or le pere desdits de Guise, voulant mettre sa maison en credit par quelque bout que ce fust, desiroit que le Marquis du Maine son troisieme fils espousast la fille de la Seneschale, courtisanne du Dauphin. Le Conte d'Aumale ne pouuoit approuuer ce mariage, toutesfois craignãt d'irriter le Dauphin, ils s'adresse au Sieur de Chastillon lors son grand amy pour le prier de luy donner auis, cõme à son amy singulier,

sur

sur la response qu'il deuoit faire lors qu'on luy en parlero-  
 roit, adioustant, non sans larmes, qu'à quelque pris que ce  
 fust, il n'y consentiroit iamais. Le Sieur de Chastillon de-  
 sistant le consoler en son ennuy, s'efforça de l'appaiser : &  
 apres quelques propos tenus de part & d'autre, la cōclusion  
 fut qu'il valoit mieux auoir vn pouce d'autorité avec hō-  
 neur, qu'une brassée sans honneur. Mais apres ceste resoluti-  
 on, tant s'en fait que le Conte d'Aumale suyuiſt le con-  
 seil, sur lequel il s'estoit le premier opiniaſtremement arreſté,  
 que pour ietter le Sieur de Chastillon en la haine du Dau-  
 phin, il dit au Mareſchal de Vieille ville, qui estoit leur amy  
 commun, qu'il n'eust iamais eſtimé que le Sieur de Cha-  
 stillon eust eſté enuieux de ſa grandeur & de ſon auance-  
 ment en voulant deſtourner ce mariage. Quant aux autres  
 cauſes de ceste inimitié, nous en parlerons és endroits pro-  
 pres cy apres.

Voila vn des freres bien pourueu. Reste de voir comme *Pratiques*  
 l'aiſné & le ſecond s'auancerent. Le Duc René leur pere *du Duc de*  
 grand auoit eſpouſé Marguerite fille & heritiere vnique du *Guise*  
 Duc Guillaume de Tancarville de la maiſon de Harcourt *pour trom-*  
 en Normandie: de ceste maiſon leur ſont venus la Conté *per ſcme.*  
 d'Aumale, le Marquiſat d'Albeuf, & tout ce qu'ils ont de  
 propre en France, excepté Ginuille. Or pource que ceste  
 dame estoit boſſue & ſterile, il la laiſſa pour eſpouſer (com-  
 me dit a eſté) la ſœur du Duc de Gueldres, de laquelle ſont  
 iſſus le Duc Antoine, le Duc de Guise leur pere, & le Car-  
 dinal Jean leur oncle. Or naquit (comme ils pretendent) le  
 Duc Antoine, la premiere femme viuant encores : & laiſſa  
 vn fils nommé François, duquel eſt iſſu Charles à preſent  
 Duc de Lorr. qui estoit fort ieune & aagé de deux ans ou  
 enuiron quand ſon pere mourut. Lors (comme veufues &  
 pupiles ſont touſiours abayez des meſchans) le Côte d'Au-  
 male leue l'oreille, comme ſi la porte luy estoit ouuerte à  
 vſurper la Duché, en faiſant declarer le Duc Antoine illegi-  
 time. Ce qu'il ne pouuoit faire, ſinon ayant vn pied dedans  
 la Duché. Pourtant il fait tout ce qu'il peut pour paruenir  
 à eſpouſer Chreſtienne, veſue du Duc François. Elle com-  
 me ſage & aduiſee, & vrayement cōme vne mere naturelle,  
 voulant conſeruer ſon fils & ſon bien, aſpiroit à en auoir  
 la garde: parquoy elle tenoit ce monsieur l'amoureux en  
 quelque halaine, cōme auſſi de ſa part il eſtimoit bien que  
 ceste

# LA LEGENDE DV

ceste garde noble luy seroit vne honneste & fauorable entree à s'emparer de la Duché. Pourtant, incontinent apres les noces du Marquis du Maine, to<sup>9</sup> ces messieurs les freres partent de Ginuile en grande diligēce & braue equippage, pour faire ceste vefue garde de son enfāt. Mais si tost qu'elle tint ce qu'elle demandoit, elle leur donne du rosmarin, & s'en reuindrent bien confus, & sur traineboyau, comme lō dit. Ayans failly à leur entreprise contre leur cousin germain (car le feu Duc de Lorr. & eux esloyēt enfans des deux freres) ils ieterent leurs filez sur les autres cousins du costé de la mere. Car le feu Roy de Nauarre & eux estoient enfans de frere & sœur. Ils tenterent donc par tous moyens de desbaucher le mariage entre Ianne d'Albret Princesse de Nauarre & Antoine de Bourbō Duc de Vendosme depuis Roy de Nauarre. Mais comme vne vefue, qui auoit eu aucunement affaire d'eux, couuertemēt les mesprisa, vne fille de Roy qui n'en auoit que faire, ouuertemēt les desdaigna: car (dit-elle au Roy Henry qui luy en parloit) Voudriez vous, Monsieur, que celle qui me doit porter la queue fust mabelle sœur, & que la fille de madame de Valentinois vinst à me costoyer? Parquoy le Roy se sentant luy-mesme payé ne luy en parla onques depuis. Mais eux tournās leur rage contre le Roy mesme, luy en firent payer l'amende, comme s'ensuit. Hercules d'Est Duc de Ferrare auoit vne fille qu'il aimoit mieux que sa femme: car chascun à veu quel traitement il a fait de son viuant à ceste grand dame Renee fille du Roy Loys douxiesme, pere du peuple: ceux aussi qui entendent les affaires d'estat, & qui estoient de ce temps là, fauent pourquoy on la refusa à tant de Princes & grans Seigneurs qui la demandoient, pour la mettre si bas qu'en Ferrare. Or auoit ce Duc ie ne scay quelles parties de pouldres, de boulets & munitions, & autres semblables fa-tras qu'il auoit employees pour luy, & pretendoit les faire payer au Roy, ce qu'il n'auoit peu faire du temps de François le grand, qui fauoit la piperie qui en cela luy auoit esté faite. Pour le faire court le Duc baille des parties en mariage à sa fille, & Henry les paye. Sa debonnaireté les fit pancher de se costé, & entreprendre bien hardiment plusieurs autres choses. A cela ils adiousterent vn autre poinct, c'est qu'en s'accommodant à tout ce que l'aage de Henry pouuoit requerrir de volupté & de plaisir, ils se seruoyent de luy

comme



comme de cheual fondu ou d'eschauguette, afin de voir pl<sup>us</sup> loin. Or n'est de besoin de mettre icy en auant leurs infametez: les parois, les liets & chandeliers de l'hostel de Reims & autres leurs maisons acquises comme on verra tantost, en pourroyent rendre tesmoignage: car elles ont rougy (par maniere de dire) des paillardises, adulteres & maquerelages dont ceux de Guise ont esté les ministres & officiers.

De là ils pousserent plus outre. Car ils oferent bien con- *Ceux de*  
seiller au Roy Henry de r'enuoyer en Italie sa femme Ca- *Guise*  
therine de Medicis, & sans le Connestable & le Cardinal de *veulent*  
Chastillon, elle passoit les Monts. Eux pensans qu'elle de- *chasser*  
meureroit sterile, & desirans cela de tout leur cœur, pour *Cathe-*  
repandre leurs premieres querelles sur l'Aniou, la Pro- *rine de*  
uence & la Couronne mesmes, s'allierent par le moyen de *Medici.*  
l'un d'eux avec ceste vilaine Seneschale manifeste putaine,  
de laquelle ils se vouloyent aussi seruir comme d'une es- *Leur grã*  
ponge pour sucer la substance de ce pource Royaume. Pre- *deur fon-*  
mierement ils attirerēt chez ceste Seneschale, pour en heri- *dee sur*  
ter puis apres, ce qu'on appelle le Tilletage, c'est à dire vne *vne pu-*  
somme inestimable qui reuiert du renouvellement des *taine.*  
offices du Royaume: laquelle somme payee à vne fois  
excede toute la prodigalité des Princes qui furent on-  
ques.

Sur ces entrefaites, Monsieur de Reims, desirieux d'ama-  
sser des benefices pour mieux acheminer ses desseins, obtint  
par le moyen de la Seneschale lettres de faueur d'Henry, du-  
quel le Pape Paul troisieme ne taschoit pour lors que de  
s'acointer contre l'Empereur Charles, pour venger la mort  
de cest abominable Pierre Loys son fils: comme aussi ce  
Monsieur de Reims, que la Seneschale appelloit maistre  
Charles, ne cherchoit qu'à r'emplir ses bouges en vendant  
la faueur de son maistre. Il fut donc esleu Cardinal sur la  
fin du mois de Iuillet l'an. 1547. Cela fut cause que sous  
ombre du Cōcile de Boulogne & de tels affaires qu'il vou-  
lut imaginer, il dressa vn voyage en Italie, pour deux prin-  
cipales raisons. La premiere, pour brasser ce mariage  
avec la fille du Duc de Ferrare. La seconde, afin de se fai-  
re cognoistre à Rome, pour mieux bastir ses entrepri-  
ses à l'aduenir. Estant là, il print le tiltre de Cardinal  
d'Aniou, mais on scait en quel danger il cuida tomber  
pour

*Charles*  
*esleu Car-*  
*dinal.*

# LA LEGENDE DV

pour ceste folie, & sans la Seneschale ou Duchesse du Valentinois, il n'eust osé reuenir : tant y a, qu'il fut contraint de laisser son tiltre d'Aniou delà les monts, & changer de nom en retournant en France, & reprendre tous deux le nom de son pere. Nous l'appellerôs donc desormais (comme aussi specialement depuis la mort de son oncle il s'est ainsi nommé) le Cardinal de Lorraine.

*Traite-  
ment fait  
par ceux  
de Guise  
au Car-  
dinal Iean  
leur on-  
cle.*

A son retour, ils procurerent tant enuers le Roy Henry que la Conté d'Aumale fut erigee en Duché, afin de pousser plus auant Francois qui lors pretendoit à ce Mariage de Ferrare, celebré quelques mois apres. Lors ils commencerent à pratiquer pour se faire valoir & poser les fondemens de leur tyrannie contre les grans & petis de la France. Il faut commencer par leur oncle le Cardinal Iean, par la faueur duquel maistre Charles estoit venu du college de Nauarre à la Cour. N'ayans patience qu'il les enrichist de ses benefices par son decez, ils ne cesserent (specialement maistre Charles) de luy tirer de dessous l'aile tout ce qu'il fut possible, par vne importunité non gueres eslongnee de violéce. Ce bon neveu trouua incōtinent façon de faire enuie à son oncle de s'esloigner de la Cour, luy apostâ des seruiteurs tels qu'il luy pleut, le destitua de ceux qui luy estoient les plus loyaux, sous telle couuerture que bon luy sembla, & fit en sorte qu'il ne tint pas à luy qu'il ne le mist en chemise : tellement qu'en fin vne mort bien soudaine (car il viuoit vn peu trop au gré de sō neveu) l'emporta au retour de l'election du Pape Iules troisieme, en l'an 1550. Ce fut lors que son neveu se fit bien cognoistre à Rome, où il gaigna vn chapeau pour son frere, qui est le dernier viuant des six, nommé le Cardinal de Guise : & en ces temps aussi fut acheué & acomply le mariage de l'aisné avec la fille de Ferrare. Ayant aussi despouillé leur oncle auant qu'il s'allast coucher, considerons comment ils le traiterent apres sa mort. Or mourut il fort endebté enuers plusieurs marchâs, de Paris specialement. Les richesses de ses meubles estoient grandes & plus que suffisantes pour l'acquiter. Luy decedé, les creanciers se retirent par deuers le Cardinal de Lorraine son neveu, qui auoit avec le Cardinal de Guise recueilly tous ses benefices, mais luy seul s'estoit saisy des meubles. Il fait responce qu'il n'est point heritier. Car telles gens n'appellent pas heritier celuy qui prend les biens, & (cōme

*disent*



disent les praticiens) s'imisce en l'heritage : mais seulement celuy qui dit ie le suis. Or nul ne disoit le mot. Car le Cardinal de Lorraine vouloit auoir les biens sans payer. Ses freres ne vouloyent pas payer sans les auoir. Quant aux benefices, lon fait que (par vne rigueur de droit) ils ne sont obligez aux debtes. Si le Cardinal de Lorraine eust dit à plusieurs qu'ils ne s'attendissent d'auoir rien de leur deu, en perdant leur debte ils eussent beaucoup gaigné : car ils eussent sauué le temps & les frais qu'ils y firent à attendre par l'espace d'environ deux ans, quelle issue prendroit vn ieu qu'il faisoit iouer par l'vn de ses gens, lequel il fit commettre pour voir les debtes du defunct, les verifier, ce disoit-on, les mettre en leur ordre, & autres mots de pratique que ce commissaire auoit en la bouche. Cependant on fit faire vn inuentaie disoit l'vn, l'autre disoit vne description, & l'autre vn memoire : mais quoy que c'en fust, il ne se trouua en tous les biens du defunct, au raport & selon la conscience de son neueu que des banes, par maniere de dire, & quelques vicilles scabelles & tapisseries à faire feste. C'estoit en bref l'inuentoire de ce que le Cardinal de Lorraine ne vouloit point. Mais le plaisir estoit de l'ouir parler, si tost que ces marchans de Paris se presentoyent deuant luy, Il me semble (disoit-il) que les poux me mordent. Vne autre fois c'estoyent des Anglois, des salueurs & donneurs de bon iour. Puis quād ce venoit à chascun particulier, l'vn estoit vn vsurier de Paris, l'autre n'auoit pas liuré sa marchandise, cestuy cy l'auoit vendue six fois plus qu'elle ne valoit, cestuy-là auoit receu quelque chose dessus, à l'autre il n'estoit rien deu. C'est à dire vous n'aurez rien. Plusieurs furent de ceste rubrique. Aux plus fauoris, on disoit qu'ils aidassent à se payer. Ce n'estoit pas à dire tenez la main, mais donnez & quittez. Quand lon auoit quitté la moitié pour le moins, les deux tiers, les trois quarts & plus, encores trouuoit-on, qu'il n'y auoit rien plus contant receu que ce que lon auoit donné. Et quant à ce qui restoit, Demandez (disoit-on) quelque traité, quelque droit ou priuilege, ou quelque chose au Roy, on le vous fera doner. Mais c'estoit autant, comme si on eust dit à ces marchans, Allez, tuez chascun vn homme ou deux, & lon vous fera bailler remission. Car la vente des chaires, scabelles & tapisseries, estoit remise aux Calendes Grecques. Sur cela, deux nota-

bles marchans, entre autres, voyans vne telle indignité, apres plusieurs ouuertures, finalement offrirent acquitter le defunt pour vn quattier ou pour vn tiers du reuenu de ses benefices : mais il n'y eut iamais ordre. Les vns en ont tiré quelque quart, vn cinquiesme, vn dixiesme, plus ou moins; & la plus part rien du tout. Or de ce que lon quittoit, il falloit tous, ou peu s'en faut, bailler quittance comme de receu: on peu penser à quelle fin, assauoir pour oster aux creanciers l'honneur, & au Cardinal la memoire & la souuenance de leur liberalité. Ainsi peu a peu il se desfit de ces marchans de Paris & autres, semblables, pour combattre plus à son aise les plus grans & tous les estats du Royaume lesquels il falloit queluy & ses freres domptassent auant que pouuoir toucher le blane auquel ils visoyent.

*Leur que  
relle pour  
le Duché  
d'Aniou.* Ils auoyent tiré vne promesse d'Henry eliant Dauphin, que quand il seroit Roy, la Conté de Prouence & Duché d'Aniou retourneroyent en leurs mains. Orayans esté vnement grattez par le general de la Chesnayé, cela demeura comme assopy iusques à l'entree du Roy à Angers, car lors ils querellerent de nouueau ceste Duché, ne demandans pour lors que le tiltre pour l'vn d'eux. Mais vn seul regard de trauers du Connestable les renuersa si rudement par terre, qu'onques depuis ils n'en oserent ouurir la bouche.

*Se veulent  
faire co-  
pagnons  
des Prin-  
ces.*

Ce pendant, ils chercherent vn autre expedient, c'est de se faire compagnons des Princes tout ouuertement, & les supprimer obliquement & manifestement. En cest endroit, leurs pratiques ont esté fort longues & estranges, au possible, comme l'histoire seule de feu Prince de Condé le monstrera clairement, & nous en toucherons çà & là des particularitez dignes de memoire.

En premier lieu, d'autant que la dignité de leur sang, ny leur maison ne leur pouuoit donner auantage sur beaucoup de gentils-hommes François, ains seulement la prerogatiue de leur terres: pour couurir ce qui leur defailloit de race, ils firent eriger leurs simples Baronies en Duchez, Principautez, Marquisats & Contez, qui est ce qui iusques icy a esblouy les yeux du populaire ignorant des affaires d'estat.

En second lieu, ils tascherent d'egaler la dignité des Pairs (d'autant que le Cardinal l'estoit) à celle des Princes,

voire de preferer les Pairs aux Princes. Surquoy aduint l'an 1551. vn notable accident. La Cour de Parlement de Paris auoit enuoyé six des plus notables de son corps vers le Roy Henry pour entendre son bon vouloir & plaisir sur quelques articles, l'un desquels estoit tel.

Le second poinct est, d'entendre du Roy, s'il luy plaist que Messieurs les Princes du sang ou autres grans Seigneurs entrans en ladite Cour portent leurs espees. Car de toute antiquité cela à esté reserué au Roy seul, en signe de speciale prerogative de sa dignité Royale, qui a la main de iustice, comme estant luy-mesme la iustice, tenant en sesereté les ministres d'icelle. Et si quelque fois y sont entrez quelques Princes ou Seigneurs avec leurs espees, ç'a esté qu'ils ont preuenu, trouuant la porte ouuerte, où sont entrez par mesgarde, ou bien y sont ainsi venus par expres commandement du Roy, estant lors irrité & marry d'autre chose contre sadite Cour: dont toutesfois n'a esté faite regle ne coustume: mais au contraire le feu Roy François estant lors Dauphin, & feu Messire Charles de Bourbon, y sont venus, laissant leurs espees à la porte, & ainsi le faisoit garder le feu Roy Loys douxième. Ce iugemēt de la Cour qui prefere, selon droit & raison, les Princes à tous Seigneurs, conforme à la seance qui s'observe encotes en icelle, & aux arrets donnez contre leur propre pere, facha si soit ceux de Guise, que pour engendrer vn debat & contrariété entre le iugement du Roy & celui de sa Cour de Parlement, augmenter leur credit & s'esleuer peu à peu par dessus les Princes, ils pratiquerent sous main au lieu que le Secretaire s'accommodant à la demande de la Cour, & à l'ordre qu'elle auoit tenu, auoit en son recueil (ainsi que depuis il tesmoigna) nommé les Princes les premiers, ils furent nommez en la response apres les Pairs, comme il s'ensuyt. Le vouloir du Roy est, que quand en son absence les Pairs de France, Princes du sang, les Connestables & Mareschaux de France, iront & entreront en sa Cour de Parlement, & en la Chambre de l'audience, soit à huis ouuerts ou clos, qu'ils y puissent porter leur espees: ce que ledit Seigneur n'entend pour autre de quelque qualiré, estat ou condition qu'il soit. Fait à Fontainebleau le dernier iour d'Aoust mil cinq cens cinquante vn, signé

Henry, & contresigné du Thier.

3. Pour le troisieme poinct, ils pratiquerent vne merueilleuse ruse pour donner avec le temps prescription a la principauté qu'il vouloyent vsurper. Cefut des'allier de toutes pars le plus haut & richement qu'ils peurent, & outreplus se glisser entre les Princes, & tenir mesme rang qu'eux. A l'entree du Roy Henry en la ville de Suse, François Duc de Guise, s'ingera de marcher à costé du feu Roy de Nauarte premier Prince de la Courōne. A la premiere saille que François 2. fit en ducil de sa chambre, ledit Sieur de Guise se ietta entre deux Princes du sang, pour avec eux luy porter la queue. Pendant les regnes d'Henry 2. François 2. Charles 9. & encores auiourd'huy on a veu & voit on de quelle audace ceux de Guise eniambent par dessus les Princes du sang, lesquels ils ont opprimez & foulez aux pieds, comme no<sup>r</sup> dirons tantost, apres auoir touché encor quelques poincts seruans à descouurir leur ambition enragee en cest endroit.

4. Ceux de Guise s'estans ainsi auancez, deuindrent merueilleusement ialoux de leur grâdeur, s'attachans audacieusement à tous ceus qui faisoient teste à leur attentats. Les François reuerent tant leurs Princes, que (comme lon ne les tient iniuriez ny touchez en leur hōneur, pour chose que les Princes leur facent ou disent, aussi ils ne mettent iamais la main à l'espee cōtre eux) à nul autre quel qu'il soit, estrāger ou François, n'auiene d'outrager la personne d'un gentil-homme François, s'il ne veut sur le champ autant ou plus receuoir du gentil-homme, comme il luy en aura fait ou dit. Or tant plus ceux de Guise ont voulu faire des Princes de France, plus ont ils trouué de gens qui leur ont fait teste, specialement sous François 2. & Charles 9. & encores auiourd'huy lon voit ceste resistance durer. Mais cela se verra en son lieu. Considerons quelques exemples du temps d'Henry. Le Sieur de Rochefort puisné de la maison de la Roche-guyon fut appelé seul à seul vn iour au Iardin du Roy à Fontainebleau par François Duc de Guise, & comme en ses propos il eust bien monstré à ce Duc qu'il ne le tenoit pas pour Prince de France, il luy en fit plus ouuerte demonstration quand à la seule contenance que le Duc de Guise fit de mettre la main sur la dague, ce Sieur de Rochefort, qui n'estoit pas encores Cheualier de l'ordre, comme

comme il est, eust aussi tost la main à l'espee & le fit tenir coy. Ce que le Roy & les Princes de France approuuerent. Ceste resistance fut cause que le mesme Duc de Guise pensant bien que le Sieur de Montmorency (contre qui il auoit querelle) lequel n'estoit pas encores Marechal, né luy en feroit pas moins, attiltra vn iour le Duc de Nemours son grand compagnon & le Prince de Ferrare, en vn lieu pres du chasteau de S. Germain (quelques iours apres que le Connestable retourna de sa prison) & puis alla tirer ledit Sieur de Montmorency par la cappe en la chambre de la Royne: (les gentils hommes sauent que cela veut dire) lequel aussi tost se leua sans mot dire ny en parler à personne, sorti hors du chasteau, & le suyuit iusques au lieu attiltré, là où il luy rendit responce esgale à sa demande: & en cela ne le tint pour Prince plus qu'il faisoit auparauant: comme aussi il luy monstra depuis à Paris, lors que le Roy Charles 9. y estoit, & que l'assemblee y fut faite pour l'edict de Iuillet, sur le debat qu'ils eurent pour vne aire d'espreuiers de la forest de Compiègne, que ledit Sieur de Guise vouloit auoir de prerogatiue: mais l'aire demeura au Sieur de Montmorency. On fait comment le President Liser leur a resisté sur ce point par plusieurs fois: car vne fois en plaine audience du Parlement de Paris, fit corriger la qualité de Prince, que le Duc de Guise auoit prise en certaine cause: Vne autre fois, il maintint au Cardinal de Lorraine deuant le Roy Henry, qu'il n'estoit Prince, ny tenant rang de Prince en France. Et en vn autre voyage deuant le mesme Roy, sur vne contestation inepte que faisoit le Cardinal, luy vfa de ces termes, Mon fils mon amy, vous estes encor trop ieune, pour entendre ces matieres là, qui ne sont pas les phrases de parler aux Princes de France, adioustant ces mots, vous n'estes Prince ny esgal aux Princes, & si vous voulez prendre ce tiltre, dites nous les lieux de vostre principauté. Ce ieune fils auoit vingteinq ans passez, & estoit desia Pair & Cardinal. La mesme Cour de Parlement, par arrest, debouta le Duc de Guise le Pere, de la preséance qu'il pretendoit, à cause de sa pairrye, contre vn Prince du sang. Mais leur audace en cest endroit apparolt tout ouuertement en infinies sortes en seze ou dixsept mois que regna François 2. dont il faut icy remarquer quelques particularitez. Si tost que le Roy Henry eut la bouche close, le Duc

de Guise & le Cardinal de Lorraine emmenerent dans le Louure le Roy François 2. ses freres, les deux Roynes, laissant les Princes du sang & tous les grans Seigneurs du Royaume qui n'estoyent de leur retenue pour garder le mort: tandis qu'eux ne l'aïssoyent approcher de François 2. aucun pour parler sinon en presence de l'un deux, & avec si bonne garde, qu'ils ne le perdoyent iamais de veüe. Ils chassent alors le Connestable, faisans parler le Roy comme bon leur sembloit, desapointent ceux qui ne leur estoyent agreables. Deboutent honestement les Princes du sang de leur degre, enuoyans l'un en Flandre, l'autre en Espagne, ayans des seruiteurs secrets pres eux. Ils changent les estats & officiers de la maison du Roy, & segouernent lors avec telle violence qu'on apperceut comme en plain iour toute leur intention. Mais on verra par ordre quelles gens s'y opposerent, & par quels moyens. Car ces resistances particulieres estoyent de peu d'importance, si on les compare avec ce qui survint depuis.

Il faut voir maintenant iusques où ils ont acheminé les affaires de France par leur ambition, accompagnée d'avarice, cruauté, impieté & vilenie manifeste. Je dy donc que depuis qu'ils furent esleuez par le moyen de la Seneschale, comme ils estoyent, & leurs enfans sont encor d'un esprit remuant & peruers iusqu'au bout, ils ont persecuté toutes sortes de grans & petis du Royaume, pour satisfaire aux passions sus mentionnees. Et mesmes, quand ils n'ont eu le moyen ou auis de persecuter ceux qu'ils hayssoyent, ils se sont persecutez eux-mesmes, & ne scauroit on bonnement dire à qui ils ont fait plus de mal, ou à leurs amis, ou à leurs ennemis. Nous commencerons premierement par les outrages qu'ils ont fait à nos Roys mesmes, puis aux Princes du sang, en apres aux grans Seigneurs du Royaume, de là nous viendrons aux estats, assauior à la Noblesse, à la iustice, au peuple, au clergé, à leurs fauoris & amis, puis à eux-mesmes entr'eux: en proposant le plus sommairement que faire se pourra les choses, nous prierons les lecteurs de remarquer en leurs liures ce qui sera obmis pour le faire entendre à la posterité qui aura horreur de la misere de France, qui a tant souffert, & porté avec trop de respect maintesfois des monstres si dangereux. Par mesme moyen aussi, & comme la deduction des propos le requerra, nous  
toucherons



toucherons quelque chose de leur vertu, afin qu'on cognoisse à quelles enseignes il se faut souuenir d'eux.

Ainsi donc encor que du commencement ils ne fissent pas grand bruit, si est-ce que s'estans fait à croire, qu'ils auoyent quelque droit à la Couronne, ils s'efforcèrent de s'y faire voye par tous moyens, l'un desquels fut d'abaisser tout le monde sous leurs pieds, & s'ils n'estoyent Roys de nom, en attendant le temps, ils le furent souuentefois fait. Quant à François premier, d'autant qu'il les cognoist soit, ils ne s'auancèrent pas trop. Mais sous Henry 2. leurs cornes commècerent à sortir. Ce Roy estoit de doux esprit, mais de peu de iugement, & du tout propre à se laisser mener par le nez. Aussi en receut-il le salaire: car l'ambition de l'auarice de ceux de Guise r'emplirent de sang l'Alemagne, l'Italie, la France, la Flandres, mirent en vente comme au plus offrant les loix de toute iustice, espuisèrent les bourses des pources & des riches par infinies exactions. Par leur insolence & mal-heureuse conspiration, ils souillèrent aussi la maison Royale, dedans laquelle ils dressèrent l'eschafaut pour y faire venir les horribles tragœdies de la ruine de France, & y amoncelèrent le bucher qu'ils allumèrent depuis si fort, que les flammes & charbons en durèrent encores. Mais il faut voir cecy par le menu, en quoy nous reciterons mot à mot les plaintes qui en ont esté faites & publiques de long temps. Le grand Roy François auoit laissé la France en assez bon estat. Mais ceux de Guise voyans quel mille commoditez leur reuenoyent de la guerre, ne pouoyent ny ne vouloyent souffrir que la France demeurast en repos. Ce leur estoit vne ouuerture pour s'auancer, vêtir l'ardeur & violence de l'aîné & du troisieme, lesquels le Cardinal n'a iamais craint d'hazarder, sachant qu'en tout euenement la chose le valoit, & que s'ils estoyent plus heureux que sages, ce luy seroit vn vray moyē de s'esleuer iusques au bout: & s'ils mouroyent, leur mort seruiroit de pont pour faire passer les autres plus outre. Dauantage, ayant le principal maniement des finances du Royaume, il leur estoit bien pl<sup>us</sup> aisé de pescher en eau trouble qu'en eau claire. Outre cela, le Cardinal voyoit que par vn mesme moyen il acquerroit la faueur de ceux de la querelle desquels il deliberoit faire le profit de sa maison aux despens du pource peuple, si il dimjnuoit les forces du Roy, duquel

Il desiroit voir la Couronne sur la teste de son frere, comme les trois Couronnes Papales, sur la sienne. Finalement, ce luy estoit vn vray moyen pour hazarder le Roy, les Princes du sang, & tous ceux de la destruction desquels dependoit l'accroissement de sa grandeur. Voilà les braues occasions de la guerre tant longue & mal-heureuse par tout le Royaume, à laquelle il leur fut aisé de tourner le cœur du Roy, peu expert & desireux de nouuel honneur au commencement de son regne, sur l'ennemy iuré de la maison de France, lequel pour lors ayant (comme lon estimoit) dompté l'Allemagne, sembloit trop redoutable à ce Royaume, si lon ne rompoit de bonne heure tous les desseins qu'il pouuoit auoir. Or trois occasions se presenterent pour le bien empêcher. La premiere fut en rompart le cours du Concile de Trente, de l'autorité duquel l'Empereur se seruoit, pour du tout vnir les Allemans à sa deuotion, afin de faire puis apres en Italie & ailleurs ce que bon luy eust semblé. La seconde, en prenant la querelle de la maison des Farneses dechassez de Plaisance par l'Empereur. La troisieme en pratiquant l'armee de l'Electeur Maurice & du Marquis de Brandebourg estans au siege de Magdebourg, & grandement irritez contre l'Empereur à cause de la detention du Landgraff de Hesse; avec lesquels il y auoit apparence que le fils dudit Landgraff, & autres Princes Allemans se ioindroyent aisément. Et combien qu'il n'y eust pas vne de ces trois occasions qui fust correspondante à ce que le Cardinal a cherché de tout temps, c'est assauoir à ce qu'il fust tenu vn vray pilier de la foy Catholique: veu que la premiere mettoit le Roy & le Royaume en danger d'un interdict & excommunication Papale, & contreuenoit notoirement à la grandeur du siege Apostolique, dont il contrefaisoit le zelateur: la seconde troubloit le repos de l'Europe: la troisieme conioignoit manifestement le Roy avec les Lutheriens, & leur donoit moyē de se releuer & fortifier plus que iamais: toutesfois ce fatal ennemy de Dieu & de tous hommes, n'en voulut laisser pas vne, ains mit en teste au Roy Henry, par dessus lequel il regnoit de se seruir de toutes les trois l'une apres l'autre. De là vint la protestation contre le Concile, & puis la guerre de Parme dressée contre le Pape, à l'appetit de ce suppost de la Papauté, aux despens excessifs de ce pource Royaume, & au profit



profit du fils d'un bastard, qui en a depuis rendu le salaire, que toutes gens de bon esprit en ont attendu. De là vint la premiere source des plus piteuses & lamentables calamitez qu'ait iamais endurees la poutre France: car en fin il falut que l'apostume creuaſt, & que ces furies dressaſſent vne guerre ciuile en Allemagne, par laquelle nonobſtant que Dieu ait châtié les iniquitez de plusieurs, ſi eſt-ce que tant de maux & de meurtres s'en ſont enſuyuis, que c'eſt merueilles comme le Turc ne s'eſt encor ſeruy de ceſte planche que ceux de Guiſe luy ont dressée pour venir iusques à no<sup>r</sup>. De là s'enſuyuit le voyage d'Allemagne, où ils faillirent à leur entrepriſe, d'autant que Dieu ne permit que ce pays tombaſt en leurs pattes: mais leur cruauté fut telle, que leur propre pays de Lorraine en fit pour lors la premiere experience, receuant en ceſt endroit le ſalaire d'auoir produit de tels enfans au monde. Car en premier lieu, ils vouloyent ſe venger tellement de la Duchesse veſue de François & mere du Duc à preſent, laquelle les auoit meſpriſez, qu'aussi deſiroyent ils attrapper ceſte Duché. Pour ceſt eſfect, ils ſemerent mille calomnies contre ceſte veſue, la rendans odieuſe infiniment enuers le Roy Henry, & ne ceſſerent iamais que ſous ombre d'une protection (car aux inſignes malices, c'eſt où ils ont touſiours eu plus beaux pretextes) n'eũt prins le Duc en ſa main, eſperans bien qu'ayans vn Roy fauorable, la Duché & le Duc comme en leurs mains, le temps les feroit toucher au but auquel ils viſoyent de ce coſté-là. Mais comme Dieu eſt admirable en tous ſes faits, il eſt auenu que le Duc ny la Duché de Lorraine n'orpoint eu de plus fermes ny plus aſſurez fondemens, que ceux que les couſins de Guiſe auoyent poſez pour le ruiner. Car le Roy Henry print l'enfant en ſa garde, & depuis le fit ſon gendre, & bailla la Duché en celle de l'oncle Côte de Vaudemôr. Si on adiouſte à cela la ville de Metz, faudra il puis après vn plus ample reſmoignage? Car qu'eſt ce, que ceſte pauvre ville n'a ſouffert en peu d'annees & par dedans & par dehors, eſtant deſpouillee de ſa liberté, ſous l'ombre de la protection d'icelle, deſmembree de l'Empire, ruinee pour la pluspart, & pour le comble de ſes miſeres reduite en la ſeruitude du Cardinal, qui ſous vn nom emprunté, en a tiré tous les ans pour le moins cent mil francs, n'en laiſſant au Roy que le deſhonneur de l'auoir ſurpriſe.

sous ombre de la défendre, la charge de la garder avec despens inestimables, la perte de grand nombre de François, & l'inimitié de l'Empire, qui tous les ans renouuelle le decret du recouurement des villes de Metz, Thoul & Verdun, monstrent par là le desir qu'il a de les remettre en leur premier estat, à la premiere occasiō. Peu apres s'ensuyuit le siege de Metz, où le Cardinal craignant la peau de son frere, & voulāt l'agrandir par dessus tous, luy fit enuoyer tous les Princes & grans Seigneurs de France, pour l'asseurer, & aux despens de leur sang, esleuer iceluy comme sur les espauls de victoire. Mais quel besoin estoit-il de racheter ce trophée en offensant Dieu & les hommes? le tout aux despens de l'honneur & des finances du Roy. Combien nous à esté cher vendu ceste tant vaillante defense d'une ville estrangere, qui iamais ne nous auoit fait outrage quelconque, si on n'appelle outrage d'auoir creu trop legerement aux paroles d'un Cardinal son nourrisson, & qu'elle tenoit pour son Euesque & Pasteur? Et de faire, les François payerent bien cherement le contrechange, quand la Picardie en fut bruslee & saccagee iusques à Noyon: & sous la conduite du troisieme frere, gendre de la Duchesse du Valentinois, la noblesse François receut la plus grande playe qu'elle eust receu depuis la iournee de Pauc, estāt sans cause ny raison amenee à la boucherie plustost qu'à la bataille: car en ceste rencōtre, où cest estourdy Duc d'Aumale troisieme frere fut prins par sa faute, furent tuez deux cens gentils-hommes François ou enuiron, entre lesquels estoient plusieurs grans Seigneurs, assauoir Sieurs de Rohan, de S. Forgeu, de Nancay, la Motte, Dufseau, les Baron de Couches, & de Castres & autres Seigneurs de marque. Quand le Royaume n'auroit receu autre dommage par la conduite de ces gens, que cestuy-la, il suffiroit pour les auoir en detestation. Tost apres ceste desfaite en l'an 1552. au mois d'Octobre, s'ensuyuit le siege de Metz, d'où l'Empereur ayant esté chassé, le Duc de Guise s'attribuant toute la gloire, laquelle auoit esté achetée par les Princes & Seigneurs François, que, que le Cardinal y auoit fait enuoyer par le Roy, c'est merueille comme ils s'esleuerent lors. Mais qu'appporta l'annee suyuant, sinon deux perres redoublées & non iamais recouurables: c'est assauoir la ruine totale de Thierouenne & de Hesdin, qui estoient les deux clefs de

Picardie. Le Cardinal là dessus chantoit les triumphes de son frere aisné, se moquant des Seigneurs François, qui pour n'estre assistez estoient forcez par l'ennemy, & faisoit croire au Roy qu'il n'y auoit que leur maison propre à gouverner les affaires de paix & de guerre. Mais l'emprisonnement du troisieme es mains du Marquis de Brandebourg rompoit le fil de telles vanteries: pourtant se hastent ils de le retirer pour se pousser les vns les autres. Toutesfois ils ne voulurent desbouser pour sa rançon vn seul denier de leurs larcins, ny auoir compassion quelconque du peuple François, qui estoit rongé iusques aux os. Ils trouuerent vn autre fort honeste moyen: ce fut d'emprunter le nom de Roy, pour tourmenter tous ceux que bon leur sembla, sous ombre d'heresie, afin d'en attrapper les confiscations. Car ce n'estoit pas assez que cestuy là par sa temerité, eust esté cause de la mort de tant de grans Seigneurs & braues gentis-hommes François à l'heure de sa prise: mais il falloit encores que sa deliurance coustast la vie de ceux qui estoient demeurez de reste: voire iusques à n'espargner les femmes des bons & vertueux Capitaines, durant mesmes le temps qu'elles exposoyent leurs vies & leurs biens pour le seruice du Roy. De cecy seroit suffisamment creu le feu Sieur de Telnigny, si quelques tēps apres il n'estoit mort au seruice du Roy Henry: car durant cest emprisonnement du Sieur d'Aumale, la Dame de Telnigny fut faussement accusee d'heresie, par la subornation d'vn Sorboniste, estaffier du Cardinal, comme estoient aussi messieurs nos maistres ses compagnons, gens ignorans de tout bien & hōneur, fiers, cruels & seditieux, s'il y en a au monde, sous ombre de la Religion qui leur sert de couuerture: du tout semblables en cest endroit au Cardinal de Lorraine, qui les mettoit lors en besongne aux despens de l'honneur du Roy, lequel en estoit mal voulu de plusieurs. Enquoy se descouuroit vne autre ruse de ces gens, car ayans aux costez du Roy Henry leur esponge, assauoir la Duchesse de Valentinois, belle mere de ce prisonnier, laquelle pilloit à toutes restes, ensemble eux q auoyēt la bourse publicq à gouverner: ils despouilloient le Roy de l'amour & des biens de son peuple dont ils se reuestoyent, faisans croire que rien n'estoit bien fait que par leur conduite. Car mesmes ils furent si impudens de maintenir que leur frere d'Aumale auoit fait tres-bien son deuoir, &

que ceux qu'il auoit menez à la boucherie l'auoyent prestés trahy: tellement que la faute fut reiettee sur les morts, & le suruiuant qui n'auoit obey au commandement du Roy, qui luy manda expressémēt de ne rien hazarder, apres sa deliurance, reuint en Cour où il fut caressé par le moyen de sa belle mere autant & dauantage que l'vn des plus braves lieutenans de Roy. Ainsi se moquoyent-ils d'vn costé du Roy Henry, auquel cependant ils auoyent tellemēt osté le sens par leurs artifices qu'il n'estimoit auoir meilleurs ny plus fideles seruiteurs que lesdicts de Guise, apres le Connestable, auquel pour ceste cause ils vouloyent mal de mort, comme ils le monstrerent en diuerses sortes.

Ces guerres de Metz n'estoyent rien au pris de celles de Picardie, dont ceux de Guise estoyent les allumettes. Et tāt que le Duc de Guise & le Cardinal furent pres du Roy Henry, ce feu s'embrasa de plus en plus. Encores ne se contenterent ils de hazarder de ce costé là l'estat du Roy, qui y perdit à Therouenne & Hedein encores vn bon nombre de grans Seigneurs & gentils hommes, sans les prisonniers de marque: mais luy firent receuoir vne autre grande bastonnade en Italié. Or n'est il pas besoin que nous mesmes recitions icy tous nos dommages, perte de bataille où demeurerent quatre ou cinq mil hommes François pour la pluspart, sans les Capitaines & gētils-hommes de marque: la perte de la ville de Siene, qui a tant cousté d'argent à ce Royaume, qui a tant enseuely de François, qui a embelly Florence de nostre ignominie, qui a apporté perpetuelle seruitude & quasi totale destruction aux pauvres Sienois, à qui peut elle estre à meilleur droit imputee qu'à la ialousie de ceux de Guise qui gouuernoient tout alors (c'estoit l'an 1554. & 1555.) aimans trop mieux differer le secours promis, & mettre par ce moyen toute l'armee en desespoir, que de souffrir qu'il fust dit, que sans eux la Thoscane fust acquise au Roy, ou pour le moins contrainte à receuoir telle composition qu'on luy eust accordée.

Cependāt ils auoyent dressé des pratiques en Italié pour s'agrandir par quelque moyen que ce fust: & tousiours aux despens du Royaume, & à la confusion du Roy. Lon scait qu'ils querelent la Couronne de Naples & de Sicile, & que le Cardinal en toute sa vie abayoit apres la Papauté, se persuadant de faire de merueilleux & estranges changemens,

Il estoit vne fois Dieu en terre. Estant donc auenu le decez  
 du Pape, le Cardinal pouffé de son ambition accoustumee  
 n'alla point, mais courut au plus tost qu'il luy fut possible,  
 pour attrapper les trois courônes qu'il deueroit par vne  
 sottise esperance. Or l'experience monstra lors aux François,  
 que cest homme la trainoit tout mal-encontre avec soy.  
 Car luy estant party, incontinent l'Empereur Charles le  
 Quint & le Roy Henry furent aussitost enclins à donner  
 lieu aux meilleurs conseils de ceux qui parloyent du repos  
 de tant de pources peuples. Tellement que combien que la  
 paix ne peüst estre lors faite, si est-ce que moyennant l'auis  
 & prudence du Connestable & de l'Amiral, trefues pour  
 cinq ans furent accordees le cinquiesme iour de Feurier,  
 l'an 1556. Le Cardinal (selon sa coustume) ne vouloit fai-  
 re son voyage de Rome à ses despens, auoit assuré le Roy  
 Henry, qu'il dresserait en Italie de telles ligues cōtre l'Em-  
 pereur Charles 5. qu'on en auroit aisement le bout. Cela  
 ayant esté trouué bon par le Roy, seruit de couuerture à  
 l'ambition & auarice du Cardinal, lequel avec grandes ca-  
 pitulations (tousiours aux despens de ce Royaume) fit lieu-  
 tenant general du Roy en Italie Hercules deuxiesme Duc de  
 Ferrare: mais ses pratiques principales estoient de faire des  
 amis & creer des seruiteurs, à l'aide desquels (& des forces  
 & finances Françoises) il peüst cōquester le Papat pour soy  
 & les Royaumes de Naples & Sicile pour son frere. Or si-  
 tost qu'il fut aduertý des trefues, cela l'esmeut grandement,  
 car c'estoit la mort de tous ses desseins de ce costé là. Aussi  
 ne se peut-il contenir de dire haut & clair deuant plusieurs,  
 en passant par Neuers, que ce n'estoit pas ce que le Roy luy  
 auoit promis: & qu'il auoit bien moyen de rompre les tref-  
 ues, s'assurant de ce faire, si tost qu'il seroit venu à la Cour  
 qui lors estoit à Bloys: auquel lieu estant arriué, & ayant  
 parlé au Roy, finalement par les menees de ses agents, spe-  
 cialemēt du Cardinal Carasse enuoyé du Pape, qui fit pre-  
 senter au Roy vne riche espee, le Roy s'accorda à la rupture  
 desdits trefues, quelques raisons que le Connestable, l'A-  
 miral & autres grans Seigneurs amenassent au contraire.  
 L'instrument principal de ceux de Guise, estoit ceste Du-  
 chesse du Valentinois, laquelle leur seruoit de pont & de  
 corps & d'esprit pour les esleuer au throsne Royal, car elle  
 cōmādoit au Roy Henry, & eux cōmandoyēt à ceste cour-  
 tisanne.

## LA LEGENDE DV

tisanne. Ainsi donc ceux de Guise enuclopperent Henry en vn periure manifeste, & le Royaume en nouueaux troubles, & en la perté qu'il receut depuis en la iournee S. Laurens, prinse de S. Quentin, ruine de Picardie, & en la paix fort desauantageuse pour les François. Il n'y auoit que ceux de Guise qui esperassent gagner en ceste nouuelle: car l'aisné aspirant à la Couronne de Naples & de Sicile, se fit donner la charge d'aller rompre les tresues en Italie avec six mille Suisses, quatre mil François, cinq cens hommes d'armes, & cinq cens cheuaux legers. Chacun scait, qu'il emmena tous les meilleurs soldats qu'il peust auoir, laissant le Roy en pourpoint, & son peuple en chemise: car outre tant d'hommes qu'il emmena, les finances furent tellement espuisces par le Cardinal qui en estoit le surintendant, que finalement il en vint là, de prester au Roy l'argent de ses finances, par personnes interposees à tel interest, que son auarice a porte. Outre cela, les rolles de ce temps là & de l'annee suyuant, monstrent quelles excessiues donations le Cardinal & son frere obtindrent de la facilité du Roy, pendant que le peuple estoit foulé iusques au bout, les finances espuisces, comme dit a esté, le domaine, les receptes, les villes engagees, la guerre allumee, la frontiere de Picardie es mains du Roy d'Espagne. Car tant s'en faut que les entreprises de Henry conseille lors par le Cardinal succedassent, qu'au contraire peu de temps apres il perdit ceste lamentable iournee de Saint Laurent, où fut tue Iean de Bourbon Duc d'Anghien, le Viconte de Turaine, & plusieurs autres Seigneurs & gentils-hommes François. L'infanterie taillee en pieces pour la pluspart, le Connestable fort blessé prins prisonnier avec bon nombre de vaillans Seigneurs & gentil-hommes. Douze ou quinze iours apres la ville de S. Quentin fut prise d'assaut, où le Roy receut vne autre bien rude bastonnade. Icy ne faut passer vn tesmoignage de la bonne volonté du Cardinal de Lorraine enuers le Roy Henry & son estat. Apres la iournee de S. Laurent, le Roy se trouuant sans deniers, sans gens & sans conseil (car le mal-heur voulant que le Cardinal demeura seul apres de luy) ce reuerend au lieu de secourir le Roy de ses biës, & pour luy aider de quelque partie des deniers qu'il auoit peschez es finances, dès le lendemain de cest accident, se fit rembourser par le thresorier de l'espargne,



l'Espagne, d'une partie de quinze mil liures qu'il pretendoit luy estre due. Il n'y auoit en tout le Royaume si petit artisan, si pource citoyen, qui ne mist la main à la bourse pour secourir son Roy, & qui pour cest effect n'en fust dûremēt executé: cependant le Cardinal estoit deuenu sergēt, executant Henry au plus dur temps de sa fortune, en la plus grande necessité de ses affaires, iouant au Roy despouillé avec telle impatience, qu'il ne voulut onc attendre que le thresorier de l'Espagne eust recouuré argent, ains le contrainit d'emprunter la somme qu'il demandoit pour luy satisfaire. A lors aussi le Roy Henry obtint en don de la ville de Paris la somme de trois cens mil francs, lesquels le Cardinal mania, Dieu scait comment & à quoy elles furent lors employees. Mais cela soit dit pour espreuue simplement d'infinis semblables traits, ou lon ne fait lequel des deux a esté plus grand au Cardinal, ou d'attirer sans fin ny mesure, ou de brusler d'impatience à espuiser la France, qu'il auoit choisie pour proye conuenable à son ambition.

Mais que faisoit le Duc de Guise en Italie, tandis que la Noblesse Françoisē estoit aux prises avec l'Espagnol, pour poser (sans le voir) le fondement de la grandeur de ces mesfieurs cy? Le Duc auoir amené avec soy vne bonne troupe de Noblesse, & tary les finances du Roy, sans faire chose qui valust en Italie, sinon que pour mettre son frere en credit, & dresser des pratiques en faisant le simple, il s'en alla avec son illustre principauté prostituer la dignité d'un lieutenant general du Roy de France dans Rome, à badiner avec des prestres, & faire le bas-bout & le dernier d'une table de Cardinaux, la plus part d'eux Marmitons & gardes-finges du Pape. Surquoy on a maintesfois loué la franchise de courage d'un maistre de Requestes qui l'accompagnoit en ce voyage, lequel indigné de ce que s'ouffroit le Duc de Guise sans congé de la Gardinanté, s'assist brauement aupres du Duc, afin qu'on ne reprochast aux François que le Lieutenant general de leur Roy eust seruy de portechappe à tels papelars, & trippelippes de marmite, qui sur leur fumier font si peu decas des Roys & Princes Chrestiens. Mais quoy: il falloit qu'avec le coust & la perte des hommes, la France receut écōres ces deux iniures en Italie: l'une dudit Sieur de Guise qui laissoit son camp oiseux, & les desseins

## LA LEGENDE DV

desseins de son maistre, pour nacqueter & faire la Cour au Pape, afin de creer (ainsi que le Cardinal s'attendoit bien qu'il deust faire) des Cardinaux nouveaux à la deuotion du dit Cardinal, tant & en si bon nombre, que venant le Pape à vacquer, il se peust assurer de l'estre, autant qu'une foy Cardinale se peut estendre. L'autre iniure par l'indiscrétion dudit Sieur de Guise qui en sa personne, laissoit si honteusement auiler la dignité & reputation de son Roy, estant son lieutenant general. Les ennemis de la Couronne se rioient à gorge desployee de ceste sorte ambition, & les plus auisez François estimoyent que le Roy, & le Connestable, s'estoyent laissez aller à telles entreprises pour se descharger d'un faix insupportable qui leur pesoit sur les bras par les continuëles alarmes que l'inconstance, l'avarice & la vaine gloire de ceux de Guise donnoit aux affaires du Roy plus que les frais de deux telles conquestes. Or comme le but du Cardinal fust, si tost qu'il seroit Pape, attirer la guerre à Naples & en Sicile, ils se fussent ruinéz en ceste conqueste, ou venans à bout de leur entreprise (enquoy la France eust moins perdu qu'à les tenir en ces bras) ils s'attachoyent pour toute leur vie un cordeau au col à garder ce pays nouvellement conquis. Et comme toutes nouvelles Seigneuries sont d'elles mesmes foibles, odieuses & debiles ils rendoyent aux François l'un & l'autre Royaume plus recouurable de leurs foibles mains, que du puissant bras qui les tient de present. Neantmoins sous ce pretexte, le Cardinal grippoit à toutes restes, tellement qu'à ceste occasion & autres semblables, celuy là se iouoit à bon escient, qui renuersa si bien les lettres du nom de Charles de Lorraine qu'il trouua (ce qu'on pouuoit reprocher à ce reuerend estre tres-uray) **R A C L E' A S L' O R D E H E N R Y.** Mais nous verrons cela tantost un peu plus par le menu.

En poursuivant nostre propos, apres la perte de tant d'hommes en la iournee de S. Laurent, la prise du Connestable & autres sinistres accidens, le Cardinal voyant (ce luy sembloit) la plus belle ouuerture du monde pour auancer sa maison, desploya lors tout ce qu'il auoit en l'entendement pour executer ses desseins. Le premier fut de faire son frere Roy de fait, tandis que Henry le seroit. L'autre de lier si bien son lierre à la pyramide, que l'un fist finalement tomber l'autre.

L'autre : ce fut de moyenner vne double alliance: l'vne de sa  
 niepce Marie Stuard Royne d'Ecosse, avec François, fils ais-  
 né de Henry, & l'autre, du Duc de Lorraine son cousin avec  
 madame Claude de France; L'absence du Cōestable, qu'il  
 redoutoit & haysoit merueilleusement, luy en acruet du  
 tout la volonté. Quant au premier poinct, les affaires estans  
 ainsi brouillees en Picardie, & le Royaume desnüé de for-  
 ces, il falloit r'appeller celles qui estoient en Italie. Cepen-  
 dant le Cardinal prenoit garde que nul n'entreprist la surin-  
 tendance du maniement des affaires, s'attendant (puis que  
 le Cōestable estoit arresté) de la mettre entre les mains du  
 Duc de Guise son frere, si tost qu'il seroit de retour: le-  
 quel auoit esté en mesme temps repousé de deuant Ciuit  
 telle, de sorte que ce mandement luy vint bien à propos: &  
 luy fut enuoyé l'escuyer Scipion afin de le faire hastier & a-  
 mener ces forces avec luy. Estât arriué, le Cardinal le fit in-  
 continent enuoyer à Compiègne, pour dresser le camp: où  
 le Roy estât allé apres, declaira en presence de tous les Che-  
 ualiers de l'ordre & Capitaines de son armee, que le Duc de  
 Guise estoit venu à poinct pour la cōseruation de son Roy-  
 aume, & fut mis en auant de le faire Viceroy en France  
 mais d'autant que ce tiltre fut trouué nouueau, il fut com-  
 mandé de luy expedier lettres de Lieutenant general du Roy  
 en tous les pays de son obeissance: lesquelles furent dressées  
 par du Thier secretaire des commandemens, en telle forme  
 que le Cardinal voulut, & depuis receues & verifiées par  
 la Cour de Parlement de Paris, & autres Parlemēs du Roy-  
 aume, les Princes du sang laissez en arriere avec vn mani-  
 feste mespris: comme aussi apres la prise de Calais, ils fi-  
 rent preferer le Duc de Nemours au Prince de Condé, en  
 la charge de la Caualerie legere, & quelque an apres le Ma-  
 reschal de Brissac au mesme Prince au gouuernement de Pic-  
 cardie. Le Duc de Guise ayant ceste charge, & gens à qui  
 commander, enfloit à veüe d'oeil, & le Cardinal ioiuoit ce-  
 pendant de la harpe, endormant le Roy Henry. (parmy tel-  
 les tempestes) au giron de ceste villaine Seneschale. Neane-  
 moins Henry qui aimoit ardemment son compere le Cō-  
 nestable, & d'autre part, n'auoit pas les yeux tellement ap-  
 pesantis de sommeil, que par fois il ne les desferast, & en  
 les ouurant n'apperceust ceux de de Guise s'auancer par  
 trop, commença de s'offenser contre eux, & ne se peut tes-

nir de descharger deslors vne partie de ce qu'il en pensa plus amplement depuis, car il s'excusa enuers son compere (ainsi appelloit-il le Connestable) luy mandant par lettres secretes, qu'il auoit esté contraint de faire le Duc de Guise son lieutenant, & le mariage du Dauphin, avec plusieurs autres choses contre sa volonte: mais que le temps luy en feroit la raison.

*Mariage  
du Dan-  
phin avec  
Marie  
Stuard  
Royne  
d'Escoffe.*

Quant à ce mariage du Dauphin, il en va ainsi. Le Cardinal ne voyant personne en Cour qui luy peust contredire, étant son frere sur son retour d'Italie pour estre lieutenant du Roy, & le Connestable prisonnier, il commença à mettre en termes le mariage de sa niepce la Royne d'Escoffe. Pour paruenir à cela, il mettoit en auant que le Roy verroit aussi bien de son viuant son fils couronné que l'Empereur Charles auoit veu de son viuant veu couronner le Roy Philippe son fils Roy d'Angleterre: faisant ledit Cardinal presser l'affaire par les Estats d'Escoffe sollicitez par le Sieur d'Oysel, qui manioit en ce pays-là les affaires de la Royne douairière. Et pour faire condescendre la Royne à ce mariage, laquelle auoit tousiours dit, qu'il n'y auoit rien pressé, puis que les deux personnes estoient en la main du Roy, & que le Dauphin son fils estoit encôres bien ieune & mal sain: le Cardinal commença à se declarer cōtre la Duchesse de Valentinois, & la blasmer en tout ce qu'il pouuoit, comme ayant à desdain la memoire de son alliance, & ne se souuenant plus (ou faignant l'auoir oublié) que c'estoit l'eschelle par laquelle luy & ses freres estoient montez si haut. Cela faisoit-il, estimant que c'estoit le moyen de gagner le cœur de la Royne, laquelle hayssoit extremement ceste Duchesse & non sans cause, comme chascun sçet: de fait, cest expedient luy seruit tellement pour auancer la besongne, que sept mois après la prinse du Connestable, ce mariage fut accompli, & deslors François appelle Roy Dauphin, & messieurs de Guise par consequent oncles du Roy.

*Prinse de  
Calais  
comment.*

La prinse de Calais, dont l'entreprinse auoit esté proiettee par le Connestable, l'Amiral & le Sieur de Senarpont, augmenta le despit que le Roy Henry auoit conceu en son cœur contre le Duc de Guise. Ayant entendu plusieurs fois la facilité d'executer l'entreprise, il y voulut aller en personne: mais le Cardinal voulant desrober pour sa maison le cœur des François en fit destourner le Roy, & donner la

charge

charge au Duc de Guise, qui neantmoins en fit telle difficulté, tenant l'exécution pour impossible, qu'il vint iusques à protester (tant il estoit hardy) que ce qu'il en faisoit, n'estoit que pour obeyr au tres-expres commandement du Roy, qui ne cessoit d'insister au contraire, & dire qu'en cela n'y auoit difficulté quelconque. Aussi voyant qu'on en chantoit les louâges du Duc de Guise par tout le Royaume, il ne se peut contenir de dire qu'on luy auoit tauy vn honneur qui à luy seul appartenoit.

Au reste, sous les choses qui auoyent la plus belle apparence au dehors, le Cardinal cachoit tousiours des desseins *La paix faite avec le Roy d'Espagne.* estranges pour agrandir sa maison par la ruine de France. Il nourrit les guerres de Picardie & Italie, rompt les trefues, gouuerne tout avec son frere, pour satisfaire à son ambition, & se faire le chemin pour passer plus outre: mais cela ne suffisoit. Il faut donc tenter quelques autres moyens. Là dessus, la Duchesse de Lorraine mit en auant le propos de la paix avec le Roy Philippes: ce que le Cardinal prenant à son auantage, comme nous verrons tantost, se fait donner la charge d'aller trouuer ceste dame, afin de descouurir quelque nouveau moyen, qui fut tel: l'Euesque d'Arras, maintenant appelé le Cardinal Granuelle, s'estant trouué comme député du Roy d'Espagne en ceste entreueüe, dit entre autres choses, que le Royaume de France estoit infecté de Lutheriens, & mesmes de grans Seigneurs, entre lesquels fut nommé le Sieur d'Andelot, il adiouta qu'il y auoit des Princes aussi, qui par ce moyen espioyét la Couronne, à laquelle ils pourroyent aisément atteinre à l'aide & faueur des Protestans, comme il auoit nagueres descouvert. Ce propos ne tomba en terre: mais le Cardinal desirant dresser lors quelque pratique, descouurit à Granuelle ce qu'il sauoit de quelques offres faites au Roy Henry par les Princes prorestans, & des allees & venues sur ce faites entre le Roy de Nauarre & eux. Or mettoit-il cela en auant pour ouir l'autre, & sachant que si on ne trouuoit occasion de remuer mesnage en France mesmes, ses desseins se romproyent, & sa maison iroit par terre. Granuelle d'autre part, considerant de quelle importance, pour les affaires de son maistre, estoit la rupture de ceste intelligence avec les Protestans, pose ce fondement de la paix avec le Cardinal de Lorraine, que leurs maistres estoient si forts tous

## LA LEGENDE DV

deux, que si l'un ruinoit l'autre, quelque tiers auroit bon marché du victorieux, que partant il falloit necessairement les accorder, de sorte qu'avec toutes leurs forces, ils courussent sur ces Euangeliques, pour se recompenser de leurs pertes, faisans premierement mourir ceux qui seroyent sous l'obeyssance de ces deux Roys, sans espargner personne. Le Cardinal pensoit là dessus, que les Princes & Seigneurs de France, chargez d'estre Lutheriens, estans morts, le Roy & le Royaume seroit d'autant afoibly, pour l'auoir en sa maison, à meillieur conte. Cependant, les confiscations seruiroyent pour gagner les seruiteurs & amis. Mais ce qui luy fit embrasser cest affaire de plus grand courage, fut que Grâuelle luy dit, qu'il ne cognissoit Cheualier ny Capitaine au monde tant honoré & respecté, ny plus digne de ceste charge que le Duc de Guise. Car alors il commença à aualer des pays & Royaumes tous entiers par vne sorte esperance, se persuadant de faire son coup avec le plus beau pretexte du monde, asauoir le zeile de la religion. Mais tout cela estoit la ruine de Henry, & de l'estat de luy & de ses successeurs. Car depuis que le Cardinal eut planté cest axiome au cœur de nos Roys qu'il falloit forcer les consciences, ne tenir la foy aux Heretiques, a ce pas esté le moyen de faire deux terribles coups. L'un d'attirer à soy les grâs Seigneurs Catholiques, spécialement le Conestable, & autres bien affectionnez à la France, afin de luy estre comme bourreaux pour se couper bras & iambes en persecutant leurs cōcitoyens. L'autre de faire mourir les Princes, plusieurs grâs Seigneurs, vn nombre infiny de noblesse & de bons François, qui rendoyent la Couronne imprenable & redoutable à tous ses ennemis. Mais sous ces deux coups sont cachees tât de ruses & pratiques qu'il est impossible de les reciter toutes, nous en mettrons en auât quelques vnes, pour faire que les lecteurs se remettent les autres deuant les yeux, & se souuënent que depuis que le Cardinal eut trouué ceste ouuerture, iamais Henry ny ses successeurs n'ont eu repos, pour auoir creu vn si pernicieux conseil, qui a esté la ruine aussi du Cardinal & de la pluspart des siens, & qui infalliblement accablera sa maison: Dieu iuste iuge voulant qu'en la fosse que cauent les meschans, eux mesmes tombent les premiers, & qu'ils soyent attrappez au piege par eux tendu, & estranglez du cordeau qu'ils auoyent filé pour les autres.

Pour



Pour conclusion, la paix fut faite, au grand desauantage de la France : mais le Cardinal ne se soucioit à quel pris ce fust, pourueu que cela seruist à son proiect. Le premier article portoit, que les Roys procureroyent de faire tenir vn Concile general pour assoppir les heresies, c'est adire, apres que le Pape & les siens auroyent fait la cōclusion, on courroit sus de tous costez aux Lutheriens : en quoy le Duc de Guise seroit des premiers employez. Quant aux autres articles, plusieurs ont asseuré que le Cardinal estoit si bō seruiteur du Roy d'Espagne, que plusieurs passerent en sa faueur, sans peu ou point de resistance. Et cōbien que le Cōnestable & le Marechal de S. André luy fussent donnez pour adioincts, si eist ce que luy & Granuelle procurerent bien fort le profit de l'Espagnol. Quant au Cōnestable, encores qu'il apperceust le tort qu'on faisoit à son maistre, & descouurist aucunement le but du Cardinal, toutesfois pour le desir qu'il auoit de reuenir en France, pour reprimier, par le credit qu'il auoit enuers Henry, l'ambition desdits de Guise qu'il voyoit prendre vn trop haut vol, & dont les effects s'estoyent demonstrez en la pratique du mariage de leur niepce, & craignant que ce feu ne s'embrasast, tellement qu'en fin lon n'y peust remedier, se laissa aller en ceste negotiation. Le Marechal de S. André n'estoit pas homme qui s'osast opposer au Cardinal: car estant parueniu en hōneur par les moyens que chascun scait, il ne faut trouuer estranges s'il auoit l'esprit seruite & le cœur bas. Or combien que le Cardinal n'ignorast point la grande affection que le Roy portoit à son compere le Connestable, & que ce seroit le plus secret conseiller, si tost qu'il seroit en Frâce, neantmoins estimant ceste paix le plus brief chemin de la course de ses pensees, il en poursuyuit la publication.

En ce temps, ceux de la Religion fauourisez de plusieurs grans Seigneurs & iuges de ce Royaume, commençoient à leuer la teste. Le Cardinal empoigne incontinent ceste occasion, pour acheminer ses desseins. Sa deliberation fut d'intimider les iuges equitables, descouurir les mieux affectionnez, ou pour en triompher en les destournant de leur constance, ou en les extermināt, mettre de ces creatures en leur place pour gouverner puis apres à son plaisir, & descouurir tout par leur moyen. Passant plus outre, il

*Poursuite  
du Cardi-  
nal cōtre  
ceux de la  
Religion.*

## LA LEGENDE DV

voit que ceux de la Religion la quitteront ou la maintiendront. S'ils la quittent, ce sera pour les asservir & escocher plus à loisir. S'ils la maintiennent, ce sera sous la faueur des grans, lesquels par consequent seroyent reculez de la Cour & de toutes affaires. Luy donc & ses freres en auroyent tel maniemment, qu'en fin nul ne leur oseroit contredire. Outreplus, il s'asseuroit d'irriter tellement le Roy Henry à l'encontre des plus grans mesmes, que la place demeureroit vuide à luy & à ses freres de Guise. Et pensoit que c'estoit là vn fort honneste moyen pour donner croc en iambeau Connestable, d'autant que ses neveux de Chastillon estans arrachez de luy à cause de la Religion, & le Roy de Navarre & le Prince de Condé aussi, il ne seroit pas si fort.

*Le Cardinal s'attache au Parlement de Paris.*

Là dessus, il rue vn de ses plus grands coups contre la Cour de Parlement de Paris, s'adressant en premier lieu au President Seguier, qui estoit allé en Cour pour impetrer le payement de quelques gaiges deus à luy & à ses compagnons. Car ayant fait sa harangue au Roy, le Cardinal s'auance & dit, Je croy qu'on ne veut empescher vos gages, pourueu que vous vous portiez fidelement : & apres auoir fierement reproché à tout le corps du Parlement, leur conuenance en la confection des procez de ceux de la Religion, les fit tancer par le Roy, & commander d'assembler la Mercuriale, qui estoit le filé pour attrapper les plus hardis. Et de fait, ayant desia beaucoup de seruiteurs en ce Parlement, à leur rapport il enflamma tellement le Roy, qu'il voulut s'y trouuer en personne, & apres auoir ouy discourir chascun à son tour, fit emprisonner du Bourg & autres Conseilliers. Ainsi s'attacha le Cardinal à la plus belle perle de la Couronne de Henry, en faisant (sous ce beau pretexte de Religion) que la plus notable compagnie qu'on sauroit voir, se soit peu à peu (pour la plus part) conuertis en vne troupe d'esclaues, qui n'ont rien d'honorable que la robbe & l'apparence exterieure. Et entre tous les maux que le Cardinal à fait à la France, cestuy-cy en est l'vn des principaux.

Aussi, Dieu iustement irrité contré les confusions qui commençoient lors à prendre pied, specialement l'Atheisme, la Magie, l'iniustice, les paillardises & infametez abominables, commença à executer des iugemens, desquels ceux de Guise se seruirent pour brouiller d'auantage les affaires.

faïres. Ce fut la mort soudaine de Henry, lequel estoit des-  
tenans à courir la lance avec le Duc de Guise, qui l'imita à  
ce coup, duquel il fut blessé à mort.

Nous auons veu comment par les guerres de Picardie & *Deporte-*  
Italie, ceux de Guise affoiblirent l'estat du Roy Henry. Vo- *mens de*  
yons maintenant quelques vns de leurs departemens enuers *ceux de*  
la personne de ce Prince, tant en sa vie comme en sa mort. *Guise en-*  
Ce Prince estoit d'un naturel paisible & benin, cōme chas- *uers la*  
cun scait, mais en peu ils se changerent merueilleusement. *personne*  
son naturel, tellement que s'il eust vescu plus longuement, *du Roy*  
la paix avec le Roy d'Espagne engendroit de terribles tra- *Henry.*  
gœdies dans le Royaume. Auât qu'il fust Roy, le Cardinal  
luy auoit esté dōné pour Gouverneur, mais il ne seruit qu'à  
le corrompre & gaster, luy seruant de Marquereau & serui-  
teur d'amour. Les pierres, cabinets & tapisseries de l'hostel  
de Reims (où infinies paillardises se sont commises) en par-  
lent encor. Et ne se contentans de tenir pres de luy la Du-  
chesse de Valentinois au grand despit de la Royne, desbau-  
choyent par autres petis seruiteurs les dames & damoiselles  
de tous costez, afin que par si mal-heureux moyens il gaig-  
nassent la faueur de ce Prince en ruinant son ame. Nous ne  
parlerons point de l'ord & sale adultere qu'ils luy firent  
commettre à son rerour de Piedmont, luy estant encores  
Dauphin, ny de ce qu'ils luy ont comme amené celles qui  
leur touchoyēt de plus pres pour en faire à son plaisir: c'est  
à dire, se polluer de façons estranges. Quant le Cardinal se  
despitant cōtre le Duc de Guise son frere à dit maintes fois,  
que iamais Cocu ne chanta belle chanson, que lon estime à  
qui il regardoit. Peut estre que Henry auoit des compa-  
gnons, mais c'estoit le premier perdu en ces ordures par  
l'entremise de ceux-cy. De là vint que pour le ruiner du  
tout & de corps & d'ame, tost apres son auenement à la  
Couronne, furēt par eux introduits mille moyens d'entre-  
tenir ce Prince en lasciuetez, & en le destournant de Dieu,  
mettre tout en troubles par succession de tēps pour pescher  
mieux à leur aise. Mais il en faut considerer quelques par-  
ticularitez. La Royne Catherine de Medicis demeura sterile  
quelques anneés, dont le Roy Henry estant encores Dau-  
phin estoit fort desplaisāt. Ces messieurs cy là dessus, apres  
leur auoir mis en main leur Seneschale, taschoyent à faire  
que Henry s'enuoyast sa femme en Italie. Et vne fois à

Rossillon sur le Rosne, ils en tindrent vn grand parlement, deliberez de faire enuoyer ceste Roynie, qui fut bien aydee par le Cardinal de Chastillon depuis en ce mesme fait. A lors faisoit-elle de la Chrestienne, ayant la Bible souuentefois sur sa table, y lisant & faisant lire. D'autrepart estant auenu que par le commandement du grand Roy François, trente Pseaumes de Dauid furent traduits par Marot, & mis en musique par diuers musiciens: car le Roy & l'Empereur Charles le Quint priserent ceste translation par paroles & presents. Mais si personne les aimâ & embrassa estroitement & ordinairement pour les châtei & faire chanter, c'estoit ce ieune Prince Henry lors Dauphin, de maniere que les bons en benissoient Dieu, & ses mignôs & la Seneschale mesmes faignoient les aimer, & luy disoient, Monsieur, cestuy-cy ne sera-il pas mien? vous me donnerez cestuy là, s'il vous plait. Lors il estoit bien empesché à leur en donner à sa fantasie & à la leur. Toutesfois il retint pour luy le 128. Bien heureux est quiconques sert à Dieu volontiers, fit luy-mesme vn chant à ce Pseaume, lequel chant estoit fort bon & plaisant & bien propre aux paroles. Le chantoit & faisoit chanter si souuent qu'il monstroir auoir vn grand desir d'estre benit en lignee, ainsi que la description est faite en ce Pseaume. Quelque temps apres, la Dauphine commença à auoir des enfans: mais Henry au lieu de recognoistre vn tel bien, se laissa aller apres ses ordures avec ceste vilaine Seneschale, & fit pis que deuant: tellement aussi que ceste benediction fut (à peu que ie ne die) conuertie en vne horrible malediction. A quoy le Cardinal de Lorraine fut vn instrument fort propte. Car voyant que Henry prenoit plaisir à ces saincts Cantiques, lesquels fortifient la chasteté, & sont ennemis capitaux de toute ordure: que par succession de temps il aimerait mieux sa femme, & r'enuoyeroit sa putaine, & par consequent, le credit de messieurs de Guise, fondé sur vn si sale appuy, s'en iroit bas, commença premierement à blasonner la translation, & finalement les Pseaumes mesmes, subrogeant au lieu les vers lascifs d'Horace, & les folles chansons & amours execrables des Poëtes François qu'il mit en credit. Alors Ronsard, Jodelle, Baif & autres villains poëtes commencerent à entrer en credit: & Dieu aussi ne voulant pas que son nom demeurast plus long temps ainsi prophane, retira ses louanges pour les

mettre en la bouche des petits. Les Pseaumes & Marot furent banis. Toutes sortes de vilaines chansons & lasciuue musique vint en auant, par l'entremise principale du Cardinal, Mecenas de ces vilains brouillons. Et pour acheuer la besogne, apres auoir fait oster par la Seneschale au Roy toute sainte musique, osté à la Royne son cōfesseur Boteiller, qui pour lors preschoit purement, il bailla a Henry vn sien docteur Sorboniste, homme ignorant & meschant iusques au bout, & par ce moyen luy attracha du cœur ce peu de semence de pieté qui y pouuoit estre. Depuis il se firent compaignons de Henry, & specialement estant Roy, voire en plus de sortes que l'honnesteté mesmes ne le permet. Et de remuer icy telles ordures, ce seroit trop ennuyer, les lecteurs. Que ceux qui se souuiennent du temps escheu depuis l'an 1550. iusques à la mort, se proposent avec moy deuant les yeux les meschans tours que ceux de Guise ont fait à ce pource Prince, ruinans son ame, entretenās l'adultere en son sein, se portans si indignement en sa maison que ie voudroy n'en auoir iamais ouy parler: & les tableaux qui en ont esté faits, & presentez au Cardinal mesmes, ses contenancees & façons de faire l'ont monstré suffisamment. Quel bien ont-ils fait à la Royne? mais quel mal ne luy ont ils fait? Henry laissa quatre fils viuans. Comment traitèrent-ils François? Nous le verrons maintenant. De quelles confusions auons nous esté agitez par leur moyen sous le regne de Charles. Si le Cardinal viuoit, cōment eust-il manié Henry troisieme par le moyen de la Royne Louyse de Lorraine? A-il aimé le Duc d'Alençon? au contraire, il luy osta au départ du Roy de Pologne, la lieutenance, pour la faire assigner à son neveu le Duc de Lorraine, & gouuerner sous ce pretexte encor plus audacieusement que iamais. Mais ces torts demandent vn plus exacte discours que nous verrons. Ainsi donc, s'estās moquez d'Henry & de tous les siens, ils ont emply sa maison d'ordure, son Royaume de troubles, ruiné les grans, accablé les petis, & mis les choses en telle confusion, que selon les hommes il n'y a esperance que le Royaume puisse estre restauré & ramené à quelque petite partie de son ancienne splendeur. Dès le viuant de ce Prince aussi commencerent ils à marquer ses seruiteurs qui leur desplaisoyent, faisans escarter les vns, mettans les autres en mauuaise grace, osans d'alentour du Roy ses bons conseil-

lets, y introduisans leurs mignons & esclauces, par le moyen desquels ce Prince estoit persuadé, que messieurs de Guise estoient ses plus fideles seruiteurs, semans les diuisions entre les Princes & grans Seigneurs, pour en attirer les vns de leur costé & ruiner les autres tant plus aisément puis apres. Toutes les particulatitez se verront en leur ordre cy apres, où ces torts se cognoistront clairement. Pour ceste heure, nous dirons ce mot, qui sera approuué de tous vrais François, qu'en si peu de temps que Henry a vesçu, il leur a fait plus de biens que nul autre Roy precedent ne fit onques, par tout vn siecle à tous ses seruiteurs ensemble: il a plus souffert, comporté & enduré d'ennuy, de fascheries, de mauvais deuoit, de pertes & dommages d'eux, que maître, amy ne pere n'endura onc de seruiteurs, compagnons ny enfans. Car outre ce que de son viuant, ils luy ont tourné le dos vne infinité de fois, & fait perir son corps & son ame, entant qu'en eux a esté, ils ont souillé sa maison, gâté ses enfans, ruiné son peuple, & à sa mort ils ont bien monstré comment ils l'auoyent respecté en toute sa vie. Nous auons veu cy deuant que leur aîné sentant la mort du grand Roy François s'approcher, se moquoit de luy, & l'appelloit galant. Eux tous n'en ont moins dit, & monstrerēt beaucoup plus de signes desiouissance & de leur meschant cœur en la mort d'Henry, leur plus grand amy, leur Seigneur & bienfaiteur. Quel spectacle fut ce aux François pleurans la mort tant inopinée de leur Prince, de voir le Duc de Guise & le Cardinal de Lorraine à l'heure mesme de ceste mort enleuer à face riante leur ieune Roy & neveu, & le transporter des Tournelles au Louure. Quelqu'un aussi alors ne dit pas trop hors de propos q̄ ce iour-là se deuoit appeller la veille de la feste des trois Rois. Car il n'y auoit personne qui voyant ces messieurs aussi à cheual, ne iugeast que la France auroit vn Roy heritier, Roy de nom seulement, & deux Roys de Lorraine par effect, ou plustost deux fins & cruels tyrans, comme ils se firent bien cognoistre tels depuis. Au reste, c'est l'estat des grans Chambellans, d'auoir soucy du corps mort d'un Roy iusques à ce qu'il soit en terre. Le Duc de Guise l'estoit, & avec violence auoit arraché cest estat à la maison de Longueuille Qui empeschoit ce Duc & son frere le Cardinal, qui auoyent vn Roy à leur deuotion, &, s'il faut ainsi parler, à leur commandement.



de faire leur deuoir, & non pas sur l'heure mesme l'abandonner comme vn charongne? que peut-on dire d'eux d'auoir ainsi honteusement destourne leur visage du corps de leur Roy & Seigneur? l'ayans laissé sans soin & soucy de sa garde & sepulture, pour laquelle le Connestable & le reste des bons & fideles seruiteurs demurerent. Encores, s'ils eussent attendu que le corps eust esté refroidy & asseurement mort, ou pour le moins s'ils eussent fait quelque contenance de regret. Mais peut estre ceste inhumanité proceda de ce qu'ils entendirent que le Roy Henry auoit atrellé de les chasser apres les festes & tournois: ou plustost leur ambition ne permit pas qu'ils attendissent plus long temps à descouurir ce qu'ils machinoient en leurs cœurs, assauoir de regner sous le nom de leur neveu François second, en attendant l'occasion de passer plus outre.

Mais à l'aventure se sont-ilz mieux portez à l'endroit de François 2. & pourroyēt ils auoir si bien fait, que les fautes precedentes meritoient d'estre couuertes. Voyōs si ainsi est. Ce ieune Prince aagé de 16. ans pour le pl<sup>r</sup>, ne regna pas dixsept mois entiers. Mais on peut dire sans mentir, que iamais Royaume en l'espace de 17. ans ne fut esbranlé de la sorte que nostre pource France, le tout par l'ambitiō de ceux cy. Et puis affermer que si pour le iuste chastiment de nos pechez, Dieu eult encor allongé de 17. autres mois le regne de François second, la maison de Valois perdoit la Couronne tout quitte, & la Noblesse Françoisise se pouuoit préparer à la mort ou à des indignitez estranges. Le peuple la iustice & le Clergé mesmes ne pouuoient attendre qu'une horrible tyrannie. Et afin que cela se voye plus euidement, considerons comment ils manierent le Royaume en cest espace de 17. mois. Premieremēt ils rauirent le Roy des mains des estats du Royaume & des Officiers de la Couronne, l'emmenans (en la mesme heure que son Pere deceda) dans le Louure avec ses freres, sa mere & sa femme. Là ils le garderent si bien, que personne ne pouuoit approcher de luy que quelqu'un de ceux de Guise n'y fust present. Et lors aussi furent ils appelez Gardes du Roy. Chassent le Connestable & plusieurs autres, enuoyent les Princes du sang, l'un porter l'ordre en Espagne, & l'autre pour conduire madame Elizabeth, l'autre en Flandres pour la confirmation de la paix: & finalement les traiterent, comme

*Comment  
ils se sont  
portez à  
l'endroit  
de François 2.*

nous verrōs, quād il sera parlé de leurs deporttemēs enuers plusieurs Princes du sang. Prēnēt ou pluſtoſt rauiffēt à eux le maniemēt de toutes les affaires: car les Parlemens ayans enuoyé vers le Roy leurs deputez, il leur fit entendre, que ſes deux oncles le Cardinal de Lorraine & le Duc de Guiſe auoyent la charge entiere de tout: & commāda que lon s'adreſſaſt dēs lors en auant à eux en tout ce qui concernoit le ſeruice de luy & de ſon Royaume: & qu'on leur obeyſt cōme à luy meſmes. Les voila declairez Rois par leur organe: car ce ieune Prince, nullemēt experimēté & miſerable ſpecialement pour auoir ſi meſchante compagnie, ne diſoyt ny ne faiſoit que ce qu'ils vouloyent: car le Cardinal l'auoit tellement accouſtumé à ſes ſignes, qu'à la moindre de ſes conſenances le Roy parloit, marchoit ou ſe taiſoit: tellemēt qu'aussi l'appelloit-on l'ame du Roy, car à la verité il le faiſoit mouuoir & tenir telle mine que bon luy ſembloit.

Ayans eſcarté les Princes & Seigneurs qui leur eſtoient ſuſpectſ, conſiderons comme ils rengerent le reſte. Quant au Conſeil priué, apres s'eſtre aſſeurez du Chancelier Oliuier qu'ils rappellerent, & qui lors oubliā tant Dieu & ſoy-mesmes, qu'il leur donna ſa conſcience, ils y firent entrer ceux de qui ils ſe floyent. Dēs le temps d'Henry, les Parlemens s'eſtoient r'emplis de gens qui auoyent apporté le plus d'argent de ſolliciteurs, & de fauoris des grans. Ceux de Guiſe, voyans bien qu'il ſaloit auoir à leur deuotion ces gens-là, y auoyent fait entrer peu a peu les enfans des plus grans vſuriers & exacteurs, & autres manieres de gens qui auoyent corrompu tout droit diuin & humain, vendu par le menu ce qu'ils auoyēt achetē en gros ou eu pour recompense, declairé les ſecrets de la Cour, contre leur ſerment, & villenē la iuſtice en toutes ſortes. Pourtāt fut-il aiſé à ceux de Guiſe de renger ces cours à leur deuotion, tenant les vns en bride, & rempliſſans les autres de tres-grandes eſperāces. Ce qui auoit eſté pratiqué en ceſt endroit du viuār de Henry, fut encor par eux plus chaudement pourſuiuy ſous François ſecond, tellement qu'aussi depuis ils eurent vn grand appuy de ce coſté là. Ils ſe mirent aussi à dreſſer les eſtats de la maiſon du Roy, vſurpans ce qui appartenoit au Conneſtable, encores grand Maiſtre pour lors. Pour y faire entrer leurs ſeruiteurs & gens de tour à leur poſte, ils oſtent partie des officiers du ſeu Roy, qui de tout temps eſt oyēt con-

tinuez de pere en fils, les laissent, sous ombre de bon ménage, comme aussi ils renuoyent partie des autres en leurs maisons avec demy gages pour pension, cōbien que l'estat nouveau des officiers domestiques qu'ils establissoyēt, excedaist de beaucoup l'autre nombre. Les Prouinces du Royaume & les villes de frontiere furent aussi garnies des leurs, & ceux qui n'estoyent à leur gré, rēuoyez en leurs maisons: fut mandé à tous Gouverneurs Chefs de guerre & des villes d'obeyr au Duc de Guise, comme au Roy mesmes. Les finances pareillement furent maniees par les plus fauoris du Cardinal, & furent auertis tous les Parlemens qu'il auoit la superintendence des affaires d'estat. Pour demeurer seuls armez, font defendre tout port d'armes, specialemēt les pistoles & bastons à feu: & les longs manteaux & grosses chosses. Le Cardinal fort couard de nature, auoit scēu d'un Necromātien à Rome, qu'il seroit tué d'un bastō à feu par l'enuie qu'ō luy porteroit, & pour les ennemis qu'il acqroit en France, estant esleué au plus haut degre d'honneur.

Le premier trait de leur tyrānie fut de persecuter ceux de la Religion en la personne de certains Conseilliers du Parlement de Paris, specialement d'Anne de Bourg, au procez duquel amplement descrit en diuers traitez & discours, specialement en l'histoire de François second, depuis quelques mois remise en lumiere, apparoiſſent des iniustices & meschancetez si vilaines que rien plus, commises par les iuges appostez par le Cardinal. Vn autre trait fut de bāder le peuple contre les grans, par le moyen qui s'ensuit. Pour abatre ceux qui leur pouuoient faire teste, & s'acquérir la bienueillance du commun, & rendre leur gouuernement agreable, ils firent dresser lettres de reuocation de toutes alienations faites tant à vies qu'à temps, fust pour recompense de seruicēs ou autrement excepté les venditions: dont les deniers auoyent esté employez aux grans & vrgens affaires du Roy, sans aucun desguisement, ensemble l'appanage des filles de France, & le dot de la feu Royne Eleonor, duquel iouissoit l'infante de Portugal: le reste reuny au domaine & receptes ordinaires du Roy. Cela estoit pour faire les passer plus grans par leurs mains, & se faire des seruiteurs plus que iamais, en leur faisant auoir lettres de declaratiō telles qu'il leur plaisoit. 3. Le troisieme fut de faire chasser le Roy de Nauarre premier Prince du sang, par les plus indignes

## LA LEGENDE DV

dignes moyens que lon scauroit, & dõt il sera parlé au discours du traitement par eux fait aux Princes du sang. 4 Ils arrachent au Connestable l'estat de grand-Maistre, pour le Duc de Guise, & achetât le Marechal de Brissac par le gouuernement de Picardie, qu'ils tirerent des mains de l'Amiral de Chastillon. 5 Pour se renforcer contre les appareils que lon dressoit contre leur tyrannie, font dixhuiet Cheualiers de l'ordre tout d'une volee, & d'une marque de cheualerie bien esprouuee & sans reproche font un colier à toutes bestes. 6 Moyens que cela ne suffisoit, & qu'avec le tēps il y auoit danger q̃ les estats ne demandassent leur ancienne liberte, au moyen dequoy leur tyrannie donneroit du nez à terre, premierement ils firent trouuer le plus mauuais du monde au Roy le bruit qui couroit, que lon estoit delibere en ce basage du Roy de demander les estats, & ce par diuerses ruses, la principale desquelles fut d'intimider les plus grans par quelque notable moyen, & gagner tellement la Roynie mere qu'elle fust l'instrument pour ruer ce coup. Ils proposerēt donc à ceste femme qui d'ailleurs estoit tenailllee des fers aidans de son ambition, que si les estats auoyent lieu, comme les ennemis de sa grandeur le desiroient, on l'enuoyeroit faire des iardins, si elle ne passoit les monts. Partant luy conseillent (comme ses bons seruiteurs) d'y auiser. Or ne regardoyent ils pas à elle, car si le Roy François eust surueueu au Roy de Nauarre & au Prince de Condé, qu'ils estoient resolu de faire mourir peu auant les estats tenus à Orleans, ils l'eussent fait desloger plus viste que le pas, car son esprit & naturel leur estoit suspect à merueilles. C'estoit donc à leur commodité qu'ils visoyent. Mais ceste femme feignant ne voir rien en leur finesse, monstra qu'elle estoit tout cela, & pour s'affermir aussi de plus en plus, & leur iouer à eux mesmes quelque bon tour, escriuit au Roy d'Espagne son gendre, se plaignant du Roy de Nauarre & des Princes, comme s'ils eussent voulu (par le moyen des estats) la reduire à la condition d'une chambriere. Peu de temps apres arrinē le paquet d'Espagne, contenant que le Roy Philippes auoit entendu, que certains mutins & rebelles s'efforçoyent d'esmouuoir des troubles, pour changer le gouuernement du Royaume, qui auoit esté si sagement estably de bon nombre de Conseillers, par le feu Roy Henry son bon frere & beaupere, & cōme si le Roy son beaufretere n'estoit

N'estoit capable de luy-mesme de l'administrer, & en bailler la charge à ceux qui bon luy sembleroit, sans y interposer autre consentement ny recevoir loy de ses suiets, ce qu'il nedenois aucunement souffrir. Que de sa part il employeroit volontiers toutes ses forces à maintenir l'autorité de luy & de ses ministres, voire luy cousteroit sa vie & à quarante mil hommes qu'il tenoit prests, si aucun estoit si hardy d'attenter au contraire. Car il luy portoit telle affection (disoit-il) qu'il se declairoit tuteur & protecteur de luy & de son Royaume, comme aussi de ses affaires, lesquelles il n'auoit en moindre recommandation que les siennes propres. Voila comme l'ennemy hereditaire de la Couronne de France estoit appelé à la defense de la tyrânie. Plusieurs ont trouué telles lettres plainnes d'audace merueilleuse, qu'un Prince estranger osast ainsi ouuertement en presence de tout le Conseil priué (où ces lettres furent leues, & à la barbe du Roy de Nauarre mesmes) abolir la liberté François, & renuerser l'autorité des estats. Mais il auoit esté aueruy par ceux de Guise de tout l'estat des affaires, & si les choses eussent succedé comme elles commençoient, il eust eu sa part à la piece avec les autres. Pour l'heure, ces lettres de l'Espagnol eurent autant d'efficace que ceux de Guise vouloyent: car le Roy de Nauarre commença à les bonnetter & chercher de soy-mesmes les occasions de s'en retourner garder son pays. Mais pour le mieux pourmener, la commission luy fut donnée de mener Elizabeth sœur du Roy, mariée à l'Espagnol: & le Cardinal de Bourbō & le Prince de la Roche Suryon pour adioints, afin de la rendre sur la frontière de France & d'Espagne.

Or voyans que tant plus ils cuidoyent s'auancer en ruinant l'estat, plus onuroyent-ils la bouche aux vrais François leur dessein fut de se fortifier en gaignant de nouveau les Parlemens, les Ecclesiastiques & les gēs de guerre. L'auancement de la Religion & l'accroissement de ceux qui en faisoient profession estoit vne belle couuerture au Cardinal, pour piper les Ecclesiastiques. Quant aux Parlemēs, pour autant que plusieurs qui y sont pourueus sont entrez par la fenestre, estans sans aucune conscience, il ne les fallut gueres presser pour se rendre esclaves de ceux de Guise. Les bons qui y restoyent, intimides par les rudes traitemens fais à du Bourg & à ses compagnons, se mettoient la

## LA LEGENDE DV

main sur la bouche. Quant aux gens de guerre, voyans les Princes ne dire mot, & le Duc de Guise armé tandis que les grans & petis estoient en chemise, n'attendans autre chose que l'escorcheur, ils se rangeoyent du costé des plus forts. Et combien que les vns & les autres eussent par suffisantes coniectures, que le but auquel tendoit ceste maison de Guise estoit tout autre que celui qu'on leur figuroit, si estoit-ce qu'abreuuez de vaine asperance, & pour s'entretenir en vne imaginee prosperité, comme gens enyurez chascun se precipitoit en ce gouffre.

Estans ainsi ceux de Guise en bonne grace, & apres auoir eslongué ceux qui n'estoient de leur reuenué, ils se resolurent de penser de plus pres à leurs affaires, pour telle occasion. Le Roy, François venant à croistre, commença à donner plus de iugemēt de son indispositiō. Ils l'auoyēt marié à leur niece Royne d'Escoce, en luy faisant de si bōne heure gouter les delices du monde, & estre coiffé de sa femme, qu'ils le peussent manier plus souplement. Mais ce Prince malsain, & qui dès son enfance auoit monstré vne tres-dangereuse indisposition, pour n'auoir craché ny mouché, fit que quelques siens medecias faits de la main de ceux de Guise les aduertirent secrettement de pouruoir leurs affaires, d'autant que le Roy n'estoit pas pour la faire longue. Sur ce rapport, le Cardinal tenant ia attaché à sa main la pluspart des François, pour descouvrir comment ils estoient affectionnez enuers le Roy, depleoit quelque fois la misere du temps & l'indispositiō du Roy, qui n'auoit pas peut estre (disoit-il) loisir de punir les heretiques, & que les choses pourroyent se tourner tout autrement apres la mort d'iceluy. Ayant rüé ce coup, & servant plusieurs desirer à demy que luy donc pensast à quelque ferme expedient, passoit outre, insistant sur la maladie du Roy, laquelle il taxoit malicieusement de contagion de laderrie: & ce à double fin, l'vne pour desgouter les François de l'amour naturelle qu'ils portent à leurs Roys, pour estre le Roy, comme ils vouloyent faire croire, attaché de telle contagion, & par ce moyen les preparer à nouveau changement: & l'autre pour rendre tellemēt odieux ceux de la Religiō (lesq̃ls il pretendoit faire auteurs de ce bruit) enuers le Roy, que par son commandemēt ils fussent du tout exterminéz, afin que cela ralé, ceux de Guise ne trouuassent aucune resistance. Suyuant ceste



ceste pensee, ils font courir le bruit par ceux de leur faction  
 que le Roy alloit a Blois pour se faire medeciner, à cause  
 des teintures de son visage, & comme quelques uns deman-  
 dasset que signifiou ce langage, ces espions disoyent en  
 grand secret à l'oreille, que pour vray le Roy Henry estoit  
 entache de lepre, pour laquelle guerir il le faisoit baigner au  
 sang de bon nombre de peris enfans, & que desia il y avoit  
 gens commis pour aller prendre les plus beaux & plus  
 sains que lon pourroit trouver depuis quatre iusques à six  
 ans. De fait quelques rustres suyans la Cour, apostez par  
 le Cardinal, se transportoyent par les bourgades & villages  
 à l'enrou de la riuere de Loire s'enquerrant du nombre  
 des enfans, & d'autres venoyent apres demandans s'il estoit  
 venu gens pour enregistrer leur enfans, & qu'il se falloit  
 bien garder de les bailler, d'autant que c'estoit pour baigner  
 le Roy en leur sang. Ces bruits mirent tous ces pays à  
 l'enrou de Loire en merueilleuse frayeur, & le Roy estant  
 arrive a Blois en sceut les nouvelles qui le troublerent gra-  
 dement & sa mere aussi. Mais le Cardinal en scieta la coul-  
 pe sur ceux de la Religion, & le persuada au Roy qui s'en  
 enflamma contre eux, d'une haine qui luy demeura en-  
 prainte au cœur iusques à la fin de sa vie. Et toutesfoiz un  
 de ces garnemens, qui portoit telles nouvelles, & sous pre-  
 texte d'advertir les peres & meres des enfans avoit exigé  
 grans sommes de deniers, ayant esté prins pres de Loches,  
 convaincu & condamné à estre decapité, confessa main-  
 tint & afferma iusqu'au dernier soupir, que le Cardinal  
 luy avoit fait bailler ceste commission & à plusieurs autres  
 aussi. Neantmoins on s'en attacha à ceux de la Religion,  
 & quoy que cinq semaines ou un mois auparavant on eust  
 fait un edict assez rigoureux, le Cardinal fit vne recharge de  
 trois autres edicts en Novembre 1559, en l'un desquels ces  
 mots estoient contenus, qu'es assemblees de iour & de  
 nuict de ceux de la Religion, non seulement l'usage de l'E-  
 glise Romaine estoit vilainement profané, mais que lon y  
 semoit plusieurs propos vilains, infames & iniurieux con-  
 tre sa Maiesté, & pour esmonvoir le peuple à sedition.  
 Mais cela ne fit qu'aigrir beaucoup de personnes qui mes-  
 mes n'estoyent pas de la Religion, & estimer qu'il y avoit  
 autres choses que la Religio, laquelle en cest endroit (com-  
 me en beaucoup d'autres depuis) ne seroit que de pretexte

Cependant ceux de Guise mirent vne telle tache sur leur ne-  
uëu, qu'ëcor qu'il ne fust ladre, toutesfois depuis ces bruits  
là, il perdit presque toute sa reputation.

Sur cela entreuindrent deux accidens qui remirët le Car-  
dinal en nouuelles alteres. L'vn fut que le Presidēt Minard  
l'vn de ses esclauës au Parlement de Paris fut tuë d'vn coup  
de pistole, par gens incognus. L'autre fut qu'vn sien bon  
seruiter nommē Iulian Fermé fut tuë assez près de Cham-  
bourg où estoit le Roy. Ce Fermé alloit porter force me-  
moire à Paris, pour faire procez aux plus grans Princes &  
Seigneurs du Royaume & autres gens notables qui favori-  
soyent à la Religion. Le Cardinal empoignant ces occasi-  
ons, donne vne recharge de ceste calomnie susmentionnée à  
ceux de la Religion, & par lettres patentes fait ençor defen-  
dre plus estroitement que iamais, le port des armes: mettāt  
par tels bruits le Roy en l'indignatiō du peuple qui n'auoit  
accoustumé de se voir ainsi soupçonné. Cependant assa-  
uoir le 23. de Decembre, le Conseiller du Bourg fut executé  
à mort & plusieurs autres de la Religion en diuers lieux, au  
grand mescontentement non seulement de plusieurs Fran-  
çois, mais aussi des Princes estrangers.

Mais cela n'est comme rien au pris des confusions & mal-  
heurs en quoy ceux de Guise enuellerent le Roy & le  
Royaume puis apres. Car leurs façons de faire ouuerternēt  
tyrāniques, les menaces desquelles on vsoit enuers les plus  
grans du Royaume, le reculement des Princes & grans Sei-  
gneurs, le mespris des estats du Royaume, la corruptiō des  
principaux de la iustice rangee à la deuotion de ces nouue-  
aux gouuerneurs, les finances du Royaume departies par  
leur commandement, & à qui bon leur sembloit, comme  
aussi tous les offices & benefices, brief leur gouuernement  
violent & de soy-mesme illegitime, ayāt esmeu de merueil-  
leuses haines contre eux, tant des grans que des petis, ame-  
na en auant l'entreprise dont la Renaudiere estoit Chef sous  
le nom & adueu du second Prince de sang, laquelle fut de-  
puis maniee & rompue en la sorte que nous le dirons au  
traitement par eux fait à la noblesse.

De l'en-  
treprise  
d'Am-  
boise.

Pour le present, voyons comme ils se mocquerent alors  
du Roy & de son estat. Ayans entendu par vn certain auo-  
cat de Paris nommē des Auenelles qu'on machinoit con-  
tr'eux, se seruirent de la Roynē mere pour faire venir mes-  
sieurs

seurs de Chastillon à la Cour, ou par leur auis fut dressé vn edit du Roy pour adoucir les rigueurs que l'on tenoit auparavant contre ceux de la Religion. Or se seruoient-ils de ce pour rompre l'entreprise, estans bien deliberez de reuouer le tout apres, comme ils le firent entendre par lettres particulieres à leurs esclaves au Parlement de Paris, où cest edit fut incontinent publié avec les modifications en registrees au registre secret, tellement toutesfois que quelques Conseilliers se laisserent aller iusques à dire que c'estoit vn attrappeminault. Par ainsi ils se iouoyent de la foy Royale, mettaieste tache infamie à nos Roys d'estre perfides & desloyaux. Ce pendant, ayans nouueaux aduertissemens, au lieu de penser à leur gouuernement, & monstrier par effect qu'ils ne vouloyent estre tels qu'ils s'estoyent môstré iusques à lors, en foulant au pied toute l'authorité du Roy, amassent des forces de toutes pars, baillent argent à des Auenelles & autres espions, prins és coffres du Roy, enuoyent gensdarmes de tous costez, & tienēt le Roy au milieu d'eux & ayans en ces tempestes obtenu lettres pour le Duc de Guise d'estre lieutenant General du Roy avec puissance absolue, il ne fut question que de mettre tout à feu & à sang, faisans mourir infinies personnes nobles, & souillans le nô l'honneur, les yeux & le regne de ce ieune Roy des plus horribles cruauitez que l'on sauroit penser. Car l'air, la terre & l'eau, seront tesmoins à iamais de la Barbarie de ces monstres qui ont remply la France de sang, le ciel de tesmoins & de iuges, & la terre de complaints. Leur imposture apparut aussi ouuerrement en ce que iamais ils ne voulurent permettre que le Roy entēdist comme il appartenoit, les iustes complaints de ses suiets que l'on traitoit si vilainement deuant ses yeux. Il demandoit quelques fois avec les larmes aux yeux ce qu'il auoit fait à son peuple, pour luy en vouloir ainsi (car ces messieurs luy cornoyent sans cesse aux oreilles qu'on le vouloit tuer, & sous ce pretexte l'auoyent enuironné de troupes armées & ramassées des plus meschans garnemens du Royaume) & depuis ont continué à se faire garder pres de nos Roys, la dignité desquels ils ont cōuertie en ce faisant en ie ne say quelle pompe Persique & frayeuse Turquesque) & disoit qu'il vouloit entendre leurs plaintes & raisons. Et par fois disoit à ses bons oncles, ie ne say que veulent dire ces remuemens. L'enten que c'est à vous

D à à qui

à qui lon en veut: ie voudroy bien, que pour vn temps vous fussiez hors d'icy, afin que lon cognust mieux si ces gens cy s'attachent à moy ou à vous. Mais le meurtrier qui tenoit le Pere de son ennemy entre ses bras, sauuoit sa vie par ce moyen, aussi ceux de Guise se tenans ioints (comme le lieure à la Pyramide) serrez & conioints à ce ieune Prince, paroyent dextrement aux coups, desquels infalliblement ils eussent esté transpercez. Ils reiettoient donc tous ces propos du Roy, l'assurant que luy ny messieurs ses freres ne viuroient vne heure après leur partemēt, & que la maison de Bourbon ne cerchoit qu'à les exterminer à l'aide des heretiques. Voila comme ils enuenimoyent le Roy contre son sang & son peuple, prenans Valois pour Guise, iouant manifestement au Roy despouillé. Comme aussi leurs cruautés n'empacherēt point qu'on ne leur reprochast les choses en face & par escrit, estans accusez d'auoir affoibly, mangé & ruiné les Roys & le Royaume. Mais cela sera deduit encor plus particulièrement. Le Cardinal fut bien si audacieux alors que de iurer par le sang Dieu en présence du Roy, que le Baron de Castelnau mourroit, & qu'il n'y auoit homme qui l'en deliurast. Cependāt les edits du Roy couroyent de tous costez, & le Duc de Guise pour se moquer du Roy dauantage, & craignant que si grand nombre d'executez ne les rendist odieux à tous, & que ce mot d'estats dont on leur frotoit desia les oreilles, ne charoullast le cœur du peuple, fut d'auis de sauuer la vie (comme vn brigand feroit à quelqu'un qu'il tiendrait à sa mercy au coin d'un bois) à la pluspart des pources soldats venus à pied: ce qui fut fait & sous main donné à chascun vn teston.

Ie ne diray point qu'ils conseillèrent au Roy de tuer le Prince de Condé, & les moyens qu'ils tindrent pour se laver & blanchir dans le sang innocent; ny les calomnies qu'ils imposèrent aux morts, & les belles promesses qu'ils faisoient pour l'auenir, le tout sous le nom du Roy, sans en tenir rien: car il sera temps d'en parler encor au long ailleurs. Mais ie ramēteueray aux lecteurs vn autre tort meueilleux que leur ambition fit au Roy & à son estat. Leur niece mariee à Francois 2. estoit Roynē d'Escoffe. Or pretendoyent ils qu'elle eust quelque droit sur l'Angleterre, pour estre fille du fils d'une sœur de Henry huitiesme Roy d'Angleterre, & pretendants qu'Elyzabeth à present reg-

Guerre en  
Escoffe  
par ceux  
de Guise  
aux de-  
ffens de  
France.

nante seroit facilement deboutee, veu mesmes que Marie Roïne d'Angleterre, mariée au Roy Philippe, l'auoit fait declairer bastarde. Pourtant firent-ils prendre à leur niepce le titre & les armes d'Angleterre & d'Escoffe, resolu de s'approprier en fin le Royaume d'Angleterre, aux despens de la France, sous le nom de leur niepce, fust par finesse ou par force. La Religion dont Elizabeth faisoit profession leur fut vne couerture bien propre pour gagner gens en Angleterre, ou lon sait qu'il n'y a que trop de gens affectionnez au Pape. La grandeur du Roy de France & l'alliance inuincible des deux Royaumes leur estoit vn autre manteau, sous lequel s'amasserent beaucoup de seruiteurs secrets & pensionnaires qui vendoyent leur meschante conscience au pois de l'or, & en se moquant de ceux de Guise leur persuaderent que pour attirer l'Angleterre, il falloit donter les Escossois qui pour la pluspart estoient de la Religion. Car en ce bel exploit les Anglois Catholiques auroient vn suffisant gage de leur repos pour l'auoir, & qu'il falloit que l'un des six freres demeurast en Escosse. Sur ces menées entreuint vn trouble en Escosse pour la Religion, le Roy Henty mourut, & eux se voyans à chenal, deliberent de poursuyure ceste proye à cor & à cry. Ils enuoyent l'Euesque d'Amiens fort habile homme en Cour d'Eglise, & qui en vn mois deuoit reduire (ce disoit-il) tous les Escossois desuoyez, & vn certain la Brosse esceruillé & furieux, qui deuoit tuer tout en ce Royaume-là. Ces deux bons commissaires arriuez en Escosse, commencent à faire des partages par fantasie des terres des Gentils hommes, & (vendans la peau de l'Ours qu'il nauoyent prins) escriuent à ceux de Guise qu'il y auoit moyen de tirer deux cens mil escus par an de ce Royaume, en faisant mourir la noblesse & assuiettissant le peuple, & qu'on logeroit là commodement mille gentils-homes François pour faire seruice à messieurs de Guise. Dieu fait si ce conseil les grattoit, ou il les demangeoit, & s'ils estoient despirez contre la Roïne Douairiere leur sœur & le Sieur d'Orsel son mignon, qui n'estoyent d'auis qu'on courust sus aux Escossois qui auoyent du sang aux ongles, comme ils le monstrent bien, faisans sentir à l'Euesque qu'ils n'auoyent que faire de son instruction, & contraignant la Brosse de rebrousser chemin & aller faire du brauc



nilleurs, chassans les prestres, la Cardinauté & Papauté qui y fussent demeurez sans la sottise ambition de ceux de Guise. Mais outre ce coup, ils eurent vne autre recharge du costé d'Angleterre, car la Royne Elizabeth fit vne ample protestation alencontre d'eux expressément, faisant voir à tous qu'ils estoient cause de tous ces remuemens à la confusion du Roy & à la ruine de son Royaume. Et quelques mines & menées qu'ils fissent puis apres, attachans (selon leur coustume) la peau du renard à celle du Lyon, ils ne gaignerent rien de ce costé-là, sinon honte pour eux & dommage au Roy & au Royaume.

Pendant qu'ils estendoient leurs ailes si loin, ceux de la Religion croissoient en France d'un costé, & les malcontents du gouvernement de ceux de Guise, reprenoyent leurs esprits, encore que l'entreprinse d'Amboise en eust merueilleusement estonné la pluspart au commencement. Là dessus le Duc de Guise lieutenant general, despité extrêmement qu'en son gouuernement du Dauphiné, ceux de la Religion auoyent leué la teste les premiers, y fait descendre seze enseignes des vieilles bandes du Piedmont, & plusieurs autres compagnies de gendarmes François sous la conduite de Tauannes, Maugiron & autres qui firent de merueilleux rauages en ce pays là. Tost apres ils menent le Roy à Tours, où il ne tint pas à eux que la ville ne fut ruinée, car ils estimoyent que les habitans auoyent fauorisé l'entreprinse d'Amboise, & leur en ont longuement gardé vne dent de lait.

En pourmenant ainsi le Roy, & luy faisant goustier les apais de toutes voluptez, ils abusoyent de sa ieunesse & simplicité, plantans de iour à autres les piliers de leur grandeur pour l'auenir. Et tant plus ils se voyoient contredits, plus estoient-ils enuenuimés & affinez à nouuelles pratiques, redans le Roy odieux à ses suiets & aux estrangers mesmes, ruinans plus le Royaume en vn mois alors, qu'il n'auoit esté en vn an és guerres contre le Roy d'Espagne: car c'est vne chose inroyable des exactions & des debtes qu'ils firent & des biens qu'ils amasserent sous François leur neveu. Ces deportemens conioints avec vne violence extrême, mirent la pluspart des suiets comme en desesperoir de voir iamais la France en repos, veu les coups que ceux-cy luy donnoient. Toutesfois pour y remedier premierement sous le nom de

*Cōment  
resistent  
à tous  
ordre.*

Theo-



Theophile, fut enuoyé vne remonstrance à la Roynemere, ou la tyrannie de ceux de Guise estoit depainte au vis. & la cōclusion estoit, qu'il falloit pouruoir au gouuernemēt du Royaume, & bailler vn conseil au Roy, selon les anciennes constitutions & obseruations de France, non pas à l'appetit de ceux de Guise. Puis appaïser les troubles de la Religion par vn Cōcile saint & libre. La Roynemere qui estoit lors sous leurs pattes, & raschoit de leur cōplaire en toutes choses, leur seruant d'espionne en tout ce qu'elle pouuoit, fit retenir celuy qui porta ceste remonstrance, & apres auoir fait chercher de tous costez ce Theophile, & donné des peurs au porteur iusqu'à le vouloir battre, considerant que tels efforts pourroyēt avec le temps esteindre leurs feux & rebouter la pointe de leurs glaiues, conclurent de metre l'inquisition d'Espagne en France, ayans premierement par leurs seruiteurs secrets en Alemaigne & ailleurs entretenus aux despens du Roy, diffamé par toutes sortes de calomnies, ceux de la religion. Toutesfois la sagesse du Chancelier de l'Hospital qui manioit politiquement ces espines, rōpit le coup en quelque sorte, car au lieu de l'inquisition, fut dressé l'edict de Romorantin, defendāt toutes assemblees illicites, cōprenant sous icelles les presches & exercices de la Religion. Mais au lieu d'appaïser les troubles, cest edit les redoubla de toutes parts. Ce qui cōmença à resueiller les esprits fut vn liure intitulé la Maiorité du Roy escrit en la faueur de ceux de Guise par leā du Tillet greffier de la Cour de Parlement à Paris encor que le traitement qu'il auoit receu du Cardinal ne luy en deust auoir donné la volonte, mais lors chascun adoroit ces messieurs, aussi estoient-ils Roys.

A ce liure fut fait vne viue responce, suyvie puis apres de diuers autres liurets en grād nombre, pour lesquels fut fait fort grande recherche, iusques à faire pendre Martin l'Homme qui auoit imprimé le Tygre de la France ou le Cardinal entre ses autres freres estoit depaint de toutes couleurs. D'vn costé le Cardinal faignoit d'estre bien ioyeux qu'on l'immortalizoit ainsi, & de l'autre il pratiquoit gens afin de respondre à tels libelles qui descouuroient ses ruses, & faisoient desia sa legende, immortalizans voirement les ordures de luy & de toute sa maison. Mais du Tillet entre autres g. auoit eu vn bō coup d'estrille, s'excusa pour l'aucun & exhorta le Cardinal de pouruoir à ses affaires par autre

moyen, c'est assaillir & verser contre les personnes & biens de ceux de la Religion de toutes les rigueurs d'où on se pouroit auiser, afin de ne leur donner pied ferme ny aucun esprit de liure: & que le Cardinal pourroit escrire particulièrement aux Princes: ce qui fut suivi comme le plus expedient.

**Nouvelles** Or pour entretenir leur crédit, vers les Princes estrangers, **ruines du** descouvrir ce qui disoyent & faisoient contre les ambassa- **Royaume** de leurs ordinaires qui estoient à la deuotion de ceux de Guise, ils gaagnerent à force d'argent plusieurs seruiteurs de ces Princes mesmes, ayans en Espagne, Angleterre & Allemagne, ne pensionnaires aux despens du Royaume de France. Mais outre tout cela ils auoyent des seruiteurs secrets es cours de ces Princes estrangers & des Princes & seigneurs de France, auxquels ils donnoient de telles pensions, que seulement la despense des seruiteurs secrets en France montoit par mois plus de vingt mille francs. Ils auoyent encor des coureurs qui alloient espions par les hosteleries sur les champs pour marquer les vns & les autres, dont plusieurs (sans y penser) quelque temps apres estoient emprisonnez & mis en tel poinct, que lon en oyoit plus aucunes nouvelles.

Cela ainsi dressé ils renouellent leur ligue avec la Roynne mere, escriuent à tous leurs partisans, & s'emparent de toutes fortes de gens, tellement que le Duc de Guise s'osa vanter qu'il auoit promesse de douze cens gentils-hommes signalez, & le serment de leurs chefs avec lesquels & les vieilles bandes venues du Piedmont & autres qu'il auoit à commandement, il passeroit sus le ventre à tous ses ennemis. Puis le Cardinal mit en auant au conseil du Roy, qu'il se faloit saisir de la personne du Prince de Condé, chargé d'estre chef de l'entreprise d'Amboise: & ayans entendu qu'il estoit allé en Bearn, persuadent au Roy que c'estoit pour luy faire guerre nouvelle, afin d'eschapper la punition de sa faute. Ceste impression donnée, ils expedient nouvelles commissions pour tener gens, afin d'aller assaillir le Roy de Navarre qui auoit retenu le Prince son Frere. Enuoyent le Marechal de S. André espier ce que faisoit le Prince. Font venir par l'entremise de la Roynne mere vn nommé la Planchie, afin d'entendre encor plus particulièrement les plaintes des Huguenots d'estat & de Religion, pour se munir de nouvelles finesses allencoures, & des lors farent si impudens,

& elle si ie ne say quelle de dire, que le remede à tant de mel-  
contentemens seroit qu'apres le premier Prince du sang  
marchast vn de ceux de Guise, & ainsi consequemment. En  
quoy ils descouurirent assez quel esprit les menoit. Tuis  
changēt les gouuerneurs comme bon leur semble, enuoyēt  
la Motie Gondrin en Dauphinē, & autres à leur poste de ca  
& de là: préparans ainsi leurs filez pour attrapper à leur aise  
tous leur ennemis.

Et comme les iugemens de Dieu sont admirables en vn  
poinct, c'est que les plus hardis contempteurs de sa maiestē  
ont pour vn temps toutes choses plus qu'à souhait, à fin  
que leur ruine soit tāt plus grande puis apres: ainsi en print  
il à ceux de Guise. Car comme ils estoient aux escoutes, ne  
sachans par quel bout commencer, la sage gentil-homme  
Basque depeschē par le Prince de Condē pour aller sollici-  
ter ses amis, fut pris à Fontainebleau avec plusieurs despe-  
ches, par le moyen desquelles & de ses cōseillons en la tōr-  
ture, ils appeiceurent encor mieux que le filer de leur tyrā-  
nie s'en alloit coupe, s'ils n'y prenoient garde. Premiere-  
ment font emprisonner le Vidame de Chartres, la belle mē-  
re du Prince de Condē: enuoyent le Comte Ringraue aux  
frōntieres de Lorraine pour tenir prest vn regimēt de Lan-  
quenets & deux mille pīoliers: font descendre le long de  
la riuere de Loyre les vieilles bandes venues du Piedmont  
en Dauphinē, faignās les vouloir enuoyer en Escosse: mais  
ils seiounerent à Gyen & à l'entour de Montargis, pour  
s'asseurer au besoin des maisons de l'Admiral. Là ils com-  
mirent des maux incroyables avec impunitē pour en tirer  
meilleur seruice pillans ou rançonniāns les meilleures mai-  
sons, violās les pl<sup>es</sup> belles filles & fēmēs, & pour ne faire ius-  
tice: suffisoit de charger les cōplaignās d'estre Huguenots.

Vn autre expedient se presenta là dessus pour acheminer  
encor mieux leurs desseins. La Roynē mere voyant tant  
d'apprests, & que parmy telles tempestes elle ne pourroit  
subsister aisement, d'autant que l'vn des deux partis l'hu-  
milieroit. Car elle redoutoit plus cent fois ceux de Guise  
que tous autres, tenant pour certain (comme aussi il estoit  
vray) que s'ils venoient à bout des Princes du sang, ils n'e-  
spargneroyent les enfans ny elle avec. D'autre part si ceux de  
Guise estoient marez, d'autant qu'elle s'estoit iointe à  
eux, il y auoit danger aussi qu'elle ne tombast quand & eux.

*Assemblée  
de Fontai-  
nebleau.*

## LA LEGENDE DV

Pourtant elle demande auis à l'Amiral & au Chancelier, qui luy declairerent estre necessaire de proposer au Conseil du Roy que les Princes, Seigneurs du Royaume, Cheualiers de l'ordre & gens d'autorité fussent assemblez pour regarder tous les moyens de pacifier les troubles.

Ceux de Guise entendans cest auis, encor qu'il n'aimassent en sorte quelconque ceste liberté de l'Amiral & du Chancelier, & fussent bien deliberez de les abattre comme les autres, neantmoins y condescendirent, estimans que c'estoit yne plus belle ouuerture que toutes les autres pour venir à leur point. Ils disoyent donc, que quand le Roy de Nauarre, le Prince de Condé, le Connestable & autres receuroyent les lettres du Roy à ceste fin, ils ne feroient aucune faute de venir, & qu'alors ils seroyent tout portez, pour estre retenus, sans donner la peine de les aller chercher si loin. Que s'ils ne pouuoient gagner encor cela, pour le moins auroyent-ils tant de voix en ceste assemblee, que toutes leurs actions passées y seroyent authorisées, & leur degré estably pour l'auenir, tellement q̄ puis apres ce seroit vn crime manifeste à quiconque y voudroit contreuenir. Que les estats (si aucuns se tenoyent) seroyent bridez par la decision de si notable assemblee, & par consequent, demureroyent Roys de France par effect, en attendant que leurs autres pratiques leur en seroyent aussi auoir le nom.

Et si leurs ennemis ne se trouuoient en ceste assemblee, ils auroyent nouuelle prinse sur eux, tant pour les mettre de plus en plus en la male grace & deffiance du Roy, que pour se venger d'eux avec plus de pretexte puis apres. Ainsi donc il ne fut questiō que de faire courir paquets de toutes parts au nom du Roy, & leurs lettres à leurs amis. Lors leur vindrent bien à propos tant de Cheualiers de l'ordre qu'ils auoyent forgez peu au parauant, car ce furent autant de voix gaignees à la confusion du Roy & du Royaume.

Mais ils vserent d'vne merueilleuse ruse à l'endroit du Roy de Nauarre. Ils luy firent escrire par la Royne mere qu'il eust à venir & par dessous luy firent dire par ses conseilliers, assauoir Descars son chamberlan, Bouchart son Chancelier & autres qui estoyent leurs espions & seruiteurs secrets vers ce Prince, qu'il n'allast point à ceste assemblee, & par ce moyen donnerent vn tel coup de pied à l'estat du Royaume qu'il s'en sent encor: car ce Prince estât intimidé

fut

fut cause que le gouuernement demeura à ces messieurs qui se fortifierent de nouveau puis apres.

En ceste assemblee trois personnes seulement les picquerent, & specialement deux les irritèrent iusques au bout. l'Euesque du Valence disant son opinion les eschauffa: mais l'Archeuesque de Vienne nommé Marillac les fit bien châger de contenance en sa docte & hardie harangue touchant l'autorité des estats & l'vrgente necessité des les assembler: concludant aussi à vn concile national.

Traitant des estats, il monstra premierement que c'estoit le vray moyen de retenir le peuple en deuoir, puis monstra que c'estoit des estats, à quelle fin ils doyuent estre assemblez. Que les plaintes du peuple doyuent estre ouyes & examinees en presence des estats. Là dessus il fit vn discours bien à propos des maux qui trauailloyent le Royaume, & dont ceux de Guise (sans les nommer) estoient cause. Ces maux estoient les surcharges extraordinaires creuës & multiples de telle sorte que le peuple en estoit accablé: l'espuisement des finances du Roy, ses grâdes debtes, les despenses excessiues du Royaume, l'ignorance du fond des finances, les affaires d'estat embrouillees, les premiers ministres du Roy chargez de tourner toutes choses à leur auantage, & faire leur profit particulier de la calamité de tous, le Roy n'estoit obey ny le peuple escouté, le gouuernement mal conduit. En apres il monstroient les grandes commoditez que ceste assemblee d'estats apporteroit. Le Roy entëndroit par le menu les affaires de son Royaume, examineroit les mœurs de son peuple, cognoistroit sa portee & pouruoiroit à son estat: deuiendrait bon pasteur tondant son troupeau doucement sans autremēt l'offenser: se comporteroit royalemēt, c'est à dire, benignement & salnêtement: seroit heureux & acquerroit ce beau nom de Pere du peuple duquel la memoire au Roy Loys 12. est plus celebree & reluit pour exemple à la posterité, plus que toutes les conquestes & victoires de ceux qui ont esté au parauant. En apres, le peuple seroit tant plus encouragé de subuenir à son Roy. Ce qui est ordonné en telles assemblees à vne merueilleuse efficace de rendre le peuple alaigre & prompt à tout bon deuoir. Ou quād peu de gens sont appelez à bastir les loix, on viēt à interpreter qu'elles ont esté forgees selon la passion d'aucuns, & sans examiner les raisons qu'eussent peu alleguer

*De l'assemblee des Estats.*



les absens; s'ils eussent esté ouys. Il adioustoit que la mai-  
son de France auoit floruy ynze cens ans durant en conser-  
uant l'autorité des estats. Que le mesme estoit auentü en  
l'Empire, es royaumes d'Espagne, d'Angleterre, d'Escosse,  
de Dannemarch, Suede, Bohême, Hongrie & par tout ail-  
leurs. Il respondoit amplement puis apres à toutes les ob-  
jections de ceux qui vouloyent faite à croire que l'autho-  
rité du Roy estoit diminuee en assemblant les estats, & tax-  
oit lors assez ouuertement la tyrannie de ceux de Guise, les-  
quels aussi luy en firent si mauuais gré qu'apres l'auoir  
fait menacer, il fut cōtraint se retirer, & voyant en quel estat  
estoyent les affaires, il en mourut de regret. Sa harangue est  
imprimée & inscrite en la notable histoire de François se-  
cond de nouueau mise en lumiere. Parrant n'auons voulu  
allonger ce propos pour le present.

Mais ce qui les mit en fureur extreme fut la harangue de  
l'Amiral qui perça l'apostume de leur tyrannie: car parlant  
expressément de la nouuelle garde du Roy, monstra que  
c'estoit trespas fait à ceux qui auoyent ainsi arme le Prince  
contre ses suiets, & dit nommément que si quelques offi-  
ciers du Roy craignoyent d'estre offensez, ils en deuoient  
ostier les occasions, & que le mal contentement n'estoit pas  
cōtre le Roy ( & à quel propos aussi, veu que c'estoit vn en-  
fant qui ne bougeoit ny ne faisoit rien que par le conseil &  
abouchement de ses oncles) mais contre ceux qui manioyent  
les affaires du Royaume, à quoy il estoit aisé de pouruoir,  
pourueu que tout fust cōpassé par bon ordre & selon les  
loix du Royaume. Le reste de la harangue tendoit à mesme  
fin que Marillac. Il y auoit aussi quelque chose de la Reli-  
gion. Les deux freres de Guise mōstrerent lors qu'ils estoy-  
ent Roys: car oustre ce tous les Cheualiers de l'ordre là pre-  
sens n'oserent haranguer, ains disoyent seulement qu'ils es-  
toient de l'avis de M. le Cardinal, ils s'attaquerent specia-  
lemēt à l'Amiral, insistans sur ceste nouuelle garde, & mō-  
strans en somme que François leur neveu seruoit de mas-  
que & couerture à leur felonnie. Comme aussi les lettres  
enuoyées incōsinent apres ceste assemblee aux Baillifs &  
Seneschaux le monstroient. Car elles auoyent esté dressées  
pour le Cardinal, qui promettoit vne grande reformation  
de l'Eglise (mais deuinez si les putains reformerēt les Bor-  
deaux) ensemble les estats, lesquels on assignoit au 10. iour



de Decembre endà ville de Meaux. Et que cependant les gou-  
 uerneurs & lieutenans des Prouinces (pour la pluspart les-  
 uiteurs & esclaués de la maison de Guise) visiteroyent re-  
 spectiuement leurs villes, pour entendre par le menu & luy  
 rapporter les doléances du peuple, c'est à dire pratiquer de  
 tous costez à l'establissement de la tyrannie. Ainsi se ma-  
 quent ils de l'auhorité Royale, entendant vaine & faulx-  
 roire vne si notable assemblée, comme les effets en appar-  
 rent incontinent. Mais car il y a de luy en luy, on ne sçait pas  
 s'ils adiouterent à cela vn autre trait de merueilleuse au-  
 dace à l'encontre du Roy, c'est de faire mettre en armes, & par  
 res les compagnies des ordonnances, sous pretexte que le  
 feu d'Amboise n'estoit pas estainct, mais véritablement pour  
 ruiner les Princes du sang, ôster toute liberté aux estats, &  
 acheuer de brouiller tout. Et pour se fortifier dauantage, ar-  
 rans ençoda le retour des troupes Françoises reuenues d'A-  
 fosse par le traite de paix (que le Roy y auoit esté contraint  
 accorder à son grand deshonneur & de sauâtage, par la folle  
 ambition deses oncles) les joignirent avec vne bande de  
 Piemont, Mets, & Picardie, pour leur garde, outre douze  
 cens hommes, reservez outre le departement des compaignies  
 mises & enuoyées par tous les gouuernemens. Ayant ainsi  
 le glaue au poing & montez à l'auâtage, font vne despesche  
 du Roy leur neueu au Roy de Navarre, par laquelle le Prin-  
 ce de Condé estoit chargé de crime de lèse maiesté: & pour  
 en auoir de ceuluy, ledit Seigneur prison de Roy de Navar-  
 re de luy enuoyer son frere en bôpe & de luy enuoyer son frere  
 seroit luy mesmes contrainct de l'aller querir avec si honte  
 compaignie que la force luy en demoureroit. Le Roy de Na-  
 varre & son frere respondirēt sageement & de telle constâce,  
 que ceux de Guise virent bien qu'auant toute leurs puillan-  
 ce à peine en pourroyent ils auoir le bont. Et pourtant s'a-  
 uiserent ils de se seruir de la foy & promesse du Roy pour  
 tromper ces Princes, & les attirer au piege. Parquoy ils font  
 incontinent vne autre despesche, par laquelle le Roy man-  
 doit au Roy de Navarre & au Prince de Condé qu'ils pou-  
 roient venir vers luy en toute seurte, & s'en retourner  
 quand bon leur sembleroit, les assurant en parole de Roy,  
 qu'il ne seroit arrené à leurs personnes d'aucune maniere,  
 qu'il entendroit paisiblement leurs remonstrances & iusti-  
 fications, sans qu'ils entrassent en prison, ou qu'on leur fist  
 procez:

protez : seulement il vouloit auoir response de la bouche du Prince sur les poincts dont on le chargeoit , & qu'il ne pouuoit aucunement croire : brief qu'ils seroyent recueillis selon leur estat & dignité, voire qu'on leur bailleroit le rāg qui leur appartenoit au maniement des affaires, afin d'auoir leur conseil & auis pour rendre toutes choses bien policees. Et quant à la Religion de laquelle ledit Sieur Prince auoit fait declaration & protestation publique , il ne vouloit ny n'entendoit q pour raison de ce, il en fust aucunement trouble ny inquieté. Ces poutres Princes, comme vrais François s'appuyans sur vne si solennelle promesse, encor qu'ils ne fussent pas du tout si aucugles qu'ils ne vissent les griffes de ces Lyons de Guise qui les attendoyent pour les deuorer, ny tant desnuez de moyens qu'ils ne peussent par le moyen des armes renger ces vsurpateurs & en venir à bout: toutesfoi s'appuyans sur leur innocence, & conduits cependant, comme nous le dirons plus particulièrement en autre endroit, se mettent en chemin & peu à peu donnent congé à ceux qui les accompagnoient, pour avec petite trouppc venir donner dedans le filé de leurs ennemis.

*Ceux de  
Guise font  
la Roy  
François  
2. perire  
desloy  
al contre  
son ppre  
sang.*

Voyons donc comme ils firent tenir à leur neveu la foy tant solennellemēt promise. Le mesme iour que les Princes arriuerent ayans esté fort indignement receus, & peu respectez ou point du tout, le Roy s'estant fait suyure par eux en la chambre de la Roynne mere, s'adressant au Prince de Cōde luy dit, qu'on luy auoit rapporté de plusieurs endroits qu'il auoit fait & faisoit plusieurs entreprises contre luy & l'estat de son Royaume, à raison dequoy il l'auoit mandé pour en sauoir la verité par sa bouche. Le Prince ayāt respōdu pertinēment & monstre son innocence & descouuert la malice de ceux de Guise, (qui n'estoyent presens craignans la touche) neantmoins tout à l'heure mesmes fut mis entre les mains de Chauigny capitaine des gardes, esclaue de ceux de Guise, & par eux enuoyé là expressément pour emmener le Prince prisonnier. Car on ne le voulut pas bailler en garde au Roy de Nauarre son frere qui en respondoit sur sa vie : mais il auoit assez affaire à garder la sienne.

*Leurs pr  
signes en  
uers les  
estrangers.* Or comme vne meschante conscience ne cesse de chercher des moyens de mesmes pour s'appuyer, ceux de Guise voyans qu'ils auoyent cōmencé vne besongne, de laquelle ils viendroyent malaisément à bout, s'il n'estoyent fauorisez

que

que des François, encor que plusieurs eussent desia renoncé pour rui-  
à leur liberté, ils delibèrent de praiquer & attirer à eux les *not La*  
Princes estrangers pour s'en preualoir au besoin. *France* On peut  
penfer si le Roy ne payoit pas les ioueurs de ces tragédies,  
& comme son autorité estoit manifestement vsurpee en  
cest endroit. La paix auoit esté faite avec le Roy d'Espagne,  
à ceste condition entre autres que les deux Roys persecute-  
royent les Lutheriens à toute ouïrâce. Ceste entreprinse ay-  
ant esté rompue par la mort d'Henry, fut remise sus au cō-  
mencement du regne de François, puis entrémise à cause du  
fait d'Amboise. Mais ceux de Guise ayans leurs deux plus  
fort ennemis en main, resolurent (en se moquant aussi du  
Roy d'Espagne & luy faisans à croire qu'ils estoient grans  
zelateurs de l'Eglise Catholique) exterminer tellement ceux  
de la Religion, que par mesme ils aplanissent dauantage le  
chemin pour paruenir au throsne. Ils mandent donc à l'Es-  
pagnol, qui de son costé estoit au guet, (deliberé de leur dō-  
ner vne trouffe, si l'occasion s'en fust offerte à propos) que  
le Roy de Nauarre & le Prince de Condé sous ombre de  
quereler le gouuernement, vouloyent faire mourir le Roy  
& ses freres, & à l'aide de la Roïne d'Angleterre, des Prin-  
ces protestans & Suisses Euāgeliques, introduire leur Religi-  
on en Fiāce, & regler aussi puis apres toute la Chrestienté. Il  
y auoit prōu d'autres pareilles calomnies, en fin desq̄lles ils  
adioustoyēt, Que s'il plaisoit au Roy d'Espagne les main-  
tenir & favoriser en leur gouuernemēt, ils empescheroient  
le mal qu'on luy vouloit faire, & tiendroyēt la main à ce q̄  
les p̄messes d'Henry fussent accōplies. Ils receurēt respōce  
telle qu'ils demādoient, par le moyē du Cardinal d'Aras  
qui pensoit lors auoir trouuē vne belle breche pour faire  
entrer son maistrē en France, mais quand ceux de Guise fus-  
sent deuenus Roys, il y auroit encoꝛ moins d'entree qu'il  
n'a: & peut estre eust-il esté en plus grand' peine qu'il n'a  
estē: car l'ambition ne veut ny ne peut porter de cōpagnon.  
De mesme pas ils enuoyent au Pape, au Duc de Sauoye, &  
gaignēt les Suisses Catholiques par les menes du Colōnel  
Freulich, qui estoit à leur deuotion: se resoluent de ruiner  
tous leurs ennemis en France cest hyuer. là, & sur le prin-  
temps aller assaillir Geneue, puis les Allemāns & Suisses de  
la Religion. Et afin que l'Espagnol n'eust aucun empesche-  
ment du costé du Turc, qui se pourroit ietter sur ses pays,  
tandis

randis que les plus grandes troupes eurentoyent es pays du  
 Roy de Nauarre, on enuoya expres à Constantinople vers  
 luy, pour accuser les Princes du sang de trahison & de lloy-  
 auté, & d'auoir conspiré avec certaines gens d'une nouvelle  
 Religio qui ne recognoissoit nuls magistrats ny superi-  
 o- rez, pour mettre à mort le Roy & ses freres, le suppliant p-  
 dan qu'on se feroit empesche à reprimer leur audace, de rien  
 innouer ny entreprendre du costé d'Italie & d'Espagne, &  
 ce en consideration de l'ancienne amitié, alliance & con-  
 sideration qui estoit entre luy & les Roys de France. Ils eurent  
 si bonnere sponsee que le Duc de Guise se desborda iusques  
 à dire par plusieurs fois, qu'en tout euenement, il aimeroit  
 mieux que le Royaume tombast en la puissance du Turc, &  
 demeurast sous sa domination que de voir la doctrine des  
 Lutheriens & heretiques, qu'il appelloit, y estre recue.  
 Voila de meueilleux apprests pour l'establissement de  
 leur grandeur. Car ils estoient armez de toutes pieces ded-  
 le Royaume, ayans le Roy en leur main, & leurs ennemis  
 cōme à leurs pieds. Ils auoyent les villes, les Gouverneurs,  
 les finances, le peuple à cōmandement. Les susdits Princes  
 estrangers les fauorisoyent, & peut estre eussent ils eu quel-  
 que lopin du gasteau, comme specialement l'Espagnol s'y  
 latendoit bien, ayant ainsi obtenu aisement vne trefue du  
 Turc son grand ennemy, pour se ruer sur la France, & par  
 ainsi lon voit ou la cruelle ambition de ces gens reduisoit  
 toutes choses, si Dieu ne fust apparu tout à l'instant, leur  
 donnant plusieurs coups sur leurs oreilles auant qu'ils pli-  
 assent le gantelet.

Les des-  
 seins de  
 ceux de  
 Guise rō-  
 pus.

Is auoyent accordé l'assemblée des estats pour des-  
 urir tant plus aisement leurs ennemis. Et appelloyent les  
 lettres patentes du Roy la rarioire pour attrapper les fols.  
 Mais cela n'empescha point qu'aux estats particuliers des  
 Provinces beaucoup de choses ne fussent mises en auant  
 pour le reestablissement du Royaume, tant à l'égard de la  
 Religion que de la police, comme à Blois, à Angers, & no-  
 tamment à Paris, car toute la grandeur dont ceux de Guise  
 se faisoient redouter de tous costez, il en fut dit tout haut  
 en plain hostel de ville (les nouvelles entendues de l'emprison-  
 nement du Prince de Conde) que lon ne souffrirout pas  
 le sang de France estre foulé par des estrangers. Ces bruits  
 firent haster le procez au Prince de Cōde lequel on yoloit

faire

faire mourir enuiron le dixiesme de Decembre : Quant au Roy de Nauarre, ils tascherent de le faire mourir, & mesmes voulurent faire ce tort au Roy leur neueu que de leur seruir de bourreau à esprendre son propre sang. Et comme il ne estoit plus qu'executer ce coup pour puis apres en faire infinies d'autres, Dieu frappa François 2. d'un apostume en l'oreille dont il fut estouffé finalement & mourut le cinquiesme iour de Decembre 1560. Ceste mort rompit leurs entreprin- ses, & les effraya de telle sorte au commencement, que quand ils cognurent qu'il n'y auoit plus d'esperance, ils s'allerent enfermer dans leurs logis, plains de crainte & de frayeur incroyable, d'où ils ne partirent d'un iour où de deux, iusques à ce qu'ils eussent assésurée de la Royne mere & du Roy de Nauarre que rien ne leur seroit fait : Toutes- fois ils ne furent si malauisez qu'ils ne fissent des leur sortie porter en leurs logis soixante ou quatre vingts mil francs qu'il y auoit de reste à l'espaigne : en sorte que les finances du Roy estoient toutes espuisées : mais nul ne s'y opposa, ce qui fut trouué encores plus estrange, & fit cognoistre clairement, que cela ne se faisoit sans le consentement de la Royne mere, qui vouloit maintenir son autorité par la leur. Et à dire le vray, si elle ne les eust portez, ils donnoy- ent alors du nez en terre : mais les ruses & pratiques de ce costé-là merite vn autre discours.

I'oubliais vn autre trait de meschancete de ceux de Guise à l'endroit de leur neueu. Voulās se lauer les mains de toutes choses passees, & les reietter sur la puissance & volonté absoluë, encores que ce fust vn enfant qui n'eust le sens ny la discretion de pouuoir examiner ny entreprendre telles choses & de si grande importance, ils obtindrent aisément de luy, qu'il parleroit doucement & amiablement au Roy de Nauarre. Ce qu'il fit trois iours auant que tomber ma- lade, déclarant que ceux de Guise n'auoyent iamais rien entrepris contre luy ny cōtre les siens: mais que de son pro- pre mouuement & contre leur auis il auoit fait emprison- ner le Prince de Condé son frere. Le prioit d'ainsi le croire, & d'effacer pour l'amour de luy & de la Royne sa mere toute la mauuaise opiniō qu'il pourroit auoir cōceüe de luy. Ce qui leur seruit grandemēt puis apres : car ayant tiré ceste confession de la bouche du Roy, lequel ils faisoient mentir vilainement en cest endroit, ils nierent puis apres fort &



ferme tout ce qu'on leur pouuoit obiecter, chargeans de tout le dos du trespasſé, & voulans combattre tous ceux qui diroyent qu'ils euſſent rien entrepris de leur teſte.

Outre les pratiques ſuſnommees avec les eſtrangers: ſous le nom du Roy, à l'iſſue des eſtats, les forces de France deuoient eſtre parties en quatre armées conduites par les Mareſchaux de S. André, de Briſſac & de Thermes, & du Sieur d'Aumale pour faire lerauage qu'on peut penſer. Car outre la ſubuerſion entiere de tous les eſtats, & la ruine des plus grandes & anciennes maiſons qu'on deuoit attaquer, fuſt pour cauſe de la Religion, ou pour auoir tenu le party des Princes, ou pour auoir mal parlé du Roy, & autres infinis moyens, la France deuoit eſtre reduite à la façõ de viure du Turc, afin qu'il ne fuſt en la puiſſance d'aucun de s'eſleuer puis après contre la tyrânie de ceux de Guiſe. Que ſi par importunité lon pardonnoit à quelqu'un, c'eſtoit à condition de perpetuelle ignominie. Outreplus, le Cardinal auoit vſé de telle diligẽce, qu'il n'y auoit coin au Royaume, des habitans duquel il n'eũt les noms & ſurnoms, ſ'ils eſtoient de la Religiõ, ou gens de faction & entrepriſe, pour leur pouuoir nuire & ne s'eſtre rengez à leur deuotion. Ce qu'il auoit recouuré par le moyen des apoſtats & ſeruiteurs ſecrets qui alloient ordinairement rodans çà & là pour ſonder les cœurs & volõtez des hommes: en ſorte que tels truans eſtoient les iuges & dreſſoyent les ſentẽces de mort de tout le monde. Or auoyent-ils deliberé d'animer tellement le peuple, contre ceux de la Religion ſpecialement, qu'il ne leur faudroit point d'autre bourreau: & n'eſtoit pas queſtiõ en ce faiſant de dire, Je n'en ſuis pas, car les ſentences en deuoient eſtre pronõces par les moines & autres preſcheurs attiltrez pour aller par tout. Ceſte licence au peuple s'appelloit laſcher la grande leutiere, pour mot du guet, & n'y auoit endroit en France qui ſe fuſt peu exempter de ceſte calamité. Le Roy d'Eſpagne s'eſtoit tellement auancé de ſon coſté, ſelon le temps & la promeſſe qu'il auoit faite à ceux de Guiſe, que deſia cinq ou ſix mil Eſpagnols auoyẽt prins la route de Bearn, pour ſurprendre la Royne de Navarre à l'improuiſte, la mettre à mort avec ſes enfans, & faire pareil massacre tant de ſes ſuiets que de ceux de la France: & en ce faiſant arreſter & rompre les forces qui eſtoient en Guyenne. Mais les nouuelles venues à l'Eſpagnol de la mort du

Roy,



Roy, & que la Royne de Nauarre les auoit descouuerts, & s'estoit tellement fortifiée dans ses places fortes, q̄ mal aisément la pouuoit-on auoir sans long siege: ne sachant quel ply prendroyent les affaires, & craignant d'auoir à dos par ceux mesmes qui auoyent fait venir ses troupes dās le pays, entre lesquels Monluc estoit des premiers, sous la promesse du Conté d'Armignac, ils se retirerent sans rien exploiter, ioint que les lettres qu'ils auoyent du Roy pour le passage à trauers Bayonne (qui est l'vne des principales forteresses & clefs du Royaume) fust en grand ou en petit nombre, & le mandement de leur aider de viures, artillerie & munitions tāt qu'ils en voudroyent n'eussent eu aucune force ne vertu apres la mort dudit Seigneur quelques expresses & accompagnées de menaces qu'elles fussent.

Si ceux de Guise s'estoyent outrageusement portez durant la vie de ce ieune Roy leur neveu, ils ne recouurerēt pas leur hōneur en sa mort. De son viuāt ils en firent si bonne garde que nul n'en approchoit que par leur mercy. Je laisse à parler comment ils le manierent en particulier. Car outre ce qu'ils le firent souler de plaisirs de la chair auant qu'il eust aage, ils remplirent sa maison de corruptions & infametez. Et pour le grand desir qu'ils auoyent que leur niece eust des enfans, & cependant sachant bien que François estoit mal disposé à cela, ayant les parties generatiues du tout constipees & empeschées, ils laisserent approcher d'elle plusieurs courtisās, à qui il ne tint pas qu'elle ne deuinist bien fertile. Encores suis-je honteux de sauoir qu'en vn tableau qu'un certain Italien Luquoys trouua moyen de faire porter en la chambre du Cardinal de Lorraine avec lettres du Pape, au lieu d'une nostre dame de grace, ledit Cardinal, la Royne sa niece, la Royne mere & la Duchesse de Guise estoient peints au vif, les corps nuds, ayans les bras au col, & les iambes entrelacées ensemble. Je voudrois auoir oublié les ordures execrables que j'ay ouy raconter de luy & de ses freres par ceux qui estoient à la Cour du viuant de François 2. & qui estoient tesmoins des choses qui se manifestoyent presque aux yeux de tous. François auoit mesprisé tout le monde pour les honorer, mal contenté tout le Royaume pour les satisfaire & mettre au dessus, se preparoit à mettre le couleau en son propre sang (on peut bien dire en son propre corps) pour les sauuer: brief s'estoit hay

*Commēt  
ils se por-  
terent à  
la mort de  
François  
2.*

uy-mesmes pour les aimer, & rabaisſé pour les hauffer : fut-il onques peſtiferé plus abandonné que ce corps fut d'eux meſmes ? Il en alla ainſi . La couſtume obſeruee de tout temps en France apres la mort des Roys eſt telle , que leurs plus fauoris & ceux qui ont conduit & manié leurs affaires , doyuent les accompagner iuſqu'au tombeau , & durant quarante iours qu'ils ſont gardez & ſeruis ſolennellement , attendant leurs funerailles . Ayans donc ceux de Guiſe fait garder eſtroitement ceſte ceremonie apres le trespas de Henry, & le Duc de Guiſe y eſtant doublemēt attenu & obligé, pour auoir eu (auec le ſouuerain commandemēt) l'eſtat de grand Maiſtre de France, qui y aſtrint notamment ceux qui ont telle dignité : tant y a toutesſois que nuls de tous ceux de la maiſon de Guiſe ne firent ceſt hōneur à leur Roy & maiſtre & mary de leur niece , lequel viuant leur eſtoit tant cher:ains par leur conſeil & auis fut enuoyé iour & nuict ietter dans le tombeau de ſon pere, ſaïs autre pōpe ne ſolennité funebre. Dont auint vn brocard que le Roy ennemy mortel des Huguenots n'auoit peu empêcher d'eſtre enterré ſuy-mesmes à la Huguenotte . Ce qui amena ceux de Guiſe leurs partiſans à ce point , fut l'aſſemblée des eſtats où ils vouloyent aſſiſter, pour crainte que l'on decretast quelque choſe contre eux , & auſſi que leur abſence fiſt cognoiſtre à tout le monde la differēce entre leur gouuernement furieux & illegitime, & celui des Princes du ſang, du Cōeſtable, de Montmorency ſon aiſné & des trois freres de Chaſtillon : & que par ce moyen la cauſe & racine de la contagion qui infectoit la Republique fuſt retrāchee, choſe qu'ils craignoyent plus que la peſte , voyans bien que s'ils n'y donnoyent ordre , on cognoiſtroit qu'ils eſtoyent la vraye cauſe & ſource du deſordre. Mais ſur tout ils auoyent à gouuerner vne femme , la fermeté de laquelle leur eſtoit grandement ſuſpecte , ayant l'Amiral au pres du Roy ſon fils, auquel alors elle deſeroit beaucoup, autant qu'elle s'en pouuoit ſeruir pour adoucir les Princes & les eſtats . Ils ſe doutoyent auſſi qu'ils n'auoyent les talons pluſtoſt tournez de la Cour ou du maniement des affaires , que l'on ne fiſt vne infinité de plaintes , la verification deſquelles ne pourroit eſtre deſnice par la Royne mere ny autres de leurs amis, attendu que le crime de leſe maieſté trottoit en campagne . Ces occasions meurent ceux de Guiſe à quitter &

renuerſer

renuerser toutes bonnes loix & obseruations accoustumées  
 és funerailles. Le Cardinal s'en voulut excuser sur le Roy  
 de Nauarre & les Chastillons, disant qu'ils l'auoyent ain-  
 si auisé au conseil, par ce qu'il n'y auoit argent pour employ-  
 er en cest oeuvre pitoyable, combien que les quatre vingts  
 mil liures tirees par luy & son frere des deniers venus de  
 Poictou y eussent esté plus que suffisantes. Aussi en furent  
 ils taxez publiquement des lors. Car le corps ayât esté ame-  
 né à S Denis par Sanfac & la Brosse, où il fut enterre sans  
 aucune solennité ny ceremonie Royale, deux iours apres  
 l'enterrement, lon trouua attaché avec deux espingles sur le  
 drap de velours qui estoit sur le corps dudit Roy François  
 vn petit billet de papier contenant ces mots. *On est mesire  
 Tanneguy du Chastel? mais il estoit François.* Dont chacun au  
 commencement ne faisoit que rire: mais en fin y ayant pêsé  
 de plus pres, fut iugé que c'estoit autre que lon n'estimoit.  
 Tanneguy auoit esté premier Chambellan du Roy Charles  
 septiesme, & despendit huiet vingt mille liures pour faire  
 enterre solennellement son maistre, qui ne luy furent ren-  
 dus que trois ans apres. Il fist ceste despenſe de ses deniers,  
 voyant le corps estre abandonné d'vn chacun, tous les  
 Seigneurs s'estâs retirez aupres de Loys onzième son fils,  
 nouuellement entré en regne, & lors estant au pays bas où  
 il s'estoit retiré estât en la male grace du Roy son pere. Cest  
 escrit dōc fut interpreté pour vn regret fait au nom du Roy  
 François, se voyant delaisſe, & mesme destitué d'vn tel chā-  
 bellan qu'estoit Tanneguy: & puis disant (comme s'il se  
 reprenoit) qu'il ne se faloit esbahir de la bonté & deuoir de  
 Tanneguy, pour autant qu'il estoit François, & non estrā-  
 ger: voulant l'auteur de cest escrit attacher par ce moyen le  
 Duc de Guise, lequel auoit rauy à la maison de Longueuille  
 l'estat de grand Chambellan.

Nous auōs veu la mauuaise entree de ceux de Guise sous  
 le regne de François premier. Du temps d'Henry second Deporte-  
mens de  
ceux de  
Guise sous  
le regne  
de Char.  
les 9.  
 leur ambition remplit de sang l'Alemaigne & l'Italie leur  
 auarice mit en vente & comme au plus offrant les loix &  
 toute iustice, espuisâ les bourses des riches & des pources par  
 infinies exactions dont s'ensuyuirent les calamitez sans  
 nombre. Sous François second lon ne sauroit dire laquelle  
 des deux a esté la plus grāde en eux, la rapine ou la cruauté.

Vray est que la cruauté se monstra beaucoup plus, comme

nous l'auons ia monstre & le mōstrerons encor. Mais sous Charles 9. les vices susdits & plusieurs autres & toutes les ombres de leurs vertus se monstrent au iour. Et en cest endroit se presentent tant de discours par trop veritables, que ie me trouue perplex, ne sachant lequel prēdre tant le nombre est espais de ceux qui se presentent desia. Or ie m'assure d'vne chose, c'est qu'il n'y a au iourd'huy François (s'il est vn peu cognoissant des affaires du mōde) qui ne puisse faire vne autre legende d'actes particuliers de ceux de Guise, s'il veut prendre le loisir d'en rassembler ce qu'il en fait. Par là i'espere estre excusé si i'esbauche seulement ceste besongne qui demande plus de mains & de cerueaux.

Le Roy François estant mort cōme dit est, & le Cardinal luy ayant fait prononcer ces paroles, lors qu'il rendoit l'esprit, Seigneur pardonne moy mes fautes, & ne m'impute point celles que mes ministres ont faites sous mon nom & autorité: ceux de Guise prindrent vn nouveau Cōseil, qui fut de despouiller la peau de Lyon, qu'ils ne pouuoient plus retenir, sans manifeste danger d'estre trainez à l'escorcherie & prendre celle du renard. Ils se resolurent donc de poursuiure leur chasse par le moyen de la Roynie mere. Ils luy promettēt donc, si elle les veut fauoriser de luy tenir la main a ce qu'elle tiene le premier rang. Et pour luy donner martel en teste, luy alleguent q̄ les Princes ainsi mal traitez par sa conuiuēce ne pourroyent de moins q̄ luy en vouloir mal & tascheroyent de l'abaisser, afin d'esleuer le Cōnestable, & ceux de Chastillon, pour puis apres faire d'autres changemēs. Que les Estars la degraderoient, si elle n'alloit au deuant par derriere & que combien qu'eux de Guise fussent reculez, ils auoyent encor tant de seruiteurs & d'amis, que pour long temps ils pourroyēt faire teste aux Princes. Ce pendant elle retiendrait son autorité, & ses fils deuenās maieurs, le gouuernement des Princes & de leurs partisans se serueroient. La Roynie aussi fine qu'eux se sceut bien seruir de ceste offre, & balancer tellement entre les deux partis, enclinant tantost d'vn costé, tantost de l'autre, que iusqu'à present la place luy est demeuree à la cōfusion de tous ceux qui l'y ont esleuee. Ayans trouué vne si bōne aduocate, qui les reconcilia de plain faut avec le Roy de Nauarre, & fit entendre qu'elle vouloit maintenir ceux de Guise contre tous leurs ennemis & mesdisans: ils commencerent à s'asseurer.

Restoit

Restoit de combattre le Prince de Condé, lequel ne se laisseroit manier comme le Roy de Nauarre son frere. Puis ceux de Mommorcency & de Chastillon La dessus se presenta la plus belle resolution pour eux qu'il estoit possible. Ils entendent que le nombre de ceux de la Religion croissoit en tous les endroits de France, sauoyent que le Prince de Condé & ceux de Chastillon en estoient ouuertement: car le Prince en auoit fait declaracion manifeste, ayant dit & fait dire par Genly & autres au Roy François qu'il en estoit voirement: & mesmes au plus dur temps de son affliction, il fit desloger de sa chambre vn prestre que ceux de Guise y auoyent enuoyé pour chanter messe. Quant à l'Amiral, il auoit en plaine assemblee de Fontainebleau presenté leur requeste au Roy, tendant a fin d'auoir temples & exercice public. Il auoit aussi declaire à la Royne mere qu'il ne quitteroit iamais la Religion, & s'offrit a en disputer contre le Cardinal. Le Sieur d'Andelot en estoit deslong temps; & lon scait qu'à l'accusatiō du Duc de Guise & sollicitatiō du Cardinal, il en cuida estre tué par le feu Roy Henry qui luy demanda vn jour si la messe estoit bonne: & a quoy le Sieur d'Andelot fit response qu'il la tenoit pour chose profane & meschante. Le Cardinal de Chastillon aussi commençoit a se distraire tout ouuertement de la Papauté. Voila vn beau moyen ce leur semble de bander le Connestable contre le Prince & contre ses neueux de Chastillon, ce qu'ils sceurent faire bien dextrement comme nous le verrons en son lieu. Ils concluent donc de laisser faire ceux de la Religion, disant le Cardinal de Lorraine, qu'il n'y auoit encorés presques que des belistres qui en fussent, & falloit y laisser entrer les plus grands & riches, afin de gagner en les ruinant. Or en faisant la guerre à ceux de la Religion, ils descochoyent plusieurs coups d'vne mesme fiesche: car premierement ils acqueroyent la faueur du Pape, du Roy d'Espaigne, & d'autres desquels ils seroyent secourus. Secondement ils sauoyent que les principales villes du Royaume estoient si auant enfonces en la Papauté, qu'on ne leur arracherait pas ceste vielle peau, que premierement on ne se fust bien battu, & que le moindre appuy que ces villes trouueroyent, elles feroient toutes les resistances possibles. En troisieme lieu ils connoissent l'humeur de la Royne mere qui ne permettroit pas aisément que ses enfans fussent enseignez en



la Religion, veu qu'elle n'en auoit point: & que le semblant qu'elle en pourroit faire pour vn temps, seroit afin de gaigner ceux de la Religion & les opposer aux Catholiques, afin que tandis qu'ils seroyent aux prises les vns contre les autres elle maniaست tout, & qu'on n'eust loisir de considerer & espluscher ses actions. Il y auoit aussi tāt de seruiteurs secrets qui pour piller & fourager ceux de la Religion deuiendroyent trescatholiques: & les Cours de Parlement estoient tellement composees que si la iustice n'estoit reformee depuis la teste iusqu'à la plante des pieds, iamais ceux de la Religion ne prospereroyent: Qu'ayans le Roy & ses freres en leur main par le moyen de la Roynes, il leur seroit aisé de combattre sous ce bouclier tous leurs ennemis, & en auoir raison avec le temps, voire se faire plus grands que iamais par leur ruine. Vne chose les faschoit, asauoir la longueur du temps & l'inconstance de la Roynes mere, laquelle le Duc de Guise craignoit plus que toute autre chose ensemble la viuacité du Prince de Conde. Pour pouruoir à tout cela, ils procurent (comme nous auons veu cy dessus) leur reconciliation avec le Roy de Nauarre, qui fut faite tellement que par mesme moyen il quitta à la Roynes mere en la preséce du Duc de Guise & du Cardinal, tout tel droit qu'il pouuoit pretendre à la régence du Roy & du Royaume, sans iamais en rien le quereller, requerir & accepter: & signa ceste quittance de sa main. Ayans ce point, ils conclurent que le Prince en s'attachant a eux auroit de si fortes parties que bien tost on en auroit le bout, & que ce seroit le moyen pour bander son frere cōtre luy, & tirer l'un au party Catholique. Quant à la Roynes, ils se resolurent de la laisser vn peu balancer de costé & d'autre, en attendant curieusement qu'elle seroit l'issue de ses deportemens. Or sauoyent puis qu'elle auoit cest auantage sur le Roy de Nauarre, qu'elle pratiqueroit si bien aux Estats que son autorité seroit approuuée. Ils auoyent aussi telle part en elle, que son inconstance leur seroit proufitable: & que l'an ne se passeroit point qu'ils ne vissent quelque remuement pour se remettre au dessus.

Vne partie de ce dont ils voyoyent desia quelques apparences auint: mais ils furent bien trompez en d'autres endroits, Car apres auoir bien tourmenté ceux de la Religion par quatre guerres ciuiles & vn horrible massacre sous

Charles



Charles IX. Cinq d'eux demurerent à la poursuite, le plus inepte demeurant derriere : & quant au plus apparent sorty d'eux a sauoir le Duc de Guise à present il est en tel estat que (comme quelqu'un disoit de ceux qui vont sur mer) on ne sauroit dire s'il est vif ou mort, ayant receu vntel soufflet de Dieu sur le visage, qu'il en demeurera fletty à iamais. Or faut il considerer les maux qu'ils firent au Roy & a tout le Royaume, & à eux mesmes aussi en toutes ces guerres ciuiles. Et tout ainsi que les tonnerres n'esclatent point que premieremēt par signes precursseurs ils n'ayent donné quelques tesmoignages de leur proche arriuee, aussi ceux de Guise auant q de foudroyer sur la France firent leurs bruits sourdement, & pratiquerent ça & la pour se rendre plus furieux apres s'estre fortifiez. Estans deliurez de ce qu'ils craignoient le plus, a sauoir de la recherche de l'emprisonnemēt du Prince, par l'assurance que la Royne leur en mit au cœur, & leur reconciliation avec le Nauarrois, auquel ils auoyent fait declarer par le Roy defunct, que c'estoit luy seul qui de son autorité auoit fait emprisonner le Prince : ils deliberent se trouuer aux Estats pour voir ce qu'on y diroit, & seruir à leur cause en tout ce qui leur seroit possible. Et auāt que passer oultre se liguent avec les Cardinaux de Tournon & d'Armignac, le Duc de Nemours, les Marefchaux de S. André & de Brissac, les Sieurs de Rēdā, Martigues, Sipierre, Mōluc, la Motte Gondrin, la Suze, Sanffac, Saigny & autres Seigneurs & Capitaines en grand nōbre, qui s'attendoient bien de se faire grands & riches & opulēs par les guerres ciuiles, que les Princes (disoyent ceux de Guise) vouloyent introduire avec le changement de Principauté. Ils firent venir le bruit de cela aux oreilles du Roy de Nauarre qui au lieu d'y pouruoir comme il deuoit, comença à perdre cœur, & quitter son autorité, comme il le monstra plus amplement tost apres. De la s'ensuiuit le reiglemēt arresté au Conseil du Roy le 21. de Decembre 1560. touchant le Gouuernement de l'Estat du Royaume, ou la Royne mere fut mise au haut bout.

Cependant, y eut vn incident qui fut fort agreable au Cardinal, mais il en eut courtoisie. Les deputez d'environ quarante Bailliages & Seneschaussées du Royaume, maintenoient leur pouuoir estre expiré, d'autant qu'ils auoyent esté mandez par le Roy François : & puis qu'il estoit mort

il falloit auoir nouueaux memoires. Le Cardinal & les siens pensoyent bien que si cela ne rompoit du tout les Estats, il les reculeroit vn peu, & ce pendant ils pratiqueroyēt: mais par la sagesse du Chancelier & autres, fut conclud qn'on passeroit oultre: attendu que la dignité Royale ne mouroit point, mais estoit representee par son successeur. Aussi quand il fut auenu que telles declarations eussent reculé les Estats, c'eust esté au grand defauantaige de ceux de Guise, car es nouueaux memoires ils eussent aussi des nouuelles recharges: & la Roynie mere qui craignoit bien que les François, ne decourussent l'escrit qu'elle auoit tiré par menaces du Roy de Nauarre, ne l'en fissent retenir & chastier comme il appartenoit, pour auoir fait vne si destoyale traficque de la liberté du peuple; hasta la besongne, en quoy ceux de Guise gaignerent le plus.

Ils pensent là dessus (ce qui estoit vray aussi) qu'en ceste assemblee lon traiteroit des affaires de la Religion & de l'Estat. On sauoient ils tres-bien que la Religio seroit comme le principal pour ce coup, dōt ils furēt ioyeux au possible, & delibererent d'employer toutes leurs forces à pousser la roue de ce costé là, afin q' l'autre demeurast indecis, ou que s'ils estoient amenez à ceste necessité que de rendre compte de leur administration, ils presentassent leurs comptes en champ de bataille, pour estre examinez & clos à la pointe de l'espee, en quoy ils s'asseuroient de faire vn si beau broüillis que leurs tors s'esgareroyent avec les droits de partie aduersē. Il faut donc parler de la Religion à bon escient, & en faouler les Huguenots, qui tous ardans d'affection n'auoyent autres desseins qu'à penser à la liberté de leurs consciences: estimans que la seruitude du corps seroit supportable aucunement, pourueu que le principal leur demeurast en son entier. Mais ils se mescoytoient fort: car l'vn ne pouuoit subsister sans l'autre, & pieté sans iustice a vn foible fondement au monde. Comme aussi quelques vns sceurent bien dire deslors, q' si le reestablissemēt de l'Estat du Royaume en son ancienne splendeur, & la reformatio de la Religion ne marchoyēt d'vn mesme pied, on en verroit auenir encores de plus grāds maux q' iamais. l'experience l'a mōstré à ceux qui n'en vouloyent rien croire lors: & Dieu vueille que les François en apprennent finalement quelque chose.

Après ceste resolution, le Cardinal de Lorraine faisoit

pratiquer d'auoir la charge de faire la harangue au Roy pour les trois Estats : ce qui luy fut accordé par le Clergé : & fut enuoyé vn nommé Griueau chanoine de la S. Chappelle par deuers le tiers estat, pour luy faire consentir : auquel incontinent à haute voix fut respondu qu'ils ne vouloyent prendre pour porter la parole pour eux celuy duquel ils auoyent intentiō de se plaindre : qui fut cause qu'il se deporta d'en parler à la Noblesse. Et ce pendant empoigna ceste response pour en faire son profit : car il donne à entendre aux Catholiques, specialement au Clergé, que les Huguenots leur marcheroyent sur le ventre, si de bone heure on ne s'opposoit à leurs dessains, que par consequent il falloit insister sur ce point en la harangue pour le Clergé, & que puis que le tiers estat s'estoit ainsi descouuert & auoit protesté à luy qui estoit vn des principaux membres du siege Apostolique, les autres moindres ne seroyent espargnez. Ainsi pour haranguer pour le Clergé fut choisi vn nommé Quintin de ferreux de la Religion, & pour lors Docteur en Droit Canon à Paris. Pour la Noblesse le Sieur de Rochefort, & Leige Auocat à Bordeaux pour le tiers Estat.

On commença à tenir les Estats le xiii. Decembre en la salle destinee à ceste fin : Les Cardinaux de Lorraine & de Guise & le Duc de Guise s'y trouuerent pour ouyr & faire leur prouffit des harangues. Le premier iour se passa ouir la harangue du Chancelier, laquelle les toucha peu ou point du tout, car il ne parla qu'en general. Le député du tiers Estat s'arresta à taxer l'ignotance, l'auarice & les dissolutions des Ecclesiastiques sans rien particularizer. Rochefort pour la Noblesse aprouua le gouvernement baillé à la Roynē mere, taxa quelques vices au Clergé & en la iustice & apres auoir prié le Roy de maintenir la Noblesse en ses priuileges, presenta vne requeste par laquelle estoient requis des temples pour les gentils-hommes de la Religion. Quintin pour le Clergé fit vne longue harangue ou inuectiue contre ceux de la Religion, s'attachans aux plusgrands, & notamment en termes couuerts à l'Amiral, qui auoit présenté la requeste de ceux de Normandie qui demandoient des temples.

Ces harangues mirent le Cardinal de Lorraine & ses freres en bonne esperance : car ils s'asseuroient que si l'affaire de la Religion s'auançoit, comme il y en auoit manifeste appa-

Estats  
d'Orle-  
ans.

apparence ce seroit le vray moyen de separer le Connestable d'auec ceux de Chastillon, & faire iouster les Catholiques auec ceux de la Religion: pendant quoy ils se rendroient les plus forts.

*Comptes  
demandez  
à ceux de  
Guise.*

Sur ceste pensee suruint vn autre fait qui leur seruit, encor que la poursuite leur en fust desauantageuse. Les deputtez pour visiter le Cayer des Estats ayans fait leur rapport au Conseil priue: le Roy de Nauarre & le Chancelier furent aux Cordeliers pour parler aux Estats là assemblez, où fut commencé a parler de la restitution des dons immenses, de l'acquit des debres du Roy, & autres choses semblables: ce qui ne se pouuoit faire que premierement ceux qui auoyent manie les finances & affaires d'Estat, sous les Roys Henry & Francois second ne fussent amenez a grande extremite. La Royne mere, s'esquiuoit fort de telle ouuerure, s'assurant qu'a cause de sa regence on ne la recherchoy aucunement, & se deliberoit de pousser ceste roue pour humilier ceux qu'elle voyoit, trop haut pres d'elle. Le Roy de Nauarre n'auoit rien eu ni manie. Ceux de Guise, le Connestable, & le Marechal de S. Andre estoient les plus auant en ceste besongne: il n'y auoyt qu'un seul remede pour rompre ce coup, c'estoit de troubler le Royaume. Pour y paruenir, & dresser plus commodement tout ce qui y estoit requis, au lieu de poursuiure ce point, Dieu iustement courroucé & voulant commencer a battre les Francois, permit qu'on remist les Estats au mois de May ensuyuant. C'estoit ce que ceux de Guise cerchoient. Le Connestable n'en fut pas marry, encor qu'il eust protesté quelquesfois d'estre prest a rendre compte.

Le Roy de Nauarre ayant alors quelque affection à la Religion, le Prince de Condé son frere & ceux de Chastillon desiroient auancer la Religion, ce qui se pourroit plus commodement faire, en laissant cest autre point pour vn temps, lequel ils pensoient aisément reprendre puis apres.

Mais ils furent trompez par l'ambitiō de la Royne mere, la fetardise du Roy de Nauarre, les pratiques de ceux de Guise hors du Royaume, & dedans auec le Connestable qu'ils separerent de ses neueus sous pretexte de la Religion.

Ce pendant le ieune Roy auec ses freres estoit es mains de la mere qui ne faisoit que regarder qui seroit le plus fort,

*pour*

pour se ietter entre ses bras avec ses enfans. Et d'autant qu'elle auoit beaucoup souffert sous ceux de Guise, pendant le Regne de François second, elle eust bien desité que ceux de la Religion fussent demeurez les maistres, s'assurant de les manier plus aisement: car elle auoit desia en main les Chastillons, le Roy de Nauarre se laissoit mener: quāt au Prince de Condé, pourueu qu'elle ne s'opposast a la reparation du tort qu'il prétendoit luy auoir esté fait en son emprisonnement, elle le reputoit comme sien, & mesmes estimoit auoir en luy vn nouveau baston pour atterrer ceux de Guise. Le Cardinal de Lorraine sentant q̄ ce Prince estoit sur le point de venir en Cour, deslogea sous couleur d'aller faire residence en son Archeuesché de Reims, laissant neātmoins son frere le Duc de Guise, pour espion, & avec autres, pour pratiquer selon q̄ les affaires se porteroient. Le Prince de Cōdé ayant esté bien receu du Roy, & iustificé en plain Cōseil luy fut permis d'en poursuiure plus ample declaration. Pour cest effect il s'en va à Paris. Tost après, suruint vn autre differēt qui mit le Duc de Guise & ses partisans en grād peine, & sans la ruse de la Roynne mere qui leur seruit bien a ce coup, & s'en vouloit aider à l'auenir, ils estoient desarçonnez à ce coup. Le Roy de Nauarre sollicité par quelques vns qui voyoyent assez cler, se plaignit à la Roynne de la trop grāde autorité qu'vsurpoit le Duc de Guise qui tousiours luy auoit esté aduersaire, & que ledit Duc de Guise demeurant aupres du Roy, luy n'y pourroit demeurer, & qu'il faloit que l'un ou l'autre deslogeast de la Cour. La Roynne ayant fait quelques excuses pour rompre ce coup, le different vint iusques là que le Roy de Nauarre se borta le lendemain estant tout prest à partir, suiui des Princes du Sang, du Connestable, & de ses neueus de Chastillon & de plusieurs autres Seigneurs. Or la Roynne voyoit bien que si elle demourroit avec ceux de Guise seulemēt, c'estoit fait d'elle & d'eux aussi. Pour se cōseruer feint de procurer leur biē, afin qu'ils ne luy nuisissent, s'ils demeuroyent maistres encore vne fois. Elle enuoye querir le Connestable, & luy fait commander par le Roy de ne bouger. Ce qu'estant obtenu, tout fut rompu, & le Roy de Nauarre enuoya querir ses mulets qui estoient desia à Melun.

*Ruses de  
ceux de  
Guise  
pour a-  
mener le  
Royaume  
aux troubles.*

Ce different diuulgué fit courir vn bruit que la Roynne supportoit ceux de Guise contre les Princes du Sang: tellement



ment que les Estats particuliers de Paris s'auācerent & vindrēt à toucher aux principaux points del'estat : l'article de la redditiō des cōptes n'estoit oublié. Ceux de Guise estoient expressément nōmez, & fut arresté de procurer par toutes voyes q̄ defences leur seroyent faites d'entrer au Cōseil priuē, q̄ premieremēt ils n'eussent rendu cōpte. D'un costé la Royne mere s'eslouissoit fort, voyant ceux de Guise ses plus grands ennemis en dāger par tel moyen. De l'autre elle estoit en quelque peine à cause de sa regence. Pour y pouruoir, elle fait vn nouuel accord avec le Roy de Nauarre par le moyen du Connestable, en telle sorte que ledit Roy se contenta : & sollicita le Duc de Guise de faire l'humble : ce qu'il fit, plus qu'il n'auoit accoustumé auparavant. Elle enuoye querir le Prince de Condé pour venir signer cest accord, & se sert du Mareschal de Montmorency, pour faire amēder & corriger ce qui auoit esté atresté aux Estats particuliers de Paris touchant le gouuernement du Royaume.

Le Cardinal manioit toutes ces affaires avec la Royne mere, à laquelle il escriuoit souuent, & cōbien qu'ils se desfassent l'un de l'autre : toutesfois ils auoyent tant mesnagé ensemble, qu'il leur estoit necessaire pour leur conseruation de prēdre ce chemin. Ils se hayssoyent donc extremement, & ce pendāt faisoient de merueilleux efforts a se maintenir l'un par l'autre. Et de fait, on peut dire q̄ toutes les ruses de ceux de Guise ne leur ont iamais tāt serui que le seul esprit de la Royne mere, qui les haïssoit extremement neantmoins : cōme au cōtraire iamais gens n'ont fait tant de mal & de bien à la Royne mere, qu'ōt fait ceux de Guise. Mais cela se verra en autre endroit plus cōmode. Icy lon void le pource Roy & le Royaume flottans & attendans le naufrage. Pour à quoy paruenir, ceux de Guise ne se sentās assez forts, sous pretexte de Religiō se ioignent au Connestable, l'enaigrissent contre l'Amiral son neveu qui faisoit ouuerte profession de la Religion, s'aidās de tous artifices propres. Le Mareschal de S. Andre leur seruit bien aussi en cest endroit : car il souffla en l'oreille du Cōnestable q̄ ce qui auoit esté proposé par les Estats de repeter les dōs immēses, auoit esté pcuré par l'Amiral, pour tenir son ōcle en bride, & l'amener à la necessité de cōsentir au changemēt de la Religion. Le Cōte de Villars irrité contre l'Amiral qui auoit aigrement taxé ses mauuais deportemens en Languedoc, poussa aussi à la rouē, tellemēt  
que



que nonobstant les remonstrances du Mareschal de Montmorency, le Connestable s'adioignit à ceux de Guise, qui faisoient leurs ligue, & desroboyent au Roy & au Royaume ses seruiteurs pour mettre tout en desordre.

Aussi les Catholiques se sentans fortifiez par telles ligue *Es motion des Catholiques.* cōmencerent à se mutiner. Et la dessus, par l'artifice de ceux de Guise on fait courir le bruit que l'Amiral s'estoit fait fort de chasser la messe & planter la Religion en France sans aucun bruit. Les Catholiques de Beauuais Euesché du Cardinal de Chastillon commencerent & furent suiuis de ceux d'Amiens, Ponthoise & autres lieux. A Paris y auoit des moynes & autres telles trōpettes de sedition qui auancerēt bien les desseins de ceux de Guise. De fait, sur ces premiers remuēmēs furent enuoyees lettres patentes à tous les iuges Royaux du Royaume pour faire defenses de ne s'entr'inuier aucunement par ces mots des Papistes & Huguenots & pouruoir à la seurcté & liberté des vns & des autres.

La Cour le Parlemēt de Paris, ou il y a beaucoup de seruiteurs de la maison de Guise, enuoya de grandes remonstrāces au Conseil priuē sur cest edit: mais ce n'estoit qu'une nouuelle menec pour brouiller tousiours les cartes, comme on dit, & adiouster vne desordre, a vn autre sous le plus beau semblant du monde, a sauoir la Religion.

Ce pendant, le Cardinal de Lorraine attēdoit a Reims le ieune Roy, qui y fut menē à son sacre, ou le Duc de Guise fut encor si audacieux q̄ de se ietter entre le Roy de Nauarre & le Duc de Montpensier, pour marcher apres le Roy, s'esgalāt par telle ruse aux Princes du sang. Le Cardinal se sentant deslors assez fort, ayant gaignē ce point de mettre la religion en auant pour manteau de son ambition: fit lors de grandes plaintes contre ceux de la Religion, remonstrāt que pendāt le colloque arrestē pour reigler tels differens, le Roy ne deuoit permettre qu'on innouast chose quelconque. Et q̄ pour y pouruoir seulement, estoit requis de faire vne loy inuiolable, & a ceste fin assembler au Parlement de Paris les Princes Seigneurs & autres du Cōseil priuē du Roy, pour y dresser vn arrest qui seroit gardē solēnellement puis apres. Mais cela estoit vne nouuelle ruse pour acheminer les desseins de la maison de Guise. Le Cardinal sauoit bien qu'en l'assemblē assignee aux prelatz pour auiser aux affaires de la religion, ou les ministres aussi seroyēt appelez, ne se vuideroit

rien:

rien: & que les choses estans ainsi en suspens, le Roy seroit pressé de permettre l'exercice public de la Religion: ce que auenant le Prince de Condé & ceux de Chastillon s'auanceroient pour luy faire teste puis apres. Pour obuier à cela, il pensoit qu'en preuenant ce colloque par vne autre assemblée à Paris, où il auoit gens à commandement, il pourroit gagner quelque chose, ou pour le moins bander tellement les vns contre les autres, qu'il n'y perdrait rien. Voila pourquoy ceste assemblée fut assignee, la Royne mere s'y accordant presque, pour mesme consideration, & les partisans contraires, estimans que cela seroit pour le bien du Royaume.

Les lecteurs peuuent icy penser, quelles allees & venues faisoient ceux de Guise, tant dedans que dehors le Royaume, & comme ils remuoient ciel & terre pour se maintenir. L'Espagnol & plusieurs Princes d'Italie estoient avertis de iour à autre de l'estat des affaires, & la Royne mere seruoit alors de secretaire à la maison de Guise, pour faire de belles despesches sous le nom du Roy, à l'encontre des Princes du sang, lesquels cependant on faisoit bien semblant de fauoriser, car en ce temps asauoir le 13. iour de Iuin 1561. l'arrest de l'innocence du Prince de Condé fut prononcé au Parlement de Paris, les chambres assemblees, en robes rouges, en la grand chambre du plaidoyé, en presence du Duc de Guise, des Cardinaux de Lorraine & de Guise entre autres. Et sur la fin du mois d'Aoust ensuyuant fut faite la reconciliation entre le Prince & le Duc de Guise.

En ces entrefaites fut adressé l'edit de Iuillet en ceste assemblée de Princes & Seigneurs au Parlement de Paris: où ceux de la Religion obtindrent plus de relasche & liberté qu'ils n'auoyent onques eue au parauant. Et fut arresté aussi derechef, que les Prelats seroyent appelez, & saufconduit donné aux ministres de la Religion, afin de chercher quelque moyen d'accord. Lors le Cardinal commença à bien esperer de ses affaires. Car il s'asscuroit auoir vn moyē tout prest de bander les Eglises de la confession d'Ausbourg contre les reformees de France, à cause de la Cene: ce qu'auenant, outre ce qu'il exposerait les ministres en risce, il empescheroit le Prince de Condé & ceux de Chastillon qui leur fauorisoyent ouuertement, de se preparer à resister aux desseins & appareils que le Duc de Guise & ses partisans

com-

*Edit de  
Iuillet.*

cōmençoient à dresser pour rēdre leurs cōmpres à la pointe de la lance : d'autant qu'ils ne pourroyent estre secourus des Alemans ausquels on feroit aisément à croire, que tout le remuemēt du Royaume ne procédoit que de la Religion.

Ceux de Guise eussent biē voulu trouuer quelque moy- *Pratiques pour rui-*  
 en d'endormir le Prince de Condé, pour le distraire d'auec *ner le*  
 ceux de Chastillon. Mais leur conscience les redarguoit, tāt *Roy de*  
 pour luy auoir fait mille maux qu'ils le laisserent là pour *Nauarre.*  
 vn temps, se contentans de luy mettre en teste le Connestable & autres. Mais auāt que venir aux mains, vn autre coup leur sembla necessaire. Ils voyoyent le Roy de Nauarre assez bien d'accord avec le Prince de Condé son frere, & pensoyent (ce qui estoit vray) que si ces deux Princes demouroient vnīs, la Noblesse Françoisē & le peuple, nonobstāt la Religion, se rangeroit de leur party, pour chasser ceux de Guise, ou les amener à contē, & remettre le Royaume par consequēt en son ancienne splendeur. Ils font entēde aussi à la Roynē mere le dāger qu'il y auoit pour elle, si ces deux Princes demeurent vnīs. Elle les prie d'y pouruoir de leur costé, & promet de s'y employer du sien, cōme elle fit par des moyēns fort deshonestes declairez au discours de son gouuernemēt. Quant à ceux de Guise, dès le viuant de François 2. ils auoyēt attiré à leur seruice le Sieur d'Escars Chābellan du Roy de Nauarre, & auoyent descouuert par cest espion tous les secrets de son maistre, lequel ayant descouuert la desloyauté de ce d'Escars par lettres escriptes de sa main, l'auoit chassé d'arriere soy. Il s'estoit rengé à demy avec ceux de Guise, qui luy font dire, qu'il tasche par tous moyēns de se remettre en grâce avec son ancien maistre, pour leur y faire seruice comme au parauant, asauoir l'entretenir en ses plaisirs, faisant les messāges vers les dames de la Cour, & le destourner par consequent de la Religio, qui requeroit vn renoncēment à toutes lasciuetēz & puantises. Lors tant de gens furent mis en besongne, que Descars fut r'appelé par le Roy de Nauarre dont plusieurs commencerent à preuoir de grans maux. Au contraire lon assure que au rapport qui fut fait au Cardinal de Lorraine touchant ce rappel, il commença à rire, & frappant (à sa coustume) d'vne main dans l'autre, dit à quelques vns, que de long temps, il n'auoit ouy nouuelles plus agreables.

Il a esté dit icy dessus, que les Estats commencez à Orleans,

*Estats à  
Pontoise.*

ans, auoyent esté remis au mois de May. Depuis pour diuers empeschemens & par les menées de ceux qui ne vouloyent rendre compte qu'à cheual & à main armée, ils furent reculez iusques à la fin du mois d'Aoust à Pontoise, où ils auoyent esté assignes. Entre autres choses, ce qui toucha le plus ceux de Guise, spécialement le Duc de Guise qui y assistoit, fut ce que proposa le Sieur Bretagne en sa harangue pour le tiers Estat, touchant le mauuais mesnage desdits de Guise. Nous auons icy inseré ses propres mots, d'autant qu'ils sont notables. Vos suiets (dit-il parlant au Roy) ont esté trauaillez d'infinis subsides, tant ordinaires qu'extraordinaires, creues sur iceux, augmentation de gabelles, solde de cinquante mil hommes de pied, le taillon, les vingt liures sur chacū clochet du Royaume, huit escus leuez sur les officiers Rôyaux, six sur les Auocats de Parlement, quatre sur les bourgeois, vesues & artisans, deux sur les autres Auocats, Praticiens, Notaires & Sergens, emprunts, non emprunts, franchises, nouueaux acquests, deniers leuez apres la journee S. Laurent, alienation du domaine, aides, gabelles, erection des bureaux de la Foraine, fināces receues d'offices, tant anciennement que nouuellement erigees, la suppression d'aucuns d'iceux, deniers de confirmation, autres deniers prins sur les maisons & hostels de villes, deniers leuez des consignations, vaisselles d'or & d'argēt billonnées, munitions de guerre, viures pour les camps & armées mises sus depuis trente ans, cheuaux & harnois d'artillerie, assiette d'estappes, fourniture, vesture & nourriture de soldats, solde & payement de soldats en plusieurs villes particulieres, salpêtre & poudre fournis par le peuple, gaiges d'officiers, gendarmerie, gens de pied non payez, suppression de la traite Foraine, deniers de conuoy en Bretagne, & plusieurs autres sommes infinies, sous diuers noms & tiltres, tendans à mesmes fins d'auoir deniers de vos suiets. Au moyen desdites charges insupportables, se trouuent vos pources subiects tant languides, atténuez & afoiblis, qu'à present, Sire, ne leur reste à vous offrir & presenter autre chose qu'une bonne & loyale volonté. Se sont examinez à diuerses fois, & ont sonde rous leurs pouuoirs aux affaires de vostre Majesté: mais à leur grand regret se trouuēt desnuez du moyen de vous aider & secourir: vous supplians tres-humblement que vostre bon plaisir soit differer & remettre le secours  
qu'en

qu'en attendez iusqu'à autre tēps qu'ils auront repris leurs premiers pouuoirs par tous deuoirs qu'ils feront tant en labeur, industrie, espargne, sobriété, que bon traitement qu'ils reccuront de vostre Maiesté. Ne se peuuēt persuader, veu les grans subsides sur eux leuez durant les regnes des Roys Henry & François vos pere & frere (de bonne mémoire) que soyez demeuré redeuable de si grande somme. Et reduisans en memoire ce que les histoires anciennes tant sainctes que profanes nous ont peu laisser de l'antiquité pour tesmoignage de leurs hauts faits, trouuent qu'il n'y eut onc Monarque, Roy ou Prince souuerain, qui soit demeuré debteur de si excessiue somme que le feu Roy Henry vostre tref-honoré pere, quelques longues & continuelles guerres que lesdits Monarques ayent soustenuës, ou bien entreprises pour l'augmentation des bornes & limites de leurs Royaumes & empires. Et à vray dire, la dette est si grande & excessiue, qui youdroit espuiser tous les thresors de vostre Royaume, & rechercher vos suiets particulieremēt, à grande peine se trouueroit or & argent en leur puissance concurrent à ladite somme. Et quoy que cela semble dur & difficile à eroire, est encores plus ennuyeux à vos suiets de l'entendre, qui n'ont pouuoir esgal à leur volonté. Cela les induit à croire que si grāde somme de deniers leuce sur vostre peuple, n'est entree entierement en vos coffres, ny conuertie au proufit de vos predecesseurs, ains par donations immenses & autres moyens sont demeurez pour partie entre les mains d'aucuns particuliers, les maisons desquels on voit reluire au detrimēt de vos subiets. Pour reparer telle administration, & faire qu'à l'auenir lon ne tombe en tel abisme de debtes, ils vous supplient tref-humblement ordonner aux financiers & superintendāns de vos finances, qui les ont manies & dispensees durant les regnes susdicts, de rendre & tenir compte de leur dite administration deuant tels deleguez qu'il vous plaira choisir, les deputez de vos Estats y assistans, que chacune Prouince & gouuernement nommera. Par ce moyen seront refroidis & reuoequez ceux qui pourroyent à l'auenir commettre mesme faute.

En l'un des premiers articles contenu au Cayer presenté par le tiers Estat, ces mots estoient contenus, Qu'on fit rendre compte aux Comptables, & à ceux qui auoyent manié les finances, ne pouuant penser ledit tiers Estat qu'il n'y

eust de grans abus qui se pourroyent verifier. Et cependant, que tant ausdits comptables qu'autres qui auoyent eu le maniemment d'icelles finances, mesmes estant du Conseil priué, fust interdit l'accès audit Cōseil, & l'exercice de leurs offices, iusques à ce que lesdits comptes fussent rendus ailleurs qu'en la chambre des comptes, & en la présence des deleguez des Estats, & le reste & debet qui s'en trouueroit fust payé. Que principalement lon eust esgard à la reuision de comptes de ceux qui auoyent receu les emprunts particuliers des sommes de huit, six, quatre, & deux escus, vingt liures pour clocher, munitions de viures, fournitures d'estappes & autres pour la guerre, deniers leuez sur les villes closes après la iournee S. Laurent, & de tous autres deniers extraordinaires leuez sur le peuple. Que les deniers des pensions excessiues & donations immēses fussent repetees sans excepter personne (fors la Roynemere, qui auoit sollicité les deputez du tiers Estat à faire ceste poursuite pour les causes declairees au discours de son gouuernement) d'autāt qu'il apparoiſſoit euidemment, que ces deniers n'auoyent esté employé à l'vsage auquel ils estoient destinez pour la subuention des affaires du Roy.

On peut penser, si ces instances grattoient ceux de Guise. Le Cardinal vn peu plus retenu que son frere le Duc, faisoit semblant de rien, comme se preparant à faire dresser ses comptes. Mais on lisoit au visage de l'autre mille menaces contre l'Estat du Royaume, dont les effects se monstrerent cinq ou six mois apres. Pour pouiruoir donc à leurs affaires ils resolurent, quant à la reddition des comptes, d'employer tous les moyens qu'ils auoyēt pluſt ost que souffrir d'estre amenez à ceste necessité, & que si les affaires de la Religion ne leur y faisoient ouuerture, ils la feroient eux mesmes, en se ruant avec leurs partisans sur ceux de la Religion, lesquels seroyent fauorisez du Prince de Condé, de l'Amiral, & d'autres Seigneurs: par ce moyen les comptes se broulleroient si bien, qu'avec le secours des estrangers ils pourroyent se hauffer plus que iamais, ayant ce beau pretexte de Religion, & s'asseurans par conséquent de la faueur de tous les Catholiques. Outre plus le Cardinal voyant tant de gēs de iour à autre se declairer de la Religion se sourioit à sa coustume, disant, que c'estoit curce aux gens de guerre qui n'auoyent plus de besongne, & vn beau moien pour con-



enter beaucoup de grans & petis, qui ne demandoient qu'à mordre. Il s'estoit accordé fort liberalement à la conuocation des ministres pour traiter de la Religion à l'oissy avec les Prelats du Royaume, qui s'y deuoyent trouuer pour auiser aussi de leur part à aider au Roy pour acquitter ses debtes. C'estoit en esperance de mettre les Ministres en debat avec les Alemans de la cōfession d'Ausbourg, ou (peut estre pource qu'il les estimoit ignorans, & en auoit souuentefois semé & fait semer les bruits de tous costez) pour les estonner par vne si norable assemblee, ou les rendre muets par son babil, & par les ergots de quelques Sorbonistes qui y estoient appelez pour disputer. Mais ayant pense depuis de plus pres à ce fait, il s'auisa d'un autre expedient, asauoir de tenir prest le Legat du Pape, afin que si ce colloque aidoit plus à ceux de la Religion qu'il n'estimoit, on rompist l'assemblee de bonne heure, en faisant renuoyer les Ministres au Concile general, assigné à Trente. C'estoit aussi pour tousiours contenir en bride la Roynne mere, l'inconstance de laquelle ceux de Guise redoutoyent, à tort toutesfois, veu qu'elle sauoit mieux qu'eux comme elle auoit à iouer son rolle: mais elle ne le leur cōmuniquoit pas tout, ains seulement ce qu'elle cognoissoit plus conuenable à son auancement. Ils auoyent ia esbrailé le Roy de Nauarre par le moyē du Sieur Descars, il falloit acheuer de mettre bas ceste paroy pour en recueillir les pierres & en lapider ceux de la Religion, comme ils le firent puis apres. Belles promesses estoient necessaires en cest endroit: à quoy ce Legat du Pape & l'Ambassadeur d'Espagne sollicitē par ceux de Guise, tindrent bien la main.

Quant au colloque de Poissy, d'autant que les discours *Colloque de Poissy.* & harangues en ont esté publicz, & le serōt encor plus amplement quelque iour, il n'est besoin d'en faire icy long recit, ioint que nous en toucherons quelque mot en parlant cy apres de la Theologie & Religion du Cardinal, & de la belle harangue qu'il fit en ceste assemblee le 16. de Septembre 1561. Pour cest endroit, ce sera assez de marquer quelques siennes ruses contre le repos du Royaume. Premièrement pour faire penser aux idiots, que les Prelats n'estoyēt pas là assemblez pour neant, il fit dresser force articles de l'institution des Euesques, de la dignité des Eglises Cathedrales & autres semblables choses, sans toucher à vn seul

point de doctrine, s'estas tous resolu de ne rien accorder aux ministres, de peur d'estre estimez seducteurs, & faite vne breche irreparable à la dignité du siege Romain. Par ce moyen le Cardinal se moquoit du Roy & de tout son Conseil qui pretendoyent à quelque reformation.

Les Ministres de l'Eglise reformee du Royaume, auoyent esté exhortez d'y enuoyer quelques vns de leurs compagnons, ce qu'ils firent, obeyssans aux mandemens du Roy & de la Royne mere. Pierre Martyr & Theodore de Beze y furent aussi appelez de Zurich & Geneue où ils estoient professeurs en Theologie, afin d'auiser plus meurement à tous differens. Le Cardinal se voyant vn peu trop auant embarqué en affaires où il estoit encores bien neuf, s'auisa de preuenir. Si tost que The. de Beze fut arriue, il l'alla trouuer en la chambre de la Royne mere, où apres plusieurs propos, il fut contraint dire audit de Beze, qu'il estoit fort ioyeux de l'auoir ouy parler, & qu'il esperoit qu'ils se trouueroient d'accord ensemble. Mais c'estoit vne seinte, comme aussi la dame de Cursol sur le depart luy sceut dire qu'il estoit homme de bien pour ce soir-là, & que le lendemain on verroit le contraire: ce qui apparut en ce que ces supposts publierent que le Cardinal auoit fermé la bouche à de Beze, & fait condescendre à son opinion. Le contraire estant apparu en la harangue faite par ledit de Beze, le Cardinal se trouua tellement confus, qu'estant assemblé avec les Docteurs & Prelats, il ne se peut contenir de dire, à la mienné volonté qui cestuy-là (parlât de Th. de Beze) eust esté muet, ou que nous eussions esté sourds. Là dessus ayant esté aduisé qu'il falloit respondre, vn docteur de Sorbonne nommé Despense, intime seruiteur de la maison de Guise & quelques autres bastirent la harangue que le Cardinal prononça depuis, sans respondre à ce que les Ministres auoyent mis en auant, s'arresta à deux poincts, à sauoir de parler de l'Eglise, de quelques questions qu'en dependent: puis de la Cene du Seigneur. En quoy il ne fit autre chose que replastrer les paralogismes des Sophistes. Partant i'ay estimé superflu d'insérer icy ceste harangue, laquelle se verra plus proprement en l'histoire de nostre temps: Ceste longue harangue fut suyvie, des amplex discours de Despense, Saintes, & de quelques Iesuites & Moines, ausquels les Ministres respondi-

rent suffisamment. Or le Cardinal estoit bien aise de les eschauffer les vns contre les autres, afin que cela venant à euryer aux auditeurs, on remist le tout à vne cōference priuée ou par escrit, & que cepēdant le Pape enuoyast vn nouueau mandement pour acheuer de fermer la bouche aux Prelats qui n'attendoient autre chose. Apres que par quelques mois on eust ainsi debatū, finalement la Royne voyant que sur vn seul article des images, les Prelats & Ministres n'estoyent peu tomber d'accord, & que mesmes lesdits Prelats auoyent leurs Docteurs mal vnīs en ce poinct, fit rompre le Colloque, dont les Sorbonnistes furent si aises, qu'ils ne se peurent contenir de faire mil demonstrations d'amitiē à Theodore de Beze leur principal ennemy, des mains duquel ils eschappoyent à tout autre marche qu'ils n'auoyent esperē. Mais le Cardinal auoit fait escrire par le Pape aux Prelats, que sur peine d'excommunication ils remissent la decision de tels differens au Concile de Trente: ce qui vint bien à propos à ces messieurs fort empeschez. Quant à la confession d'Ausbourg, qui estoit le piege où le Cardinal pensoit pousser les Ministres, ils se porterent si prudemment, qu'il y tomba luy mesme, tellement que toute la honte en retourna sur luy.

Durant ces disputes fut dressé cest edit tant celebre, nommé l'edit de Januier, par l'auis & consentement des plus grands & notables du Royaume. C'estoit l'expedient pour appaiser les troubles, & ramener l'estat en son ancienne splendeur. Mais la maison de Guise ne pouuoit porter cela, pource qu'auant que les choses fussent paisibles en France, on demanderoit leurs comptes, desquels n'y auoit rien de prest, sinon en enrollemens de soldats, & forces tant estrangeres que du Royaume: à quoy ils s'employeroient, comme s'ensuit.

Cy deuant nous auons veu, comme sous pretexte de Religion, ils auoyent mis barre entre le Connestable & ses neueus de Chastillon, afin de se fortifier de plus en plus, & ruiner bien aisément lesdits de Chastillon qu'ils hayssoyēt & redousoyent extiemement. Le Connestable commença peu à peu à se despiter contre ses neueux, sur tout après qu'on luy eust rapporté, qu'ils estoient cōme les moisis avec la Royne mere, de ce que les Estats demandoient cōpte, en

Edit de Januier.

De Triumvirat & de sa capitulation.

quoy il seroit recherché, combien qu'il n'y fust à la vingtiesme partie pres tant embrouillé, que ceux de Guise. Ayans gaigné ce principal officier de la Couronne, ils adioignirent à eux le Marechal de S. André, qui estoit des plus comptables, comme chascun scait. Lors ils dressent vn conseil entre eux, le Cardinal ayant tousiours ceste astuce de mettre la Religion en auant pour mieux conduire ses desseins, & font vne resolution telle. Premièrement, que la superintendance de tout l'affaire seroit baillee au Roy Catholique, qui pour commencement se plaindroit du Roy de Nauarre fauteur d'vne nouuelle Religion: le solliciteroit par belles promesses de tout quitter & se renger au party Catholique. Si le Nauarrois demeure obstiné, l'Espagnol continuant ses promesses accompagnées quelquefois de menaces, fera leuee en Espagne tout l'huiuer: puis luy courra sus à l'improeuë. Et s'il y a resistance, le Duc de Guise se declairera chef de la confession Catholique, & ira assaillir le Nauarrois d'autre costé, qui sera tost accablé. L'Empereur & les Princes Catholiques, Alemans, priez d'empescher le secours au Nauarrois. Les Suisses Euangeliques retenus par les Catholiques. Ceux de Geneue assaillis & entierement exterminiez par le Duc de Sauoye, pour donner frayeur aux autres.

Voila quant au premier point de leur ligue. Et pour le regard de la France, ils arresterent de ne pardonner en façon quelconque à la vie d'aucun qui autrefois eust esté de la Religion. La commission des Massacres baillee au Duc de Guise, qui aussi eut la charge d'exterminer toute la race des Bourbons, de peur qu'à l'auenir, quelqu'un ne sortist d'eux, pour faire vengeance des massacres, & remettre sus la Religion.

Ils deuoyent puis apres faire la guerre aux Princes protestans, & prester à l'Empereur & aux Princes Catholiques, les deniers amassez des confiscations, de tant de gens de la Religion qu'on deuoit faire mourir en France. Les Cardinaux, Euesques & autres S. Peres deuoyent se cotiser pour fournir aussi aux frais de ceste guerre sacree.

Ces beaux articles furent dressez par le Cardinal, & le Connestable ne s'arrestant qu'à sa religion, estoit lors tât esblouy, qu'il ne pouuoit voir que combien que sa maison ne fust nommée, toutesfois elle ne pourroit demeurer debout, celles de Chastillô & de Bourbon estans mises bas.

Quant

Quant au Marechal de S. André, il estoit bien aise de voir ainsi dresser les comptes pour ce qu'au lieu de rendre le plus receu, il esperoit encoir faire nouuelle recepte, sans riē mettre ny iamais rendre compte. Outre ce que ceux de Guise tendoyent à mesme but, ils se persuadoyent de se baigner à ce coup au sang de tous leurs ennemis.

Pour effectuer ces choses, ceux de Guise partēt de la Cour sur la fin de Nouëbre, faisans cognoistre leur mescontentement, lequel peu de iours apres augmēta encoires à cause des procédures tenues contre le Duc de Nemours, qu'ils auoyent suscitē pour raurir & emmener en Lorraine Monsieur d'Orleans, & l'ayant à leur deuotiō le faire chef de leur entreprise. Car ils vouloiēt en tout euenemēt auoir plusieurs cordes en leur arc, poutce qu'ils ne scauoyent pas encores bien quelle route prēdroit la Royne mere. Toutesfois estimans que si le Roy de Nauarre estoit de leur retenue, elle n'oseroit se rengier avec le Prince de Condé, de peur d'estre degradée, ils tascherēt d'acheuer ce qu'ils auoyent desia commencé par Descars & autres, par l'induction d'vne vaine esperance de luy faire rendre ses pays, à quoy le Pape (disoit sō legat, q. estoit lors vn des premiers sollicitēurs) tiendrait la main, pourueu q. le Nauarrois voulust maintenir l'Eglise Romaine. Ce qu'il declara tost apres chassant ses Ministres, & se reuoltant de la Religion; au moyen dequoy il eut beaucoup de difficultez à la verificatiō de l'edit de Ianuier.

Quelque temps au parauāt ceux de Guise auoyent escrit Voyage au Duc de V. Virtemberg, Prince protestant, le prians de vouloir entrer avec eux en conference de la confession d'Aus- de Sa-  
bourg, en laquelle ils donnoyent esperance de vouloit estre  
instruits. Pour cest effect ils se trouuent à Sauertz pres de  
Strasbourg, & là eurent telle communication avec ce Prin-  
ce enuiron le quinziēme de Feurier 1561. qu'apres auoir  
promis tous de suyure la doctrine de la confession d'Aus-  
bourg, & le Cardinal ayant confesē pour cest effect avec  
Breence principal ministre du Duc de V. Virtemberg, en fist le  
Duc de Guise requit ce Prince en faueur de la Religion, de  
faire tant enuers les Princes protestā, veu que de toute an-  
cienneté la maison de Lorraine auoit estē de l'Empire, par  
mesme moyē luy & ses freres, fussent anquez pour Princes  
de l'Empire, ayans voix & suffrages aux iournees Imperia-  
les, & par ce moyen se peussent soustraire & exempter de la



Souueraineté du Roy de France, empêcher le secours que les Princes protestans pourroyent donner à ceux de la Religion, se fortifier de ce secours, & pour recompense ruiner les Princes protestans puis après. Comme ce Prince estoit après à les faire receuoir, comme ils se desiroient, nouvelles vindrent en Allemagne du massacre de Vassy, executé par le Duc de Guise au depart de Sauerne pour venir en France. Les Princes protestans s'estonnoyent fort de cela, & non sans cause, veu qu'il n'y auoit que trois iours, (par maniere de dire) que le Cardinal de Lorraine auoit donné d'une main des coupes d'argent doré à Brenee & à quelques autres Ministres d'Allemagne, & d'une autre il saccoieoit ceux de la Religion.

*Massacre  
de Vassy.*

Mais leur deliberation auoit esté fait au parauant de venir forts & armez en la ville de Paris & de là à la Cour, pour s'asseurer de la ville, puis des personnes du Roy & Royne, pour executer plus aisément leur conspiration. Et pour donner quelque honneste couleur au retour du Duc de Guise, il se fait rappeler par le Roy de Navarre. Toutes fois il n'eut la patience de porter sa cholere iusques à la Cour, il la descarga sur ceux de Vassy, estât accompagné de troupes en armes, suyuant ce qui auoit esté arresté plus de trois mois au parauant, que chacun pratiqueroit autant de Gentils-hommes & gens de guerre qu'il seroit possible, pour se trouuer en armes es environs de Paris au commencement de Mars, dont la Royne mere & le Roy de Navarre auoyent esté suffisamment auertis. Mais au lieu d'y pouruoir, ils remettoient les affaires de iour à autre, iouans en vne mesme tragœdie chascun son personnage, d'une estrange sorte. Ainsi le Duc de Guise se trouua au temps assigné à Nantueil, où il fut incontinent rencontré par les autres partisans, desquels on peut coniecturer le dessein, sur ce que la pluspart s'acheminans là, firent leurs Pasques, & se mirent en estat q̄telles gens ont accoustumé, quand ils font leur compte de se hazarder à quelque petilleuse entreprise. Cependant, la Royne mere ayant en auis que pour eiter les troubles, il seroit bon que le Duc de Guise (ainsi armé contre les ordonnances du Roy) ne passast par la ville de Paris, où le Preuost des Marchans & autres des principaux l'attendoyent. Sur ce, la Royne luy manda par plusieurs fois qu'il eust à la venir trouuer en sa maison de Monceaux, où il seroit le bien venu, luy descendant



fendant tres-expressément de n'entrer en ladite ville de Paris avec telle cōpagnie, afin d'euiter les incōueniens qu'elle preuoyoit en deuoir auenir, attendu mesmes l'exécution & boucherie faite tout freschement à Vassy, de laquelle on demandoit tresinstantment iustice au Roy & à elle: & n'oyoit-on pour ce regard, que plaines & doléances par tout le Royaume. Le Duc de Guise manda pour responce qu'il ne pouuoit aller vers elle, d'autant qu'il estoit empesché à festoyer ses amis qui l'estoyent venu voir. Depuis, la Royne luy ayant escript pour la seconde fois à mesme fin, il ne fit aucune responce, ains apres auoir receu ses amis, suyuant la conclusion de l'entreprise, print son chemin d'un autre costé, & accompagné de ses adhérians vint à Paris par la porte S. Denis. Son entrée fut en armes descoquertes, qui estoit l'estat auquel on l'auoit tousiours veu marcher depuis la iournee de Vassy. A ceste entrée assistoyent le Preuost des marchans & trois des Escheuins contre toute coustume, en grande compagnie, avec grandes acclamations de gens attiltrez, comme si le Roy mesme y fust entré en personne, iusques à crier à haute voix, Viue monsieur de Guise: sans toutesfois que luy ny autres de sa compagnie monstrassent que cela leur deplust aucunement.

Ceux de Guise ayans rûé ce premier coup cōtre l'autorité du Roy & l'estat du Royaume, passent outre, & commencent à tenir dans Paris vn conseil à part. La Royne estât encor à Monceaux, & receuant tous les iours nouueaux aduertiſsemens, que ceux de Guise vouloyent se saisir de la personne du Roy & d'elle, delibera de haster son partement, & se retirer en lieu de sùreté. Elle vint à Melun, en deliberation de gagner Orleans, pour attendre plus grand iour aux affaires qui alloient tomber en merueilleuse cōfusion. Mais ceux de Guise enuoyent le Preuost des Marchans crier après elle que Paris & tout estoit perdu, si elle n'y venoit, d'autant que le Prince de Condé y estoit armé, & les Parisiens desarmez. Fait tant que les armes sont rendues aux mutins, pour fortifier le Duc de Guise & les siens à l'encontre de leurs ennemis, & auoir moyen de se saisir tant plus aisément de la personne du Roy.

*Comence  
mens des  
premiers  
troubles.*

Et pour auancer encor mieux la besongne firent venir à Paris le Roy de Nauarre: car ce Preuost des marchans crioit sans cesse à la Cour, que la presence du Roy de Nauarre

estoit

siroit

## LA LEGENDE DV

estoit necessaire à Paris, pour empescher les troubles : mais c'estoit tout au rebours, par la menée de ceux de Guise, car des qu'il y fut arriué, le cōseil se tint entr'eux plus estroitement qu'au parauant, & fut arresté entre autres choses, de se bien asseuer de la ville de Paris, & en chasser le Prince de Condé, comme celuy seul qui nuisoit à l'entreprise de s'aller saisir du Roy & de la Royne mere, les amener à Paris, & les ayant à commandement executer sous leur nom & auctorité ce qui estoit deliberé. Ils firent tant en fin que la place leur demeura, & qu'ils enleuerent le Roy & la Royne & les amenerent au Louure. Cela fait, quelques remonstrances que le Chancelier & autres missent en auant, fut arresté de faire guerre ouuerte au Prince de Condé & aux siens.

Sur ces entrefaites fut enuoyée au Roy la protestation & declaration faite de la part du Prince, contenant les causes qui l'auoyent contraint de prendre les armes, asauoir pour remettre en plaine liberté la personne du Roy & de la Royne, maintenir les edits, & nommement le dernier sur le fait de la Religion : offrant de se retirer en sa maison, le Duc de Guise faisant le semblable. Le Cardinal de Lorraine & ses freres, avec leurs adherans voyās qu'il y auoit deux poincts qu'il falloit subtilement couvrir, sauoir est la captiuité du Roy, & la contrauention de l'edit de Ianuier : procurerent à toute diligence l'expedition d'une declaration en date du huitiesme d'Auail, par laquelle ils font confesser au Roy, que le bruit de sa captiuité est vne fausse & mensongere calomniee controuuee par le Prince de Condé & les siens, pour s'excuser de ce qu'il faisoit, & que luy & la Royne estoient en aussi grande liberté que iamais, & que de leur bon gré ils estoient venus à Paris, pour remedier aux troubles. Ces lettres furent incontinent publiees en Parlement, où ceux de Guise auoyent force creatures.

Pour se moquer ecores mieux du Roy & de tout le Royaume, ils s'auiserēt d'une autre finesse ce leur sembloit, c'est que huit ou dix iours apres autres lettres furent dressées, par lesquelles est declairé que le Prince de Condé sous vne fausse & simulee couleur de Religion estoit saisy en sa personne, par aucuns seditieux qui le tenoyēt en leur puisssace.

Et pour donner vn coup à l'edit de Ianuier, font expedier autres lettres du mesme mois, par lesquelles ils donnent à entendre sous le nom du Roy, qu'il est auerty q plusieurs

en grand nombre se sont retirez à Orleans & ailleurs, sous pretexte d'une crainte qu'ils disent auoir qu'on les vueille rechercher en leurs consciences, & empescher qu'ils ne iouissent de l'edit de Ianuier. Declaire qu'il n'a entendu reuoker cest edict que pour la ville de Paris, faulxbours & banlieue d'icelle, où il ne veut qu'il y ait autre exercice que la Religion Romaine. Ces lettres cōtraires à l'edit de Ianuier, sont incontinent receues & verifiées en Parlement.

Cela fait, ceux de Guise apres s'estre seruis du Connestable pour rauager à Paris, & du Roy de Nauarre pour en chasser ceux de la Religion, enuoyent le Marechal de S. André d'un costé, qui fait de cruels exploits, amassent forces de toutes pars, & se mettent en campagne avec de terribles actes d'hostilité contre ceux de la Religion. Nous touchons icy les choses sommairement, pource que c'est assez d'en faire mention en passant, & en laisser l'ample deduction à l'histoire de nostre temps. Premièrement ils se seruent de la Roynne mere, du Roy de Nauarre, du Parlemēt de Paris, & de leurs seruiteurs secrets, pour rompre la constance du Prince de Condé, le separer de ceux de Chastillon, qu'ils vouloyent ruiner les premiers. Mais n'ayans rien gaigné de ce costé là (d'autant que voyant leurs embusches, il s'estoit fortifié à l'encontre d'icelles, tant dedās que dehors le Royaume) ils vindrent à la violence faisans commettre massacres de ceux de la Religion en plusieurs villes du Royaume, assaillans de violence incroyable, quelques places où lesdits de la Religion s'estoyent retirez pour leur seuteté. Encorés que le Roy de Nauarre fust Lieutenant general de nom, & que le Connestable demeurast en son estat, si est-ce que tout passoit par les mains de ceux de Guise, qui en moins de rien mirent tout le Royaume en armes. Puis avec le Connestable & le Marechal de S. André, le Duc de Guise présente une requeste au Roy & à la Roynne mere, par laquelle ils requeroient l'entier aneantissement de la Religion, dont l'exercice public auoit esté accordé quatre mois au parauant. Que tous officiers de France domestiques du Roy, de ses freres & soeur, tous officiers de iustice, de guerre, comptes & finances du Royaume, & autres ayās charge, administrations ou commissions du Roy, tinssent la mesme religion & en fissent declaration expresse, les refusans, delayans ou contrecuenans priuez de leurs estats & offices, gages, char-

Premiers troubles.

Requeste du Triumvirat.

ges, administratiōs ou cōmissiōs. Que toutes personnes Ecclesiastiques eussent à faire le semblable, à peine d'estre priuez de leurs benefices. Que les tēples desmolis fussent rebastis avec satisfactiō de to<sup>r</sup> interests, & les demolisseurs punis. Que les armes prinſes sans cōmandemēt expres du Roy de Nauarre fussent laissées: & que ceux qui perseueroyent à les porter cōtre la volōté dudit Roy de Nauarre, Lieutenant general & representant la personne du Roy es païs de son obeissance, fussent declairez rebelles, & ennemis du Roy & du Royaume. Qu'au Roy de Nauarre seul appartienne d'auoir & assembler forces en France, & qu'il les retienne durāt quelques mois, pour appaiser les troubles. Cela fait, ils promettoyēt s'en retourner en leur maisons, voire au bout du monde (si besoin est, disoient-ils) en exil perpetuel. Cela fut le 4. de May 1562. Le mēme iour ils se font commander par le Roy de ne bouger de la cour: parquoy ils adressēt vne autre requeste à la Roynne mere, par laquelle ils offroyēt se retirer en leurs maisons, pour obeir (disoyēt-ils) au Roy de Nauarre. A ces requestes fut suffisamment respōdu par le Prince de Cōdē, qui descouurit biē amplemēt les artifices de ceux de Guise, se fortifiāt de iour à autre, tant p<sup>r</sup> l'autorité qu'il auoit en cest endroit, que par les lettres que la Roynne mere luy en escriuit, où elle luy recōmādoit la mere & les enfās, condānant assez ouuertement la tyrannie de ceux de Guise.

Lon ne sauroit bonnement dire, si les finesses de ceux de Guise firent point autāt de mal q̄ leur violence. Quant aux cruauitez que leur satellites exercerent en diuers endroits de la Frāce, specialemēt les gens de guerre, & quelques massacres en certaines villes, la posterité sera plus estōnnee lisant ceste histoire de l'an 1562. q̄ nous qui auōs esté spectateurs des horribles tragœdies que le Cardinal & ses freres iouoyent à la ruine du Roy Charles & du Royaume. Mais il y a eu quelques finesses en leurs deporttemēs qu'il est besoin de remarquer. Le Prince de Condē auoit des troupes bien armées & resoluës au combat, cōposées des plus vaillāns Seigneurs, Capitaines & soldats François. Ceux de Guise craignans la touche, tâchoyēt de dissiper ceste armee par alées & venues, à quoy la Roynne mere & le Roy de Nauarre estoient employez. Cependāt ils surprenoyēt tousiours quelques places, tenues par ceux de la Religio, amassoyēt argēt, & appelloyēt les estrāgers de toutes parts au butin, se voians

en danger d'estre batus enuiron la fin de Iuin, par l'entremise du Roy de Nauarre, obtiennent trefues, & deux iours apres le Duc de Guise part du cāp de Baugency avec quelques autres: & tout incōtinent l'on mande au Prince de Cōdē que suyuāt ce qu'il auoit requis, le Duc de Guise & les siens s'estoyent retirez en leurs maisons. La Royne estoit embouchée des propos qu'elle deuoit tenir au Prince au pourparler qu'elle eut avec luy, & ausdits Seigneurs de la Religio; cōme le Duc de Guise le donna assez à entendre par vne lettre qu'il en escriuidit au Caidinal de Lorr. laquelle fut surprise, en datte du 25. de Iuin, laquelle i'ay icy inseree, pour mōstrer tant mieux l'esprit de bōnes gens. Le vous enuoye (escriit-il) ce porteur en diligence, pour vous auertir q̄ tout fut hier accordé, & vous puis dire qu'il y en a qui sont biē loin de leur compte. Nostre mere (la Royne) & son frere (le Roy de Nauarre) ne iurent q̄ par la foy qu'ils nous doiuent, & qu'ils ne veulent plus de conseil que de ceux que sauez. Conclusion, la Religion reformee, en nous conduisant & tenant bon (comme nous ferons iusques au bout) s'en va à vau l'eau, & les Amiraux autāt mal qu'il est possible. Toutes nos forces demeurent entierement, les leurs rompues, les villes rēdues, sans parler d'edits ny de presches; ny d'administration de Sacremens à leur mode.

Le jour ensuyuant le partement du Duc de Guise & de ses partisans, le Prince de Condé partit pour s'aller mettre entre les mains du Roy de Nauarre & de la Royne mere à Baugency, où il passa à trauers l'armee de ceux de Guise, au grād danger de sa personne. La Royne mere estant venue à Tally village pres de là, fit bien cognoistre audit Sieur Prince, à l'Amiral & à quelques autres Seigneurs de la Religion venus là à son mandement, fit incōtinent cognoistre par sa responce, qu'elle estoit l'organe de ceux de Guise pour entretenir les troubles & partialitez. Car elle leur dit tout à plat, qu'il ne failloit point qu'ils s'attendissent que l'edit de Ianuier fust obseruē, ny qu'il y eust en France autre Religion que la Romaine, & que les Catholiques estoient si fortz & tant irritez, mesmement à Paris, que sans plus grād tumulte l'edit ne pourroit estre entretenu. Passant qu'ils se deuoyent cōtenter qu'on leur permettoit de viure en leurs maisons doucement, sans scandale, & sans estre recherchez, pourueu qu'ils n'y fissent aucūs presches, administration de



de Sacremens, ny autres exercices de leur Religion. Or ceux de Guise sachans bien que le Prince de Condé & ses associez estoient au parauant par plusieurs fois entrez en propos (comme aussi ils tindrent lors le mesme langage à la Roynne) que plustost qu'accorder de leur part qu'on forçast les consciences, & consentir à chose qui fust contre l'honneur de Dieu & sa doctrine, ils aimeroient mieux sortir du Royaume, voire aller en exil perpetuel: aduertirent bien expressement la Roynne de les attirer encor en ces termes par le moyen de cest abouchement, & les prendre au mot. Elle leur promit ce faire, ce qu'elle executa diligemment, car apres auoir declairé aux Princes & aux siens que leurs protestations touchant la manutention des edits & de la Religion n'estoient receuable, accepta l'autre point fort liberalement, assauoir qu'il valoit mieux qu'ils se retirassent de France, leur promettant de leur en faire expedier tant generalement que particulierement toutes telles lettres de seureté qu'ils demanderoient. Puis apres, tenant leur retraite comme assuree, commença à leur discourir du temps que le Roy seroit hors de minorité, & comme il y en auoit qui la menaçoient de la faire durer iusqs à l'aage de vingtans: mais qu'elle auoit bien delibéré de le faire majeur à l'aage de quatorze ans, & qu'elle s'asseuroit, si on luy vouloit en cela contredire, que le dit Sieur Prince & les siens ne faudroient de luy venir aider & assister. Elle ne se contenta pas de seruir si malheureusement à l'ambition de ceux de Guise, & à la sienne aussi: mais dès le soir mesme estant de retour à Talsy, despescha Ramboillet, pour estre le lendemain du grand matin au leuer du Prince & des siens, pour les hastier de partir, & luy rapporter le temps & l'heure qu'ils s'achemineroient pour se retirer hors du Royaume. Elle escriuit aussi vne lettre audit Sieur Prince, par laquelle elle promettoit luy faire tenir dix mil escus, là part qu'il seroit: monstrant par là, qu'elle seruoit d'instrument à ceux de Guise pour les chasser. En quoy chascun peut voir quelle route commença deslors à prendre la pource France, estant si malheureusement gouvernee.

Là dessus le Prince se retire en son cāp avec les Seigneurs qui l'accompagnoient, ayant premierement descouuert à la Roynne mere ce qu'il auoit descouuert des menées de ceux de Guise, pour se saisir de luy au retour de ce pourparler.



ler. Mais tant s'en faut qu'ils rompiſſent ſa conſtance, qu'aucontraire, apres s'eſtre reſolu de maintenir les loix & liberte de la patrie, & rendre ſon deuoir à Dieu & à l'Egliſe contre la violence des ennemis : il leur preſenta deux fois bataille. Mais le Duc de Guiſe & les ſiens qui au parauant ſe foyent tant en leurs forces, ſens & experience, que d'oſer dire, meſme deuant le Roy, qu'avec trois cens hommes d'armes, ils ne faudroyent de mener tellement battans tous les Huguenots, qu'ils auroyent bien à faire à gagner viſtemēt les coings du Royaume pour ſe ſauuer: lors avec toutes les forces qu'ils auoient pratiquees durant ſept ou huit iours, & depuis assemblees ſous le nom & autorité du Roy, ne peurent faire autre choſe ny trouuer meilleur expedient que de ſe deſrober & deſcamper de nuit pour gagner Blois, ville de nulle force, où ils trouuerent de pures habitans tous deſarmez, deſquels ils maſſacrerent les vns, noyerent les autres, violerent femmes & filles, & firent de merueilleux pillages : puis ayans ce paſſage ouuert, allerent ſaccager pluſieurs autres villes & ſouurrager vne bonne partie du Royaume. Le Cardinal ſuiuoit l'armee avec le Legat du Pape, pour couper chemins à tous moyēs & ouuerture d'accord, & pour entretenir les troubles, dont il ne faut pas plus certaine preuue qu'un memoire qui fut ſurpris alors, lequel il enuoyoit au Duc de Guiſe ſon frere & à ſes compagnons en leur camp à Blois, par Seure Contrerolleur de la maiſon de ſon dit frere. Ce memoire contenoit ces propres mots, entre autres: Quant à rompre & empescher ce qui ſe met de nouueau en auant pour accord, c'eſt ce qui eſt le plus malaiſe, & où lon a le plus de peine : & ne croyez iamais qu'on ſe garde d'y entendre & preſter l'oreille, & qu'il ſoit accordé s'ils ne ſe ſoumettent aux offres que la Royne dit leur auoir faites. Peu apres il adiouſte, Quant à ſe tenir pres de la Royne, tout cela ſe fait, & y fait-on tout ſon pouuoir ſelon l'inſtruction, ſans y perdre heure ny occaſion, & continuera-on. Quant au Pape, ce ſont longueurs ſi grandes que lon n'en peut venir à bout, & ne tient à en crier, voire à s'en courroucer. Quant au ſecours de Flandres, nous n'y voyōs rien de preſt que de grande lōgueur, & ſi en parla-on encores hier à l'Ambaſſadeur, qui dit auoir fait ſon deuoir d'en eſcrire à madame de Parme. Quant à Meaux, nous n'auons nulles forces pour y rien faire, on void ſi on les pourra attirer.

ren à serendre. N'oubliez le Mans & Bourges sur tout : & faites que parties d'où vous estes, ce ne soit à recommencer. Le meilleur est de vous hastier de desnichier vn peu rudement nos rebelles. Quant à la declaration de rebellion elle fut hier leue au conseil, & sembla bien à tous. Elle a esté dressée par les gens du Roy & deuoit estre aujourdhuy publicce. On dit qu'on a promis de ne rien faire sans vous : & vous l'enuoye-on pour y adiouster ou diminuer. C'est autant de temps, mais renuoyez la incontinent.

*Le Cardinal fait  
declairer  
rebelles  
ceux qui  
s'opposēt  
à ses des-  
seins.*

Ceste declaration de rebellion fut pratiquée par le Cardinal, afin de rompre les forces du Prince de Condé, & par ce moyen venir aisement à bout de ses desseins. Le 27. de Iuliet 1562. l'arrest en fut prononcé en Parlement à Paris. Mais le Prince & les siens ayans premierement recusé les esclaves de ceux de Guise qui se preparoyēt à faire ceste declaration, & mōstré puis apres l'iniquité d'icelle: le Cardinal n'auāça pas beaucoup de ce costé, sinon de faire cognoistre ses pratiques & rebellions, comme cela fut publié deslors en la remonstrance que ledit Sieur Prince & ses associez en firent à la Royne, où ses mots sont notables entre autres: Si on vient regarder d'vn droit oeil, les parties de ceste cause, on trouuera que ledit Sieur Prince & ses associez ont esté fausement declairez rebelles: par ceux qui le sont veritablement. Ils ont esté declairez seditieux par ceux qui depuis la mort du feu Roy Henry, ont causé tous les troubles auenus en ce Royaume. Ont esté declairez criminels de lese Maiesté par ceux qui oppriment la Maiesté du Roy, abolissent ses ordonnances, & abusent de son nom & autorité, pour establir leur grandeur au pris de sa ruine. Ceux là, ceux là sont criminels de lese Maiesté diuine, desquels les œures ont tousiours monstré qu'ils ont l'ambition pour leur Dieu, l'auarice pour leur Religion, & les voluptez de ce monde pour leur paradis. & dernière felicité: qui ont iuré de faire la guerre au Fils de Dieu, à sa parole & à ceux qui la maintiennent: qui sont acte d'Anabaptistes en reiterant le Baptisme des enfans ia baptisez selon l'ordonnance de Iesus Christ: qui ont les maisons plaines de rapines, & les mains sanglantes de cruauté. Ceux-là aussi sont criminels de lese Maiesté humaine, qui ont violé les edits du Roy, prins les armes contre son commandement & saisy sa personne: qui sont amis intimes, & se seruent en ce fait de ceux

font

pour

qui

qui ont voulu en rauissant la seconde personne de France, opprimer le Roy, & mettre son estat en confusion & ruine. Et, s'il faut passer plus outre, ie dy, que ceux là sont criminels de lese Maïesté, qui ont fait dernièrement vne maudite conspiration en Prouence par les mains de Lauris Presidēt en la Cour de Parlement d'Aix, conioint avec Fabrice Cebellonne Gouverneur d'Avignon pour le Pape, tendant afin d'assembler quinze mil hommes qui marchoyent (comme ils en faisoient le serment) par le commandement du Duc de Guise. Dont Fabrice fournissoit mil hommes de pied & deux cens chēaux. Ceste conspiration venue en cognoissance, & verifiée par la Cour de Parlement de Prouence, Entrages & Laydet, deux principaux Capitaines de ceste faction, eurent les testes trenchees, par arrest donné en ladite Cour. Et si ce n'est assez, i'adiousteray d'auantage, que lesdits de Guise ont fait vn semblable complot en Dauphiné, par le Capitaine Mantil: esperāns par ce moyen armer ces deux Prouinces, pour faire le tout ensemble marcher à leur deuotion. Tant y a, que ces conspirations faites pour abolir la predication de l'Euangile, &es leuees de gens, ce serment fait de marcher au commandement du Duc de Guise, crient tout haut que luy & ses conspirateurs sont rebelles, seditieux & criminels de lese Maïesté diuine & humaine. Et au contraire, que ceux là sont vrais & fideles seruiteurs du Roy qui se sont opposez & opposent vertueusement à leurs rebellions, seditions & attentats contre la Maïesté du Roy & l'Estat de tout ce Royaume. Et de cela, outre ce qui a esté dit, soit encores tesmoin le renuersement de la police & iustice de ce Royaume, & mesmes de la Cour de Parlement à Paris. De laquelle ils se sont seruis en ce faux & pernicieux iugement de rebellion: ne pouuans aussi trouuer vne autre compagnie qui fust tant corrompue & deprauée, & tant esclauē de leurs volontez & appetis que ceste là. Comme de fait, tous ceux qui y restent auourd'huy, ou tiennent leurs estats de la faueur desdits de Guise & de leurs adherans, ou esperent en auoir d'autres par leur moyen. Et mesmes les principaux d'entr'eux sont noïrement comprius en la conspiration & ligue faite par lesdits de Guise & adherans.

Voila ce qui deslors estoit public à l'encontre de ceux de Guise. Mais à ceste subtilité de faire declāter rebelles ceux

*Fineſſes du Cardi-  
nal pour  
maintenir  
ſa tyrannie.* qui portoyent les armées avec le Prince de Condé, le Cardinal en adiouſta encor quelques autres. La premiere fut de faire amener au camp de ſon frere, le Roy & la Roync, qu'il enuoya querir par le Roy de Nauarre: puis fiſt marcher ceſt enfant & ceſte femme, comme en triumphe, pour mieux couurir le but de ceſte guerre. La ſeconde fut de gaigner du tout à eux les eſtrangers, & meſmes les proteſtans Alemans qu'ils firent entrer dans le Royaume. Cependant ils s'en moquoyent & faiſoyent leurs riſees de la Religiō des Proteſtans: d'autant (diſoyent-ils) qu'avec de l'argent ils les faiſoyent venir exterminer l'Euangile en France, qu'eux-mesmes auoyent planté en Alemaigne, & dont ils faiſoyent encor profeſſion. Pour ſe moquer encor d'auantage des Alemans, ceux de Guiſe leur firent entendre que dès loñg temps ils vouloyent introduire la confeſſion d'Ausbourg en France, (laquelle le Cardinal auoit deteſtee en plainé aſſemblee à Poiſſy, & depuis à Sauerne proteſté au Duc de VVirtemberg qu'il l'aprouoit) & qu'ils l'euffent ia fait, n'eust eſté qu'ils auoyent eſté touſiours empeschez par le Prince & ſes adherans, leſquels ils chargeoyent d'eſtre rebelles, de vouloir vſurper la Couronne, qu'ils eſtoient Anabaptiſtes, Atheiſtes, gens ſans foy & Religion.

*Le Cardinal va  
au Concile.*

Pendant ces choſes, on n'oyoit que tempeſtes par toute la France, & horribles confuſions, amplement deduites és diſcours qui en ont eſté publicz, & qui le ſerōt encor. Mais le Cardinal voulant aſſeurer ſes affaires comme il pourroit, delibera laiſſer ſes freres beſongnans en France, tandis qu'il yroit faire ſes pratiques avec le Pape, l'Eſpagnol & autres au Concile de Trente, le tout ſous pretexte de Religion, & de laquelle il ſe moquoit tout ouuertement: car à Gyen & à Blois entre autres articles qu'il fit ſigner au Roy & à tous ceux de ſon conſeil, pour les faire paſſer au Concile diſoit-il, mais en effect, pour amener le Pape & les ſiens à ce qu'il pretendoit, il y en eut cinq entre autres, ou l'on peut remarquer l'eſprit du Cardinal. Le premier eſtoit, que le Canon ſeroit retranché de la Meſſe, & le reſte ſeroit corrigé à la forme des anciennes liturgies, & proſeré en François.

2 Que les Pſeaumes ſeroient chantez dans les temples ſelon la traduction Françoisſe, qui en a eſte faite, corrigee toutesfois par les docteurs de Sorbonne, autant rudes poetes (encobres qu'ils boyuent bien) que mauuais Theologi-

ens. 3. Qu'on participeroit indifferemment à la Cene sous les deux especes. 4. Que les peintures plates seroyent permises dans les temples, pour l'histoire seulement, & que les images en seroyent ostées: ou à tout le moins que le peuple seroit admonesté de ne les honorer ny simplement ny relatiuement. 5. Et finalement que les Prieurs & Curez interpreteroyent ou seroyent interpreter à leurs despens l'Epistre ou l'Euangile du iour au peuple. Ainsi manioit la France cest esprit turbulent: qui contredisoit à tous, & estoit de tous contredit, mesmes à Rome le Cardinal Vitelly le reprint aigrement, disant que c'estoit vn broillon & vn remueur de mesnage, qui seul pai ses pratiques tailloit plus de besongne en vn iour que le consistoire des Cardinaux n'en pouuoit coudre en vn an. Pour mieux faire sa pipée, il traina avec luy neuf Euesques, quatrez Abbqz, & quelques Sorbonnistes, & arriva à Trente au mois de Nouembre 1562 où il fit vne harangue le 23. iour du mesme mois, en laquelle y a quelques choses à remarquer. Premièrement il confesse que ce qui a attiré le iugement de Dieu sur la France, est la corruption de mœurs en tous Estats, & l'entier renuersement de la discipline de l'Eglise. Puis sur le milieu, parlât de ce que requiert le Roy de France. Il demande de nous (dit ce bon harangueur) que nous euitions tous nouueaux débats, autant que faire se pourra, que nous laissions toutes questions nouuelles & instructucules, que nous procurions selon nostre pouuoir que tous Princes & pays s'adstienent de faire guerre; ils nous faut estre entierement eslongnez de ce desir d'esmouuoir la guerre, de peur que ceux qui se sont retirez d'avec nous n'estimēt que ce Concile soit tenu plustost pour inciter les Princes à prendre les armes, & pour faire des associations & alliances pour quelque guerre, encorēs qu'elle fust sainte, que pour pouruoir à la réconciliation vniuerselle des esprits. Il fait mention puis apres de la reformation de l'Eglise, & pour la conclusion se soumet au siege Romain. Le lecteur peut penser que vouloit dire tout ce langage. Aussi de là ne cessa il de machiner contre l'estat du Royaume, dont il receuoit lettres de iour à autre, & sans luy rien ne se faisoit en France. Comme nous le verrons encor cy apres. Mais puis que nous sommes sur son seiour au Concile, nous y adiousterons encor quelques ligue. Si tost qu'il entendit la mort du Duc



de Guise son frere, sur l'autorité duquel il auoit assis son esperance, il se proposa soudain de ne retourner iamais en France, & de mesme inconstance que de coustume, tourna son esprit vers les affaires d'Italie, gratifiant en tout ce qu'il peut, non seulement le Pape, mais les autres Princes estrangers, & sur tout le Roy Catholique. Au parauant la nouuelle de ceste mort, il auoit tenu ferme avec les Euesques d'Espagne pour la residence des benefices, contre les dispenses du Pape, & maintenu qu'elles estoient de droit diuin: mais tost apres il changea d'avis, & avec les siens maintint qu'elles estoient de droit positif, & à la pluralité des voix l'emporta. Au moyē de quoy l'Archeueque de Grenate s'escria tout haut que le Cardinal de Lor. les auoit trahis. Et d'autre part, cōme le Côte de Luna Ambassadeur du Roy d'Espagne eust différé de se trouuer au Concile, pource qu'il desdaignoit d'estre au dessous de l'Ambassadeur de France, le Cardinal fut auteur de l'y faire venir: & pour gaigner la bienveillance de l'Espagnol, fit bailler à cest ambassadeur d'Espagne le lieu plus honorable; fit perdre au Roy de France la prescience qui n'auoit iamais esté en dispute.

*Siege de  
Bourges  
et de  
Rouen.*

Mais voyons si ses freres demeurez en France estoient meilleurs seruiteurs de la Couronne. Le Duc de Guise, tenoit le Roy & la Roynie en ses mains, les faisant trotter çà & là, & assister à la prise des villes, & se cachant sous leur autorité pour ruer les coups. Car quāt au Roy de Nauarre, il s'en moquoit d'une façon estrange. Il assiege Bourges au mois d'Aoust. Ceux de dedās se rendirent en Septembre. Le Duc de Guise y fit entrer le Roy & la Roynie, y faisant lors de meugilleuses menasses & outrageuses paroles contre ceux qui s'estoient rendus. Tous ceux de la Religio en ces quartiers, traitez pirement, que s'ils eussent esté Turcs ou Iuifs. Le Duc d'Aumale & le Marquis d'Ellebeuf estoient en Normâdie, l'un deuant Rouen, & l'autre à Caen. Mais quelques gros & gras qu'ils fussent, ils n'auancērēt pas fort de ce costé là. Le Sieur de Moruilliers estoit à Rouen, & dans le fort Sainte Cathérine y auoit si bonne garnison q̄ le Duc d'Aumale ne fit que perdre gens & munitions tout le long de l'esté. Mesmes les assiegez, pour se moquer de luy dressoyent des gargouilles çà & là, où il faisoit despendre inutilement ses poudres & boulets, cōme s'il eust voulu desnicher des passereaux. Au reste chascun estoit maistre en son camp.



camp, tellement qu'un iour un enfant de Rouen estant fort  
 ty pour aller voir les deportemens du Duc d'Aumale, son  
 dext ses entreprises & desseins, ayāt veu qu'il n'y auoit si pe  
 tit rustre qui ne se messast de le cōseiller & de cōmander en  
 sa presence, rapporta qu'il auoit veu force Capitaines &  
 peu de soldats. Parquoy (dit-il) vous n'esles en danger, fins  
 quād Monsieur d'Aumale dort. Le Duc de Guise appelloit  
 cependāt les estrangers, cōme Italiens, Espagnols & autres  
 pour brouiller tout de plus en plus. Et attendāt q la Roynē  
 d'Angleterre se preparoit pour donner secours au Prince de  
 Condé, scachant que la Normandie estoit la descente, y me  
 na incontinent son atmer, traignant le Roy, la Roynē mère  
 & le Roy de Nauarre, qui y fut blessé au siege de Rouen, dōt  
 il mourut tost apres, receuāt le salaire de s'estre adioint aux  
 ennemis de la Couronne & aux siens. Rouen fut prins, &  
 toute violence y fut exercee. Cela fait, le Duc de Guise reuēt  
 à Paris, estant en perplexité, à cause que le Prince de Condé  
 ayant receu secours d'Alemaigne venoit le trouuer. Mais  
 sur ces entrefaites, il est fortifié de nouvelles cōpagnies de  
 Gascons & d'Espagnols, tellement qu'il delibere empescher  
 que les Anglois ne se joignissent au Prince. La dessus sur  
 uint la bataille donnée à Dreux au mois de Decembre, ou  
 les choses se passerent cōme l'on fait. Mais cōme le refus que  
 le Duc de Guise fit lors de charger, lors que le Connestable  
 le luy enuoya dire (qui causa la prise du Connestable) fit que  
 plusieurs estimerent qu'il crechoit cest accident, & les au  
 tres le cognoissans iugerent que c'estoit faute de courage. i  
 aussi print-on de là argumēt pour s'asseurer de tout ce que  
 ce grand guerrier fit depuis ceste iournée. Car tous confes  
 sent qu'apres la iournée de Dreux toute la force de ceux de  
 la Religion consistoit en la troupe que l'Amiral tenoit aux  
 champs, non pas en la ville d'Orleās qu'un chascun tenoit  
 imprenable, l'Amiral demeura sauue. Ainsi donc la raison  
 vouloit q le Duc de Guise s'attaquast à celui, lequel vain  
 eu, la ville d'Orleans tendoit les mains non pas à consom  
 mer les homes, l'argent, les muitions & les forces à la prin  
 se d'une ville, laquelle prise & abbatue ne faisoit quer  
 dre l'Amiral plus fort, plus accort & esueille à nouvelles  
 & hazardeuses entreprises. On concludoit de là, que le Duc  
 de Guise auoit eu faute de sens & de boutage, de n'auoir  
 secu ou osé suivre l'Amiral se retirant en Normandie & de

Bataille  
de Dreux

l'auoit laiffé tellement se renforcer de villes, de places, de forteresses, de gens, d'argent & de toutes autres munitions. Mais aussi les plus grans & les plus experts de la France nient pour certain que si la guerre eust plus longuement duré, l'Amiral eust fait receuoir vne hôte immortelle au Duc de Guise, lequel à Dreux ne l'osa regarder au visage, ne sortant d'Orleans pour aller en Normandie le suyure au dos : encorés que l'Amiral fust sorty à petite troupe de ladite ville assiegée, passant vne partie de la France, & en la barbe du Duc de Guise forcé villes comme Touque, Caen, Falaise, Argenten, Vire & autres de Normandie, prins forteresses & Chasteaux, cōtraint le Marquis d'Ellebeuf de faire ioug, & se rendre à sa grace & mercy ; encorés qu'il eut le moyen de tenir bon : ayant vne place imprenable (à sauoir le Chasteau de Caen) à son commandement. Mais ce n'estoit pas là son mestier. Il estoit plus propre à manier vne bouteille & vn jambon. De fait, quelques iours auant que l'Amiral approchast de Caen, il vouloit s'enfuir, & sans le capitaine Renouard il se retiroit auant qu'estre sommé. De luy donc ne rencontra pas mal à propos vn Gentil-homme du pays de Caux, lequel après les premiers troubles voyant q' l'armée du Roy doutoit qu'il y eust longueur au recouuremēt du Haure de grace, leur conseilla d'y faire entrer le Marquis d'Ellebeuf : car il n'y a (dit-il) place si forte, si munie, si imprenable, que incontinent il ne rende.

Cependant, le Cardinal ayant receu les nouuelles de la iournee de Dreux : Tout va bien (dit-il) puis que mon frere est saué. Parle-on plus à Paris de nous faire rendre cōpte ? & puis se tournant deuers deux Euesques ses fauoris, leur dit en souriant, à ce que ie voy, monsieur mon frere orra ses comptes tout seul. voila où ie les demandois. Le Roy de Nauarre estoit mort. Le Maréchal de S. André auoit esté tué. Le Prince de Condé estoit prisonnier d'un costé, & le Connestable de l'autre. voila où il les demadōit. Luy & son frere ne redoutoyent plus que la Royne mere, l'inconstāce & finesse de laquelle ils auoyent à combattre. Pour en venir à bout, ils estiment qu'il falloit auoir Orleāns pour attraper le Sieur d'Andelot qu'ils hayssoyent & craignoyent, recouurer le Connestable pour l'auoir du tout à leur mercy. si d'auanture ils ne l'eussent fait despecher en la fureur de la prinse. Ils auoyent le Prince de Condé qui ne fust pas es-

chappé

chappé de leurs mains à bon marché. Et encores qu'ils vis-  
sent l'Amiral en pieds, si esperoyent-ils le matter avec le  
temps. Pour cest effect ils firent tout d'une volée quarante  
Cheualiers de l'ordre, & distribuerēt les compagnies d'hō-  
mes d'armes à gens de leur retenue. Aussi le Due de Guise  
se descouurit assez quelques iours auant sa blesseure: car sur  
ce qu'un sien familier luy parloit de suyure l'Amiral, il fit  
responce, Ce ne seroit peut estre pas le prouffit de beaucoup  
qu'ils fussent si tost vaincus, le ieu n'est pas assez brouillé.  
J'ay à cōbatre vne plus mauuaise beste que tous les Hugue-  
nors ensemble, parlant de la Royne, de laquelle il se plaig-  
noit assez souuēt en son priué, qu'elle estoit merueilleuse-  
ment ingratē enuers luy, & qu'elle outdissoit sous main  
quelque chose auēc le Prince de Condé. Mais (disoit-il) au  
plaisir de Dieu, qui fait le tort que lon fait à nostre maison  
(parlant de la Prouēce & d'Anjou, & de la Courōne aussi)  
j'auray le bout des vns & des autres: & quoy qu'il couste,  
puis que ma part y est, j'en auray la raison, auant que le ieu  
se departe. Encores se descouure mieux l'iniquité de son  
vouloir par vn autre ppos qu'il tint, lors qu'il fit faire ces  
derniers Cheualiers de l'ordre, (au rang desq̃ls son fils Hen-  
ry pl<sup>e</sup> propre enēor à iouer aux noix qu'à tenir espée, estoit  
des premiers) sur la honte qu'on luy disoit qu'il feroit à tāt  
de gens de bien & grans Seigneurs qui en estoient, d'y met-  
tre quelques vns qu'il vouloit, vous n'entendez pas, dit-il,  
le secret. Il y en a (parlant de la Royne) qui veulent viure en  
confusiō, & il y en faut tant mettre, que le desordre y ame-  
ne vn bon ordre. Voila le soin qu'il auoit de l'estat du Roy-  
aume. Mais on peut voir comment il se degradoit soy-mes-  
me. En la iournée de Dreux, le Cōnestable auoit esté prins,  
combatant vaillamment, le Marechal de S. André tue sur la  
place: le Due de Guise ne s'estoit peu retirer qu'auēc hōte &  
vitupere, ayant refusé de charger les Huguenors, lors q̃ son  
Capitaine le luy commanda, & d'auoir abandonné son chef  
au plus fort du combat. il ne fit aucun honorable exploit  
en ceste iournée-lā, & perdit l'hōneur de la prinse du Prince  
de Condé qui tomba es mains du Sieur de Danuille. Mais  
pour sa plus grande confusion, il eut en teste le seul Ami-  
ral, duquel il auoit tant mesdit, & eut ceste reproche deuant  
tout le monde, de n'auoir auēc toutes ses forces osé attaquer  
celuy qu'il auoit tāt mesprisé, & qu'il disoit n'auoir vertu.

prouesse, ny grace de commander. Ce qui despittoit extrêmement le Duc de Guise, estoit de se voir bride par la reddition du Haure de grace aux Anglois, qui leur auoit esté baillé avec quelques conditions qui n'estoyent point iniques pour le tēps: & cela seruit à faire ronger les ongles au Cardinal & à tous ses autres freres, qui se virent nouuelle besongne taillee en cest endroit. Or tenoyent-ils presque pour certain que cela ne s'estoit point fait, sans l'intelligence de la Royne mere avec le Prince de Cōde & l'Amiral. Partant donnerent ils cōseil au Roy d'Espagne, l'entremise de leurs seruiteurs secrets de demander au Roy de France quelques villes à luy garder: donnans esperance à l'Espagnol de les luy faire bailler, s'il eust esté tant inique & mal-auisé de les demander. Lon fait le regret qu'en auois le Duc de Guise quelques iours auant sa blesseure à mort, deuant Orleans, ainsi qu'il s'en descouurit à vn sien familier: disant qu'il se repentait bien de n'auoir fait bailler deux villes au Roy d'Espagne, au lieu d'vne que tenoyent les Anglois: car c'estoit (disoit-il) le moyen de tenir en bride l'inconstance de laquelle il chargeoit la Royne, & l'envie & ialousie qu'il disoit qu'elle portoit desjà à sa grandeur, avec le moyen que cela apportoit de faire quelque grand chose pour leur maison, dont il ne se voulut ouuertement descouvrir: mais aussi il ne peut tant cacher son ieu, qu'en disant que par ce moyen il eust eu sa part de la piece, comme les autres, lon ait bien peu iuger (avec d'autres propos que depuis il tint encores) qu'il n'eust intention de mettre le Royaume en proye, & en auoir sa part.

*Mort du  
Duc de  
Guise.*

Ces mescontemens furent cause que l'Amiral passa seulement en Normandie & s'y fortifia de nouueau, tandis que le Duc de Guise assiegeoit Orleans, & se preparoit à plus hautes entreprises, ceste là executee ne tenant lors que propos pleins de menaces contre l'Estat & le repos du Royaume. Au milieu de ses desseins, Poltrot luy tira le coup de pistole, duquel il languit quelques iours en terribles tourmens & merueilleux regrets de se voir tranché au milieu de sa course. Il mettoit quelques fois, les doigts en sa playe, & comme il s'estoit extrêmement despitte contre les chirurgiens & medecins qui n'auoyent peu allonger la vie à François second, aussi lors ne les pouoit-il voir de bon œil, pour autāt qu'il se voyoit pris. En fin, apres auoir par-

donné

donné à sa femme, & laissé la charge de ses enfans au Cardinal, non sans charge de venger sa mort & poursuyute les entreprises, tant de fois rompues, il fut comme attaché par la mort aux faubourgs & à la porte d'Orléans. Ainsi perit le plus fier de tous ceux de Guise, indigne (ce disoyent plusieurs) de mourir en la ville où vn Roy estoit mort, & qu'il entraist vis dedans les murailles de celle que luy & les siens auoyent destinee pour la mort d'un Prince du sang & de plusieurs bons Officiers de la Couronne. Les Catholiques, spécialement ceux de Paris (qui toutesfois n'en auoyent occasion) comme il sera dit cy après, firent vn grand dueil pour sa mort. Le Roy de Nauarre auoit esté tué deuant Rouen. Le Marechal de S. André, le Duc de Neuers & autres à Dreux. On n'en fit aucun semblant. Mais pour monsieur de Guise qui auoit abandonné son Capitaine, qui combattoit pour ne rendre compte aux Estats de France, qui auoit violé les edits, & vouloit auoir raison de ceux de Valois, on fit des pompes funebres, comme à vn Roy. Or, comme apres le decès de François second, toute ceste cour qui enuironnoit ceux de Guise, s'esuanouit, & toute leur multitude se conuertit à l'instant en solitude, & mesmes plusieurs qui les auoyent suyuis estoient prests non seulement à tenir le bassin à qui leur couperoit la gorge, ains mesmes de les esgorger. Semblablement apres la mort de leur aîné, ils demeurèrent comme vn corps perclus de ses membres, estans abandonnez de la plus part, & pour la desmesuree puissance qu'ils auoyent usurpee, deuenus odieux à ceux qui leur estoient plus equirables. Et pourtant le Cardinal, qui estoit lors à Trente, commença à regarder à nouueaux moyens pour commencer par vn autre bout, & commença par l'Espagnol, dõt mesmes il se descouurit depuis à vn principal conseiller d'un grand Seigneur François: car apres auoir fort descrie & blasme l'estat des affaires de France, il luy disoit, q le gouuernement d'Espagne estoit excellent & beau, là où les grans du pays tiennent le Roy en bride, sans qu'il soit loisible au Roy de s'en iouer, comme de iettôs, faisant q celui qui n'en valoit qu'un en vaut tantost dix, tantost cēt, tantost dix mil, & quand il luy plait le remet à vn: & ne seroit pas (disoit-il) mal aisé de rager la France à son point. Cependant il faisoit du plureur, escriuant des lettres cōsolatoires à sa mere, lesquels à grād peine sauroit-on lire sans rire,

speciale-



# LA LEGENDE DV

specialemēt où il escrit ces mesmes mots, Madame, ie vous dy que iamais Dieu n'honora tant mere; ne fit plus pour autre siene creature. (i'excepte tousiours sa glorieuse mere) qu'il a fait. Mais ce bon fils de la plus heureuse du monde apres la vierge Marie faisoit d'autres nouuelles pratiques contre l'estat de son Roy & du Royaume, comme nous le verrons maintenant.

Premiere  
pacificatio

Le Duc de Guise ayant la bouche close, incontinent la paix s'auança, mais de telle sorte ce pendant qu'on cognut que les memoires que le Cardinal auoit laissez auant qu'aller au Concile, seruoient de beaucoup. Car l'edit de Iânier, fut comme aneanty, le Prince de Condé reculé de la charge qui luy appartenoit comme au premier Prince du sang: l'Amiral & autres grans Seigneurs de la Religion esloignez de la Cour, specialement l'Amiral, auquel on mit la resolution du coup donné au feu Duc de Guise, qui estoit vn artifice du Cardinal & les siens pour tenir tousiours l'eau trouble & ne venir iamais à compte: & de la Royne mere aussi, qui en cest endroit fauorisoit ceux de Guise, estât bien aise d'eslongner de ses fils toutes gens d'honneur, afin de les esleuer & façonner à son humeur, dont les effects se monstrerent bien de puis.

Deportemens de  
ceux de  
Guise depuis les  
premiers troubles  
iusqu'aux secōs

Depuis les premiers troubles iusques aux secōs, suruindrent beaucoup de choses en France, où les artifices de ceux de Guise apparurent en beaucoup de sortes, à la ruine du Royaume, comme nous en toucherons icy quelques particularitez plus notables, sans trop nous arrester à la circonstance des iours ioint qu'en traitant des torts qu'ils ont fait aux Princes du sang, à la Noblesse, aux Estats & aux particuliers du Royaume, on verra les particularitez que nous passons maintenant.

Premierement donc, le Cardinal fait instâce vers la Roine mere de faire bailler l'Estat de grand Maistre à son neveu Henry fils du feu Duc de Guise. Et combien que cest enfant fust du tout incapable de ceste, toutesfoi au grand deshonneur du Roy, de toute la France, & par despit du Connestable, & de ceux de la Religion, que la Royne commençoit à hayr, il fut esleu grand Maistre, ayant besoin encor alors de verges & de precepteur.

Depuis la mort du Roy de Nauarre, la Royne mere estoit deuenue Catholique. Car elle craignoit que le Prince de Condé



Condé lors premier Prince du sang ne voulust tenir son rang, & comme il la cognoissoit, la ranger à l'aide de ceux de Chastillon, & du Connestable mesmes (les bouillons duquel commençoient aucunement à se refroidir) pour luy oster le gouuernement. Le Cardinal preuoyant que si cela auenoit, luy & ses freres estoient desferrez, se resolut d'y donner ordre. En l'assemblée d'Orleans, les Estats d'un commun accord auoyent fait grande complainte des dons immenses des Roys Henry & François second faits à plusieurs personnes, les vns indignes, les autres outre mesure, & de faire rendre compte à ceux qui auoyent eu charge & commandement es finances. La premiere de ces plaintes, quant à l'indignité des personnes concernoit principalement & iusqu'au fond du cœur la Duchesse de Valenois & toute son ordure: & quant à l'exces touchoit au vif ceux de Guise, le Marechal de S. André & quelques autres. La seconde plainte regardoit du tout ceux de Guise, sur tout au regard de François 2. qu'ils auoyent manié à leur plaisir, & sous le regne infinis deniers s'estoyent escoulez. D'autre costé la reformation de l'estat Ecclesiastique dont la Noblesse & le tiers Estat faisoient instance, faisoit mourir le Cardinal tout debout. Pour faire esuanouir ceste poursuite ils ne trouuerent plus prôpt expedient que d'allumer ceste guerre ciuile. Estât appaisée, il met en auât à la Royné mere que pour empescher que le Prince de Condé en s'auançant selôn son degré ne luy ostant son gouuernement, il falloit faire declarer le Roy Maieur, suyuant ce qu'elle en auoit aussi deliberé auant la mort du Roy de Nauarre. Or s'asseuroit le Cardinal que tandis que la Royné mere demeureroit maistresse, les cōptes ne se rendroient jamais. Pource que permettant aux Estats de sonder de si pres le deportement des gouuerneurs, il y auoit danger qu'auéc le tēps on ne la recherchaist elle mesme. Et quant à la reformation du Clergé, il luy monstre le danger qu'il y auoit d'auancer ceux de la Religion (ce qui auendroit en ce faisant) pource qu'elle auoit l'Espagnol, le Pape, & tous les Catholiques en testé, perdroit son credit, & (peut estre) son autorité aussi. Suyuant tels conseils, le Roy tost apres la paix fut déclaré Maieur: & la Royné mere & le Cardinal luy firent iouer vn terrible rollet, le faisant parler aussi gros que s'il eust eu quarante ans: aussi estoient ce eux qui parloyent par sa bouche.

Ace Conseil, le Cardinal en adiousta vn autre touchant  
 l'instruction du Roy & de ses freres. Car il remonstra à la  
 Roynes que si elle permettoit que les Princes & Seigneurs  
 de la Religion approchassent de ses enfans, ou qu'elle les  
 introduist de si bonne heure aux affaires, ils seroyent gaignez,  
 & pourroyent avec le tēps luy donner de la peine à elle  
 mesmes, ou pour le moins luy oster le maniement des affaires.  
 & approcher de leurs personnes d'autres conseillers,  
 comme les Bourbons, Montmotencis & Chastillōs. Pour  
 pouruoir à ce poinct, il fait amuser le Roy à la toupie, à faire  
 iouster les coqs l'un contre l'autre, à faire battre les chiens  
 ou à les harer sur cestuy-cy ou cestuy-là : puis à ouyr des  
 farces, danser, babiller avec des Courtisannes, finalement à  
 iurer & paillarder, le tout au veu & sceu de la Roynes, & par  
 l'entremise de plusieurs seruiteurs de la maison de Guise.  
 Et d'autant que le Roy estoit assez imperueux, pour luy  
 faire passer ces bouillōs, on le mit à la chasse, tandis qu'une  
 femme & vn prestre gouuernoient le Royaume.

Et pour tenir tousiours en halaine ceux de la Religion, &  
 empescher que le Roy avec le temps ne favorisast tellemēt  
 les deux partis ensemble, qu'en fin les artifices de la maison  
 de Guise ne se descouvrirent, le Cardinal sceut bien empoi-  
 gner l'occasion pratquee par la Roynes mere vn peu auant  
 l'edit de pacification. On auoit attribue ie ne say quelle de-  
 position à Poltrot, par laquelle il confessoit que l'Amiral  
 luy auoit donné charge de tuer le Duc de Guise. Et combiē  
 que l'Amiral entendant ce bruit que la Palette seruiteur de  
 ceux de Guise faisoit semer parmy les Reistres protestans  
 qui estoient venus au secours de ceux de la Religion, &  
 voiant quelle consequēce cela tiroit, eust par lettres expres-  
 ses supplié la Roynes mere de faire garder Poltrot, auquel il  
 desiroit estre confronté: neantmoins elle l'auoit fait tirer à  
 quatre cheuaux par arrest du Parlement en Paris. En quoy  
 se void l'enclouēure, & le merueilleux artifice de la Roynes  
 & du Cardinal. Quāt aux menées de la Roynes, cela requiert  
 vne autre legende. Pour le regard du Cardinal, il fut le plus  
 aise du monde, d'auoir ceste acroche, pour mettre le Roy-  
 aume en troubles, quand bon luy sembleroit, se deffaire de  
 tous ses ennemis de Bourbon, de Montmorency & de  
 Chastillon. Et de fait ceste iustice qu'il faisoit demander  
 par la vesues & les enfans du Duc de Guise, luy estoit vn  
 moyen

moyen mutuellement propre pour se faire valoir.

Car en peu de temps il passa bien plus outre, donnant à entendre à la Royne, que iamais son gouuernement ny l'Estat du Roy ne seroyent assurez, tandis que les Bourbons, Montmorencis & Chastillons seroyent à cheual: qu'il les faloit humilier; & leur mettre tant de gens en teste, que le Roy & ceux qui estoient à l'entour de luy demeurassent les maistres. Que si elle vouloit se seruir de ses freres & neveux, & de ceux qui estoient affectionnez à leur maison, elle les trouueroit prests avec leurs moyens. Que tandis qu'elle desfauiroient ceux de la Religion, la pluspart des villes du Royaume employeroient tous moyens pour maintenir elle & son auctorité.

Et d'autant que c'eust esté brouiller trop les affaires tout d'un coup, & se hazarder: vn peu auant que de s'attacher aux trois maisons sumentionnees ensemble, apres auoir deliberé avec ses freres, le Cardinal proposa à la Royne mere, qu'il falloit se desfaire premierement de ceux de Chastillon: à quoy la iustice que demandoyent ceux de Guise seruiroit de pretexte, & d'autant qu'on ne les pourroit auoir par force, il leur falloit monstrier bon visage pour les attrapper en vn coup. Or encorés que la Royne vist bien l'iniquité de ce conseil, & les ruines qui s'en pouuoient ensuyure, toutesfois preferant son ambition au repos de ses enfans & du Royaume, elle suyuit ce chemin. Car encorés qu'elle n'aimast gueres la maison de Guise, toutesfois sachant qu'elle en cheuiroit mieux, & qu'ils estoient embarquez si auant es affaires, qu'ils employeroient tous moyens pour se conseruer avec elle, il ne fut question que de regarder aux moyens de se desfaire de ceux de Chastillon. Mais comme ils estoient sur le point de se mettre en besongne, le Prince de Condé en plein Cōseil du Roy print le fait de l'Amiral en main & declaira tout haut, que quiconque s'attacheroit à l'Amiral par autre moyen que legitime & selō le droit, luy Prince ne l'endureroit pas. Cela & autres considerations furent cause de ceste belle reconciliation entre l'Amiral & ceux de Guise faite à Moulins, lors que le Roy estoit sur son voyage de Bayonne.

Or ce voyage fut entrepris par l'auis du Cardinal & de la Royne mere, sous pretexte de faire voir au Roy son Royaume: mais en effect, pour conseruer avec l'Espagnol, faire vne

nouvelle

## LA LEGENDE DV

nouvelle ligue pour remettre le Royaume en nouveaux troubles, comme il auint aussi apres que les courses eurent esté faites. Pendant lesquelles le Cardinal & ses freres firent autres pratiques qui s'ensuyuent.

Le Cardinal estant à Trente, auoit pratiqué vne derniere session pour faire declairer le Roy de France Heretique, Schismaticque, & excommunié, s'il perseueroit à vendre le domaine de l'Eglise: combien que ceste vendition fust de l'inuention que luy mesmes auant son partement de France, & son frere auant sa mort, auoyent donnee. Car pour paruenir à leur grandeur & accomplissement de leurs desseins, alors ils ne trouuoient rien qui fust saint & inalienable. En ce mesme dessein, vouloit faire declairer le Royaume de Nauarre, pour la Religion que la Royne & le Prince son fils tenoyent, estre ouuert & en proye au premier conquerant. Dont le Roy aduetty, manda à ses Ambassadeurs & aux Euesques du Royaume de se retirer promptement du Concile, faisant au reste de grandes protestations contre les auteurs de ce conseil. Mais en cela y auoit de l'artifice du Cardinal, lequel en secret disoit auoir inuenté ce moyen pour gratifier au Pape & au Roy Catholique à qui il presentoit vne nouvelle proye, & d'autrepart escriuiot à la Royne mere, qu'il falloit que le Roy feist semblant d'empescher cela, afin de gagner la Royne de Nauarre, & la separer d'avec le Prince & ceux de Chastillon, pour les rompre tant plus aisément les vns apres les autres. Sur ce il reuint en France & ayant pourueu aux affaires comme nous verrons maintenant, fait vn nouveau voyage à Rome, pour solliciter en personne ceste interdiction contre la Royne de Nauarre. Et pour se purger de telle meschanceté, il en partit deux iours auant la conclusion du iugement: puis, estant arriué à Venise, accusa aigrement le Pape & le Consistoire de Rome, d'auoir passé outre contre la volonté du Roy, pour faire entendre qu'il n'estoit point de la partie.

*Articles  
du Concile  
proposez  
par le Car-  
dinal pour  
troubler  
encor le  
Royaume*

Estant de retour, & pour s'acquitter de la promesse faite au Concile, il fut si impudent d'en presenter les articles au Conseil du Roy, non pas tant pour les faire recevoir du premier coup au Royaume, que pour auoir vn moyen propre pour rompre peu à peu l'edit de pacification. Et afin que cela eust plus de lustre à sa sollicitation, les Ambassadeurs d'Espagne, de Sauoye, & du Pape vindrent en Cour, & presenterent

enterent certains articles dressez à l'instance du Cardinal & de ses adherens, lesquels nous auons icy inserez, d'autant qu'ils descouurent le fondement des autres troubles que depuis ce temps là nous auons veu en France.

Le premier point est, qu'ils ont interpellé le Roy de garder & faire obseruer en son Royaume, pays, terres, & Seigneuries de son obeissance, les articles du S. Concile, nagueres fait à Trente, qu'ils ont apporté à ceste fin: Et pour d'iceux luy faire lecture, & faire serment par deuant les deleguez du Cōcile, est baillee assignation au Roy de se trouuer à Nancy en Lorraine, le iour de nostre dame en Mars, où se trouuerōt lesdits Sieurs, eux & tous les Roys & Princes Chrestiens, où ils ont delibéré faire vne loy generale, suyuant ce qui a esté fait audit S. Concile, pour l'extirpation des heresies & nouuelles doctrines qui seront trouuees repugnantes audit S. Concile.

Le deuxiesme point est, que ledit Sieur face cesser l'alienation du temporel de l'Eglise, luy declairant par ledit Roy d'Espagne & Duc de Sauoye, qu'ils n'ont entendu ny entendent estre payez des deniers à eux promis en mariage par le defunct Roy Henry, sur, & aux despens de l'Eglise: & qu'il se doit contenter de quelque don gratuit que luy feront les Ecclesiastiques, ayant esgard aux saccagemens qui puis nagueres ont esté faits en son Royaume, & ce sous son nom & par son edit: dont toutesfois il l'excusent pour sa tendre jeunesse, comme estans aussi priez de ce faire.

Le troisieme, qu'il bannisse, si mieux il n'aime faire punir les principaux seditieux & schismatiques de son Royaume, par le moyen desquels ont esté faits les susdits saccagemens de l'Eglise, & qui ont mis les ennemis de sa Couronne en son Royaume, & pour ce faire baille entree aulx estrangers.

Le quatrieme, qu'il reuoke la remission & absolution qu'il a faite par son edit de paix, signamment contre ceux qui ont commis crime de lese Maiesté Diuine: luy remontrant que ce n'estoit à luy, ny à Roy, ny à Prince de Chrestienté, remettre ou pardonner ladite offense qui est faite contre la Diuine Maiesté, & que telle remission appartient à vn seul Dieu.

Le cinquiesme, que de sa part comme Roy, il tiët la main à iustice, & icelle autorise, comme ses predecesseurs ont



fait, d'autant que d'icelle depend l'autorité des Roys & Princes Chrestiens: & que faisant cela il fera la punition du meurtre si proditoirement fait à la personne du feu Sieur de Guise, par ceux qui luy sont notoirement cognus, & qu'en icelles choses ne faut vsfer de dissimulation, considéré la personne meurtrie si malheureusement: & de se faire obeir comme Roy, afin de faire florir iustice en son Royaume. Lesdits Seigneurs, pour lesquels eux Ambassadeurs ont charge, luy offrent donner confort & aide, si tost qu'il plaira au Roy les en requerir.

Depuis que ceux de Guise vsurperent la Couronne, faisant de nos Roys leurs esclaves, il y a eu deux sortes de conseils, de lettres & de paroles de Roy, asauoir patentes & secretes. Le Conseil priué traite ce qu'on veut que tout le monde sache. Les lettres patentes & paroles dites deuât tous seruent de cōfirmation. Mais ceux de Guise y ont introduit vn cōseil secret qui depuis a esté party comme en trois. Car la Royne mere a le sien, ceux de Guise le leur, & le Roy quelquesfois aussi le sien composé de certains qui le gouuernēt. Là ont esté resolües de nostre temps les affaires, dōt les sanglantes executions se sont ensuyuies depuis. Les lettres de Cachet sont ordinairement contraires aux patentes, & les paroles ouuertes à celles que lon dit en l'oreille. Ainsi en print-il à la venue de ces Ambassadeurs, car en public & au sceu de tout le monde, le Roy leur declaira que l'edit de pacification auoit esté fait pour dechasser les ennemis de son Royaume, & autres choses en general: mais en particulier on mania cest affaire au Conseil secret en la sorte que nous l'auons veu par effect depuis. Le vingtsixiesme iour de Februrier 1563. le Roy fit vne partie de ceste déclaratiō aux susdits Ambassadeurs, & pour mieux coulourer la besongne, le Cardinal & la Royne mere luy firent aprendre ceste response par cœur & la prononcer de sa bouche, luy qui entendoit lors autāt ce qu'il disoit, que ce qu'il ne disoit pas, estant enfant, mesmes en telles affaires.

Or faut noter qu'un iour au parauant le Cardinal auoit obtenu de la Royne vn congé en forme de breuet, signé du secretaire Bourdin, pour porter armes defendues par edits & lettres patentes. Si on demande pourquoy il obtint ce breuet de la Royne plustost que du Roy, veu que celuy seul peut dispenser de la loy qui l'a faite: & pourquoy il ne de-

manda



manda des lettres patentes, ains s'arresta à vn simple breuet: i'en laisseray le iugement à toutes personnes libres de passions. Ce qui suruint tost après, descouure les desseins du Cardinal & des siens.

Mais de pouuoir specifier icy ces desseins là, tant en ces cheuauchees qu'no fit faire, au Roy, sous pretexte du voyage de Bayonne, où la sainte ligue fut consermee, & resolu avec le Duc d'Albe de courir sus à ceux de la Religion: qu'es ligues brassees en diuers endroits du Royaume par les menées de ceux de Guise, dōt s'ensuyuirent des massacres horribles, spécialement au Maine, & en Touraine & au Vendosmois. En Guyennē le Marechal de Bourdillon, & ailleurs plusieurs autres, trop au commandement desdits de Guise & de la Royne. Nous ne parlerons donc icy par le menu de ces massacres, suyuis d'extorsions & iniustices estranges en diuerses villes du Royaume, les artifices pour abolir peu à peu l'edit de pacification, les pratiques du Cardinal pour gagner le Prince de Conde, sous pretexte d'un Royaume imaginaire & d'un mariage, afin de rēdre l'Amiral plus foible, les Citadelles dressées en diuers lieux, les desmâtellemēs des villes tenues au premiers troubles par ceux de la Religion, les fausses accusations qui leur furent mises sus, la declaration ou edit de Roussillon abolissant manifestement celuy de pacification. La moquerie des remonstrances faites par le Prince de Conde sur cest edit, & de to<sup>9</sup> ceux de la Religion qui demandoient soulagement & iustice. Le massacre de Tours & du Chasteau du Loir. L'audace de Chauigny esclau de la Royne & de ceux de Guise, le bannissement de certains personnages de la Religion en la ville de la Rochelle. Je ne feray aussi plus ample mention de la defense de tenir escholes à ceux de la Religion, à la poursuite du Cardinal, suyuant pas à pas en cela l'edit de Julian l'Apostat contre les Chrestiens: la poursuyte du mesme Cardinal taschant de ruiner les ames comme les corps, à ce qu'il ne fust loisible aux Ministres de visiter les malades, ny demeurer ailleurs qu'es lieux mesmes où serbit l'exercice de la Religion pour les Bailliages.

D'un costé le Cardinal de Guise machinoit avec l'Euesque du Mans dont s'ensuyuirent infinis maux. Le Duc d'Aumale estoit en Châpaigne où il ne faisoit gueres mieux. Il oste à ceux de Troyes l'exercice de la Religion, qui par la

declaratïo du Roy leur estoit permis dâs leurs faulxbourgs, leur assignant vn village fort incommode. Change de son autorité le lieu du Bailliage de Chaumont en Bassigny, contre l'ordonnance expresse du Roy. Et sur la remonstrance qui luy en fut faite par le Lieutenant du Bailliage (ennemy declairé de la Religion) du commandement qui luy auoit esté fait d'accômoder ceux de la Religion au refus du Gouverneur : il respondit, qu'il auoit des cōtraires edits du Roy dedans sa manche, & defendit à ce Lieutenant de passer outre. Fit emprisonner vn Auocat à Troyes, pour auoir présenté vne requeste au Roy, au nom d'vne pource femme de la Religion, à laquelle on auoit depuis la paix, coupé les bras & les iambes. Fit piller & saccager la maison du receueur de Mascon. Fauorisa en toutes sortes possibles les seditieux & publiques assassins de Creuant. Le Cardinal de Lorraine estoit en armes accompagné de quelques Cheualiers de l'oidre : & les mutins de Paris, & autres lieux voyâs qu'on couroit sus ainsi à ceux de la Religion, ne demâdoient sinon quelque grand qui les mist en train pour faire de mesmes, ioint que le Roy estoit loin, & en son absence auoyent grande enuie de remuer les mains & faire vn terrible mesnage. Ce que preuoyant le Marechal de Montmorency, & ayant entendu que non seulement à Paris, mais aussi par toutes les villes du Royaume les seditieux estoient au guet, attendans la venue du Cardinal, aduertit le Roy de ce qu'il fauoit : sur quoy il receut mandement de ne laisser entrer le Cardinal ny aucun de ceux de Guise en equippage de guerre dedans Paris. Derechef, & apres que le Marechal fut auerty de ce breuet que le Cardinal auoit obrenu de la Roynne mere, il auertit par plusieurs autres fois le Roy, spécialement à Chaaons, à Bar, à Mascon & à Lyon, que si le Cardinal entroit en armes avec sa garde, dans le gouuernement de l'Isle de France, il se mettroit en deuoir de le desarmer. Cinq ou six mois auant que le bruit vinst à Paris de la venue du Cardinal avec gardes d'arquebuziers, le Marechal fit la mesme declaration publiquement & particulièrement à des plus speciaux seruiteurs du Cardinal. Et afin que personne ne pretendist cause d'ignorance, le 13. de Decembre 1564. fit faire defense (publique à son de trompe, & des lors imprimée) sur peine de la hart à tous soldats ordonnez pour gardes de Gouverneurs ou police de gouuernement,

d'entrez

d'entrez en son gouuernement : declairant par mots expres, afin que le Cardinal entendist par là, q̄ ceste defense le touchoit, qu'il n'estoit permis à Seigneurs, quels qu'ils fussent, s'ils n'estoyent Princes de la maison de France, d'entrez au gouuernemēt de l'Isle de France, sans aucune garde. Neantmoins le Cardinal print son chemin à Paris & partant de Reims, feit courir le bruit qu'il alloit à Genuille. Et quoy quil fut delicat, se mit aux champs en la plus grande rigueur de l'hyuer, feit des traites excessiues & non accoustumees a luy en aucune saison, ny pour aucuns affaires. Estant arriué à S. Denis; il y eut force allees & venues. Ce pendant le Marechal alla en personne au parlement, ou il fait que le Cardinal a tousiours estudié le plus qu'il a peu d'auoir des beneficiers & amis, se plaindre que le Cardinal se venoit luy mesme precipiter, & comme on dit, brusler à la chandelle. Outreplus, il enuoya vn preuost sur le chemin, qui se mit en deuoir de prendre des premiers qu'il rencontra des gardes & harquebouziers du Cardinal, lequel non obstant tous ses aduertissemens, ayant entendu q̄ son frere d'Aumale, qui au parauant avec des troupes auoit tenu les champs, deuoir entrer par vne autre porte dans Paris, s'ar- chemina aussi avec les siennes, & arriua à Paris sur le soir, les rues estans semees de gens attendant sa venue. Mais le Marechal de Montmorency avec quelques Seigneurs & Gentils hommes de marque qui l'accompagnoyent; vint au deuant, & si tost qu'il apperceut armes à ceux qui accompagnoyent le Cardinal, commença à crier de loin qu'on eust à les mettre bas. Les vns s'enfuirent, & quelques coups furent tirez; dont l'un des Gentils-hommes du Marechal de Montmorency fut tué. Le Cardinal & son neveu le Duc de Guise eurent plus de peur que de mal, & mettans viftement pied à terre se sauuerent en vne maison prochaine, où l'on dit que le Cardinal estoit si resolu que ses chausses luy seruirent de bassin, & son pourpoint de selle persee.

*Entree  
du Car-  
dinal à  
Paris.*

Le Cardinal, plus couard qu'un lièvre, & les siens deslogerent sans trompette tost apres, se voyans ainsi reculez de leur entreprise. Le bruit estoit (& l'Amiral mesme, ayant esté mandé par le Sieur de Montmorency pour luy venir assister de conseil & d'aide, le dit aux principaux de Paris) que l'on auoit escrit vne lettre en Normandie, (elle procedoit de ceux de Guise) contenant ces mots, Que le meilleur moyen

que lon ait pour remettre en France ceux à qui la Couronne appartient de droit, pour en expulser ceste race de Valois, c'est de saccager les Huguenots qui les soustiennent: & que pour cest effet il faut vendre de leur bois, pour amasser argent & armes, & pour la fin estoit adiousté, que les Huguenots qui plaideront ne seront en peine de faire payer leurs despens. Outre cela lon sauoit de diuers endroits qu'il se faisoit cueillettes de deniers entre les Catholiques. Chascun peut penser à quelle fin. Pendât que l'Amiral estoit à Paris, le Duc d'Aumale assez affamé, & voulant amasser quelque escu, s'estoit retiré à Anet avec sa belle mere, où il auoit amené la garde qui luy est ordonnée pour le gouuernement de Bourgogne, & trembloit de peur q le Marechal de Montmorency (pource que c'est en son gouuernement, & que les gens de ladite garde faisoient plusieurs extorsions aux voisins) ne l'enuoyast prendre. Parquoy il escriuit par tout à ses amis, les priant de le venir secourir, & luy aider à sortir de là, pour se retirer en son gouuernement. A ce mandement, quelques vns vindrent, les autres n'en tindrent compte. Et de ceux qui y vindrent ne s'en trouua pas vingt qui demurerent, pource que la seule remonstrance d'un Gentil-homme de Normandie les ramena tous à leur bon sens. Car comment voulez vous (dit-il au Duc d'Aumale) que nous prenions les armes contre un Marechal de France, qui de sa seule parole les nous peut arracher & faire rôber des mains? Et s'il nous commandoit les tourner contre vous, que ferions-nous, si nous ne voulons estre rebelles & desobeissans au Roy? Mais la response que luy escriuoit un Gentil-homme du Maine, qui n'auoir peu venir à son mandement, & qui tomba en autres mains, est memorable par la liberré François de parler contre ceux qui se mesconnoissent: où l'on void, comment il faut iuger des vrais Princes. Les mots de ceste lettre sur ce point estoient tels: Je n'ay point dit aussi, Mon seigneur, que vous n'estes Prince, & que ie ne vous suis seruiteur. Mais i'ay bien peu dire, que ie ne sache homme en France qui vous reconnoisse pour Prince du sang ou de la Couronne: & en cela ie ne pense auoir failly, mais me tiendrais coupable de l'auouer, de tant mesmes que ie n'ay jamais ouy ny entendu que vous ny pas un des vostres l'ayez pretendu. Quant à seruiteur, pource que vostre courier m'a dit que vous me teniez pour ingrat, ie luy dy voirement que

*Lettres  
au Duc  
d'Au-  
male.*

que ie n'estois suiet q̄ du Roy, & ne deuois obeissance qu'à luy & à ses officiers chascun en leur endroit. l'adiousteray bien, que ie n'estois seruiteur que des Princes du sang, & ne deuois seruire à nul autre homme viuant, sinon de gayeté de cœur & autant qu'il me plairoit: & croy, Monseigneur, que vous ne le pretendez pas autrement de moy. Car vous sauez que i'ay despensé douze mil liures & plus de mon bien à suyure feu Monsieur vostre pere, Monsieur vostre frere & vous, sans que i'aye onques esté au gages de pas yn de vous, ou que i'en aye receu bien fait ou auantage. Je suis (graces à Dieu) Gentil homme, & en ay toute ma vie fait les actes sans fouruoyer: & puis franchement dire, sans faire tort à personne, que ie ne suis à autre qu'au Roy, à ses Princes, à mes amis, & à moy. Car pour le iourd'huy, ie n'ay point d'autre maistre qui me nourrisse & paye mes gages que moy-mesmes. Ce n'est pas que ie ne vous face seruire, & que d'honesteté ie ne vous sois seruiteur, pourueu que vous le pŕeniez comme d'vne franche volonté, & sans obligation que ie vous doyue. Car vous n'ignorez point qu'il y en a assez d'autres qui en voudroyent à mesme droit que vous, autant pretendre sur moy, ce que pour la vie, homme viuant ne me sera auouer par force: car ie serois tort à ceux ausquels seruire est deu, & à toute la Noblesse de France, laquelle m'en pourroit iustement faire reproche. Voila le langage d'vn vray Gentil homme François, qui n'a pas esté remarqué de tous ceux qui portent cetitre, comme il appartenoit.

Au demeurant, le Duc d'Aumale s'estant retiré de là comme il peut, s'en alla en Champagne, ou il commença à faire d'autres menées, pour entretenir tousiours l'eau trouble. Et le 25. iour de Feurier 1565, qui estoit six semaines apres l'entree du Cardinal à Paris, il escriuit vne lettre au Marquis d'Ellebeuf son frere, où l'esprit de ceux de Guise se mōstre, & le desir qu'ils ont tousiours eu de ne laisser jamais la France en repos. Or en ceste lettre, apres auoir fait mention de ce qui estoit auenu à Paris, & s'estre moqué du Roy & de la Royne, disant qu'ils donnent des plus belles paroles & promesses du mōde, & que c'est leur coustume, il adioust: Cependant mon frere, & durant ce temps que vous serez là où vous estes (asauoir en Toraine) ie suis bien d'auis q̄ vous voyez Monsieur de Montpensier, à qui i'escry la lettre

*Lettres  
de conspi-  
ration du  
duc d'Au-  
male.*



## LA LEGENDE DV

de creance sur vous, selon que me mandez. Et ne sauriez mieux faire, que de regarder avec luy & les Seigneurs nos bons amis de delà, de pratiquer vne bonne association, qui deust estre faite il y a long temps, si chascun de son costé y eût mis peine. I'en scay, qui l'ont mise en auant, & depuis quand ça esté au fait & au prendre, ils ont seigné du nez, comme aussi en beaucoup d'autres choses. Et si chascun de son costé y vouloit trauailler, nous en aurions bien tost vne bonne fin, avec les bonnes & belles occasions que nous en auons: mais à ceux à qui il touche comme à moy, n'en font pas le cōpte que ie desireroÿ bien. Il me fâcheoit biē fort qu'il ne tinst qu'à moy. Pour le moins feray ie conoistre le contraire, si Dieu me preste la vie. Et serois bien marry que la reputation que i'ay mis peine d'acquérir, en fust pour cela perdue, aussi i'espere que non. I'en ay cy deuant par plusieurs fois escrit à Messieurs de Montpensier, d'Estampes, Martigues & Chauigny: par où ils aurōt bien peu iuger la volonté que i'ay tousiours eue de nous venger, & cōbien ie desirerois l'association que vous dites: prenoyant assez, cōbien elle estoit necessaire, non seulement pour nous, mais aussi pour tous les gens de bien, à qui lon en veut plus q'iamais. Et pour ceste cause mon frere, ie trouuerois meueilleusement bon, que lesdits Seigneurs y voulussent entendre, laissant là les villes, d'autant qu'il n'y a aucune assurance au peuple (il entend parler de ceux de Paris, qui ne fauoriserent l'entreprise du Cardinal, quand ils le virent asfailly & comme de armé par le Mareschal de Montmorency) comme ie l'ay encores cognu dernièrement. Mais avec la Noblesse, ie suis tout resolu & prest de ma part, & n'y veux esparagner aucune chose, & le plustost sera le meilleur. Qui me fait vous prier d'y regarder, & en bien auiser tous par ensemble avec ledit Sieur de Montpensier, & de m'en mander ce qu'en aurez delibere, afin que par là ie resolu avec les Seigneurs & la Noblesse qui sont de deca & en mes gournemens, qui ferōt tout ce que ie voudray. Je ne veux oubli-er à vous dire qu'en faisant ceste lettre, i'ay veu la copie d'une lettre que Monsieur de Montpensier escrit au Mareschal (de Montmorency) pour response à celle qu'il luy auoit escrete de son beau fait. Je vous prie de l'en bien remercier de vostre part, & mesmes de la mienne: encor que ie le face par la lettre que ie luy escry. Nous en sommes bien re-



nous à luy. Au reste, si vous voyez M.<sup>r</sup> Euesque du Mans, vous ne sauriez que bien faire de luy parler aussi de ladite association, car il seroit aise avec ses amis d'y entendre, nous en auons parlé ensemble. Ce sera aussi bien fait que vous en escriuiez à M. de Martigues, & si vous vous pouuez voir, & en communiquer ensemble, il seroit encores meilleur. Je m'assure qu'il continue en la mesme bonne volonté qu'il nous a tousiours portée: aussi se peut-il bien tenir assuré de la nostre, comme vous luy pourrez mieux faire entendre, & que ie signeray tousiours avec lesdits Seigneurs, ce que vous aurez resolu tous par ensemble. Je vous enuoye ce cheuaucheur expres, afin que par luy i'entende bien amplement sur ce de vos nouvelles. Il demeurera près de vous, tant que vous aduiserez, & me reuiendra trouuer en Champagne. Du vingtquatriesme iour de Feurier mil cinq cens soixantecinq.

Sept mois au parauant lesdits de Guise auoyent pratiqué vne autre ligue en Guyenne, par le moyen du Sieur de Candales, du Marquis de Trans & autres, laquelle ayant esté descouuerte par auertissement donné à la Roynne mere, elle leur manda qu'ils n'eussent à passer outre. Neantmoins vn peu apres ils la voulurent remettre dessus, se sentans fortifiez de l'aueu des principaux du Royaume.

D'vn autre costé le Marquis d'Ellebeuf à la poursuite du Sieur d'Aumale, pratiqua sa ligue dans le gouuernement de Touraine, recueillant de toutes parts tous les volleurs & assassins publics du pais, qui sous sa conduite commettoient de iout en iour vn nombre infiny de brigadages & de massacres, tellement qu'il n'y auoit homme de bien que ces brigans ne trauaillassent, ny repos qu'ils ne troublassent.

Le Cardinal de Lorraine pratiquoit de son costé aussi en mesme temps, & s'efforça de mettre les Baronniez de l'Euesché de Metz en la sauue-garde de l'Empereur, si le Sieur de Salcede Gouverneur pour le Roy à Marsault n'eust empesché par force la publication de ceste sauuegarde. Le Cardinal s'escarmoucha là dessus, & fit vne guerre Cardinale, ou il fut aussi heureux qu'à son entree à Paris. Mais encores qu'en cela il se fust rendu ridicule & execrable tout ensemble, si en porta-il tousiours vne dent de laict à Salcede, & la luy arracha le iour de S. Barthelemy, le faisant massacrer à Paris, & piller sa maison entierement.

Prati-  
ques du  
Cardi-  
nal.

Maisce qui rendoit ceste pratique plus suspecte, c'est que elle fut executee par le conseil du Baron de Poluiller, Gouverneur de Haguenau, qui pour cest effect vint trouuer le Cardinal à Rembeuiller en Lorraine: & qui a sollicité la pluspart des entreprinſes faites sur l'Eſtat de France, durât & depuis les dernieres guerres de Picardie. C'est luy qui s'efforça de ſurprendre la ville de Lyon, & de faire reuolter les pays de Bresse & de Sauoye, par le cōſeil du Cardinal d'Arras, ſur la fin deſdites guerres. C'est ce Poluiller qui depuis pratiqua le Roy de Nauarre, pour le faire reuolter de la Religion, ſous eſperance de luy faire donner recompense du Royaume de Nauarre. C'est ce Poluiller qui depuis le premier edit de pacification oſa pratiquer (ſervant de ma quignon au Cardinal de Lor.) le Prince de Condé ſous quelques eſperances qu'ils luy donnoyent de luy faire tomber dedâs les mains les terres de l'Eueſché de Metz, s'il vouloit ſe declarer de la religiō Catholique Romaine. Les lecteurs peuuent penſer ce que lon pouuoit attendre du conſeil d'un tel homme ioint avec le Cardinal, lequel pendant ſon ſejour à Rembeuiller & en Lorraine, fit d'autres beaux actes, car il pillâ ſes ſuiets de l'Eueſché de Metz, ſous pretexte de retirer les terres engagees au Côte Iean de Naſſau: perſuada au Duc de Lorraine de maſſacrer tous ſes ſuiets de la Religion, s'il n'eust eſté retenu par le conſeil des Sieurs de Caſtelet & Baſſompierre, ſit bannir vn bon nombre des habitans du Pont-amouſſon, en haine de la Religion. Outre cela, il deſbaucha (aucuns diſent qu'il viola & print par force) la fille de Chambre de la Baillifue de Rembeuiller.

*Nonnel-  
les ruses  
pour atti-  
ver les  
roubles*

L'original des lettres du Duc d'Aumale à ſon frere le Marquis, dont nous auōs veu vn extrait en partie cy deſſus, fut preſenté au Roy, qui ayant ſur ce ouy la depoſition d'un des Cheualiers de ſon ordre, qui confeſſa auoir ſigné l'association, dont eſt parlé eſdites lettres, ſit expedier en ſon cōſeil priué l'acte ſuyuant, lequel nous auons icy inſeré, pour ſur iceluy conſiderer puis apres quelques notables traits de ruse Italocardinalique.

Auiourd'huy, dixhuitieſme de May 1565. le Roy eſtant au mont de Marſan, aſſiſté de la Royne ſa mere, & de Monſeigneur le Duc d'Orleans ſon frere a appellé & conuoqué les Princes de ſon ſang, gens de ſon conſeil priué, & autres Seigneurs & Cheualiers de ſon ordre, eſtans pres de ſa per-

ſonne

sonne, ausquels il a fait entendre estre aduertuy qu'en plusieurs endroits de son Royaume, se font associations, cueillettes de deniers, enrollemens d'hommes, amas & preparatifs d'armes & cheuaux: qu'aucuns s'oublent tant que d'enuoyer gens hors de son Royaume, & auoir intelligence & communication avec les Princes estrangers, sans son seuu, contre ses edits de pacification, de Maiorité, & autres ordonnances, declarations & prohibitiōs sur telles choses. Ce qu'il ne peut ny ne veut croire, pour l'estime qu'il a de l'affectiō & sincere volonté de tous ses suiets à l'obeissance de ses cōmandemens, bien de son seruice & repos de son Royaume, Neantmoins pour estre sur ce plus auant esclaircy de la verité, les admoneste & leur commande luy declairer ce qu'ils en ont entendu. Ce qu'ils ont fait. Et dauantage, supplient tres-humblement sa Maiesté croire qu'ils sont si esloignez de ces factiōs tant pernicieuses, qu'ils sont prests & disposez d'employer leurs vies & leurs biens, comme ils ont tousiours fait, pour le faire obeir, & pour l'entretènement de sedits edits & ordonnances, repos & tranquillité de sondit Royaume. Declairans sur leurs vies & honneurs, qu'ils n'ont aucune intelligence & communication avec ceux qui sont & auroient volonté de faire telles entreprises. Et quant à eux, ils ne scauent que c'est d'associations, ligues, sermens, promesses, escripts ny signatures baillees à ceste intention, & à toutes renoneent & n'y veulent auoir aucune participation, comme contraires à l'obeissance qu'ils doiuent à sadite Maiesté, & au repos de ce Royaume, qu'ils veulent de leur pouuoir maintenir & garder: & en cela ne cognoistre ny suyre autre intention que celle de sadite Maiesté, sans que pour quelcune particulière ny autre occasion, ils prennent ny facent prendre les armes, par qui que ce soit, sans son expres commandement. Et combien que leur loiauté & fidelité soit assez conuē de sadite Maiesté, & tant comme ils estiment qu'il n'en puisse desirer plus certaine preuue que de leurs effects si ont-ils bien voulu, satisfaisans à son commandement, signer ce présent acte de leurs seings. Et à ce que sous faux pretexte nul ne puisse de leur nom courir la mauuaise intention, & afin que les Princes de son sang & autres Princes & Gouverneurs, Cheualiers de l'ordre, Seigneurs & Capitaines absens, sachent & entendent le conuēu cy dessus, A voulu sadite Maiesté que ce pre-

ce present acte leur fust enuoyé, pour par leurs seings redre  
le mesme tesmoignage de l'intention bonne qu'ils ont en  
cest endroit, non moindre, comme il s'assure, que les des-  
suidits estans près sa personne, voulât eroire qu'ils n'en fe-  
roient aucune difficulté. Car il ne pourroit tenir ceux qui re-  
fuseront faire semblable declaracion par leurs seings, autres  
que coupables de telles entreprises, factions & intelligēces,  
dignes de sa male grace, comme cōtempteurs de son autho-  
rité & de ses edits, perturbateurs du repos public, & en ce  
faisant criminels de lese Maïesté. Et en ce cas tels les tient &  
declaire de sa present comme pour lors. Et semblablement  
tous ceux & celles qui sauroient aucune chose desdites as-  
sociations, factions & entreprises susdites, & qui n'en viē-  
dront auertir sadite Maïesté : comme il appartient à bons  
& loyaux suiets, lesquels aussi il entend & veut cōseruer &  
defendre de toutes ses forces, les prenant en sa protection  
contre tous ceux qui entreprendront de les offenser. Pour  
tesmoignage dequoy il a aussi voulu signer de sa propre  
main ce present acte, les an & iour que dessus.

Cest acte estoit vne poudie qu'on iettoit aux yeux de  
ceux de la Religion, pour les empescher de voir ce qu'on  
machinoit contr'eux. Et la Royné mere, suyuant l'inductiō  
& les memoires du Cardinal, faignoit estre ainsi mal con-  
sente de ceux de Guise, pour donner occasion aux grands de  
la Religion de s'approcher du piege peu à peu. Le Cardinal  
aussi & ses freres monstrerent semblāt que cest acte les tou-  
choit, mais secrettement ils poursuiuirent leur pointe, sa-  
chians bien à qui ils auoyent affaire. Et lors les lettres du car-  
chet, voloyent de toutes parts, tellement que de la vint que  
tout ce qui s'estoit executé en Touraine & au Maine, & en  
d'autres prouinces, au preiudice des edits contre ceux de la  
Religion fut authorisé par sous main, quelques remon-  
strances que le Prince de Condé, & autres en fissent. Quand  
done les Catholiques esmouuoient ciel & terre, metrans  
tout en confusion, vna acte en papier avec belles plases ap-  
pairoit & reigloit tout cela. Si ceux de la Religion se remu-  
oyent tant soit peu, pour respirer sous vne tyrannie si vio-  
lente, lors il n'estoit questiō que de feu & de sang, tesmoins  
les cruautez plus que Barbares & Turquesques commises  
contre les habitans de Pamiers, faussement accusez de sedi-  
tion, pour ne s'estre voulu laisser couper la gorge, qui tou-  
tesfoi

cesfois s'estoyent remis entre les mains du Sieur de Rambouillet à sa premiere parole, d'autant qu'il venoit de la part du Roy, & promettoit que rien ne leur seroit fait, que par l'ordre de iustice.

Cependant le Roy arriué à Bayonne, ou fut renouue la sainte ligue, contenant la resolution d'exterminer tous ceux de la Religion, sans aucune exception de degré, sexe, aage, ni lieu. On deuoit commencer en France, mais les apprests furent vn peu longs, car le Cardinal n'auoit pas encor acheué ses pratiques en diuers endroits avec les estrangers. Les associations dans le Royaume n'estoyent pas encor trop asseures. Le Prince de Condé, l'Amiral & autres grands de la Religion auertis de ce qui s'estoit passé à Bayonne, tant par le feu Prince de la Roche sur-yon que par autres moyens se tenoyent sur leurs gardes. Pourtant differra on quelque temps. Cependant suruindrent les troubles de Flandres, à l'occasion desquels on resolut par l'auis du Cardinal qui estoit tous les iours sommé de ses promesses par le Cardinal de Granuelle & par le Pape, & de iour à autre auerti par le Cardinal Granuelle, que sans plus attendre on se seruiroit du passage du Duc d'Albe, pour effectuer la coniuration. Diuerses despees furent enuoyees au Duc d'Albe. En ce mesme temps aussi, asauoit en l'an 1567. es mois de Iuillet, Aouût & Septembre lon tient plusieurs Conseils, tant à Marchais qu'à Monceaux, pour delibérer suyuant les memoires du Cardinal, des plus certains & derniers moyens qu'on tiendroit pour executer l'entreprise. En la derniere assemblee tenue à Marchais, par l'auis de ceux de Guise, fut arresté que le Roy se retireroit au bois de Vincennes, d'où il manderoit, sous quelque honneste couleur, le Prince de Condé & l'Amiral : auquel mandement s'ils obeyssoyent, ou l'un d'eux, on s'en feroit. Sinon qu'on auoit les six mil Suisses qui auoyent esté leuez, sous pretexte de s'en vouloir seruir, tant contre la Royned'Angleterre pour la defense de Calais, que pour les tenir sur les frontieres, attendans que le Duc d'Albe eust passé, de peur qu'il entreprinst quelque chose contre les pays du Roy. Qu'on auoit aussi vingdeux compagnies de gendarmerie, qui auoyent esté choisies & nommees pour faire monstre en armes, & auxquelles lon auoit baillé vn rendez-vous, par le moyen desquelles, & avec lesdits Suisses, on pourroit  
fac.



facilement surprendre & s'asseurer du Prince, & de l'Amiral, s'ils ne venoyent au mandement du Roy. Et cependant qu'il falloit rechercher avec toutes rigueurs ceux de la Religion sur les contrauentions à l'ediât de Roussillon, mesme-  
ment les Gentils-hommes, qui auoyent receu aux presches establis en leurs maisons autres que leurs suiets. Ce qui fut cause qu'on ordonna à l'instance & sollicitation du Cardinal de Lorraine, qui estoit peu de temps auparauant arriué à la Cour, qu'on tiendroît des grands iours à Poictiers, pour principalement vaquer aux proces de ceux qui seroyent trou-  
uez coupables desdites pretendues contrauentions, & ius-ques à les declairer criminels de lese Maiesté. Et pource que les Presidens & Conseillers de la Cour de Parlement de Pa-  
ris, qui auoyent esté nommez pour y aller, ne sembloient assez partiaux & fastieux au Cardinal, il en fit retrêcher sept de la liste qui en auoit esté faicte, au lieu desquels il en sub-  
rogea d'autres de ses creatures & de son humeur. Pour le pays de Normandie, on enuoya le maistre des requestes S. Martin, auquel fut expediee commissiõ à ceste fin, avec let-  
tres adressantes à la Cour de Parlement de Rouen, pour va-quer avec ledit de S. Martin au fait de sadite commissiõ, & de ne dessemparer la Cour, encores que ce fust au temps prochain des vacations.

D'un autre costé le Cardinal taschoit, par le moyen du Conestable, d'endormir l'Amiral & ses freres qui auoient eserit des lettres, ou ils descouuroyent les embusches qu'o-  
leur dressoit. Les six mil Suisses leuez pour l'executiõ, vien-  
nent sur ces entrefaites trouuer le Roy à Meaux enuironné de ceux de Guise: au moyen dequoy le Prince, & l'Amiral voyans qu'on leur en vouloit, & à tous ceux de la Religion, resolurent (auant que les choses se brouillassent dauantage) venir trouuer le Roy. Et pource qu'il estoit és mains de ses  
ennemis & des leurs, ils aduiserent de s'accõpagner de quel-ques Gentils-hommes signalez de leurs parens & amis, ius-  
ques au nombre de cent ou six vingts, & de porter quelques armes pour leur seureré. Ce que le Cardinal & ses ministres ne faillirēt de faire trouuer au Roy le plus mauuais du mō-  
de: & pour l'enuenimer du tout contre ceux de la Religion, luy firent croire qu'il estoit mort, s'il ne se retiroit vistemēt à Paris, attendu que le Prince de Condé & l'Amiral estoient accompagnez de quinze cens ou deux mil cheuaux, &



vouloyent attenter à sa Maieſté, & de la Royne & de Meſſieurs ſes freres, & entreprendre contre l'Eſtat. Ainſi donc le 28. de Septembre ſur les 4. heures apres minuit ils font deſloger le Roy, & le mettent au milieu des Suiſſes, eſtimans que ſi le Prince eſtoit ſi bien accompagné, comme ils diſoyent (ce qui toutesfois eſtoit faux, car lors qu'il ſe preſenta pour parler au Roy ſur le chemin d'entre Meaux & Paris, il eſtoit ſuiuy de trois eës cheuaux au plus, les choſes ſe pourroyent tellement eſchauffer, que tousiours quelques vns de leurs ennemis de part ou d'autre y demeureroient. Le Duc d'Aumale & quelques autres ſuyurent le Roy, qui arriua ſur les quatre heures apes midi à Paris, ou ceux de Guiſe luy mirent ceſte reſolution en teſte, de n'aimer iamais les Huguenots, comme il en fit vne grande proteſtation.

Le Cardinal, ſuyuant ſa couſtume, ne voulut ſuyure le Roy, ains ſaignit prendre ſon chemin vers Reims: mais ayant eſté rencontré par quelques ſiens ennemis, ſe ſauua de viſteſſe ſur vn cheual d'Eſpagne dās Chaſteauthierry. Lors la ſeconde guerre ciuile fut allumee en France, & nonobſtant les requeſtes preſentees par le Prince de Condé & les ſiens, pour remettre les choſes en paix, ceux de Guiſe & la Royne mere voulans ſe deſfaire des vns & des autres, firent donner vne bataille entre Paris & S. Denis, où le Conneſtable fut bleſſé à mort.

*Seconde  
guerre  
ciuile.*

Ceſte iournee apporta vn merueilleux contentement au Cardinal & aux ſiens, ſe voyans deſpeſchez du Conneſtable, & le chemin ouuert pour paracheuer leurs deſſeins. D'vn coſté ils vouloyent rendre le Roy ennemi iuré de ceux de la Religion, leſquels auoyent tant retardé de cours de la grandeur Guiſienne, & par luy ruiner leurs aduerſaires. Il ſaloit outreplus auoir quelque grand encor plus à commandement que le Roy, de l'autorité duquel ils ſe peuſſent ſeruir, pour executer leurs paſſions. Si toſt que le Conneſtable euſt rendu l'eſprit, ceux de Guiſe conſeillent la Royne mere de faire le Duc d'Aniou lieutenant general du Roy ſon frere. Elle voyant le bien qui luy en reuenoit, ſuyuit ce conſeil. Et la deſſus marcherent les troupes, eſtant le Duc d'Aniou entierement gouuerné par ceux de Guiſe, qui lors ſous ſon ombre, & depuis auſſi faiſoyent diuerſes deſpeſches pour ruiner premieremēt ceux de la Religion. Et ci apres nous verrōs les torts qu'ils ont faits audit Sieur Duc,

& com-

& comme ils se sont seruis de luy pour ruiner la France de plus en plus.

Second  
edit de pa  
cificatio.

Or d'autant que ceux de la Religion eurent incontinent secours d'Alemagne, le Cardinal apperceut qu'il falloit encor reculer pour mieux sauter. Partant lors que le camp du Prince de Condé estoit deuant Chartres en l'an 1568. il fait enuoyer par le Roy vers le Prince, gens pour faire la paix, c'est à dire pour desarmer ceux de la Religion, afin de les tuer plus aisément puis apres. Car il ne se peut nier que lesdits de la Religio<sup>n</sup> ne fussent lors les plus forts. Neantmoins sans y estre contrainsts par faute de forces ou d'heureux succez, ils se separerent & desarmerēt, ouurans les villes à ceux que le Cardinal & la Roynne mere y enuoyoyent de par le Roy, à la simple foy & parole duquel ils se remirēt de toute la seureté de leurs vies & biens, exposans leurs poictrines nues aux glaiues & cousteaux de leurs aduersaires. Les Seigneurs & Gentils-hommes de la Religion se retirerent chez eux : la où aucuns ne trouuans accez, les autres estans tres-mal receus, iusques à estre tuez & massacrez cruellement, quelques vns furent contrainsts de s'assembler ( ce que le Cardinal & les siens demandoyēt, tant pour auoir moyen de les calomnier, comme infracteurs des edits, que pour leur courir sus & les desfaire plus aisément ) & ne sachans que faire, ni ou se retirer, de prendre le chemin de Flandres, assez inconsiderément, puis que le Roy l'auoit defendu : mais y estans forcéz par vne extreme necessité qu'on dit n'auoir point de loy. Neantmoins la peine en fut si prompte & si rigoureuse, que le Cardinal & les siens s'en deuoyent bien contenter. Ils se seruirent pour l'execution du Marechal de Cossé, afin de charger tousiours la rage sur les vns & les autres. Puis firent enuoyer vn Gentil-homme vers le Prince de Condé, pour sauoir s'il auouoit vne telle leuee, en quoy lon peut remarquer vn autre artifice du Cardinal, pour entretenir le Roy en sa cholere, esloigner le Prince de la Cour, luy faire courir sus, ou à ces troupes si elles n'estoyent auouees de luy, & par ce moyen ruiner peu à peu ses ennemis. Quant aux estrangers venus au secours de ceux de la Religion, ils furent incontinent renuoyez, & grosses sommes de deniers empruntees par lesdits de la Religion pour fournir au payement. Mais par les mandemens de ceux de Guise, vne partie des deniers fut volce par la garnison,

nison d'Auxerre, aucuns les conducteurs tuez, les autres rançonnez, sans aucune iustice, car le Sieur de Prie gouuerneur d'Auxerre (où fut fait grand massacre) auoit le mot du Cardinal.

Nous remettrōs ici sommairement en auant ce que ceux de Guise pratiquerent depuis ceste paix seconde pour la rōpre bien tost & remettre le Royaume en nouueaux troubles, pour exterminer ceux de la Religion premierement, & par tel moyen auancer leurs affaires. En quoy nous reciterōns vne partie des plaintes qui deslors en furent publiées, reseruans aux lecteurs à se souuenir des particularitez qui auront esté ici obmises, car le nôtre en est si grand, qu'il est impossible qu'un homme seul s'en puisse souuenir. Le nerf dōc & la vraye seurte de ceste paix gisoit en ce que le Roy, ses freres & leur mere despoüillassent entierement toute la desfiance qu'ils pouuoient auoir de ceux de la Religion : à quoy eux pensoient auoir bien pourueu par vne telle & si prompte obeissance que de quitter incontinent les armes, renuoyer les forcez par le moyen desquelles ils pouuoient ranger ceux de Guise & autres ennemis, & rendre toutes les places qu'ils tenoyent pour leur seurte. Le Cardinal pour empescher vū tel bien, qui sans doute eust rompu tous ses desseins, ne fit autre chose qu'entretenir le Roy, & le Duc d'Aniou (quant à la Royne mere, elle menoit ses enfans, comme ceux de Guise vouloyent) en ces desfiances & inimitez mortelles contre ceux de la Religion, leur en faisant suruenir tous les iours de nouvelles occasions. Enquoy il s'aïda de deux vertus qui luy ont tousiours esté bien familières, a sauoir d'audace à controuuer toutes sortes de mensonges, ayant gens à point pour luy aider de ce costé là : puis d'assurance effrontee pour ne s'estonner point, apres que ses faussetez estoient descouuertes. Les pratiques par luy menées pour entretenir & ruiner la Noblesse tout ensemble, ses pilleries & exactions sur le Clergé, & les beaux pretextes dont il s'est couuert à ceste fin, seront declairez en leur endroit propre. Voyons les torts que luy & les siens continuèrent de faire au Roy & au Royaume en general, en quoy derechef nous reciterōns les plaintes veritables qui en ont esté publiées.

Tost apres la paix, de laquelle le Cardinal manda à sa mere qu'il empescheroit l'exécution il donna ordre par cer-

ains prescheurs à sa poste, que le peuple fust resolu que c'estoit conscience de tenir vne telle paix, non seulement, pource qu'elle estoit faite avec les heretiques & Atheistes, mais aussi pource que la necessité du temps l'auoit extorquée comme par force. De cela auint que plusieurs Catholiques ne firent conscience de despoiller toute naturelle affection, & les plus meschans se voyans la porte ouuerte à toutes pilleries & extorsions, se lascherent la bride à toutes sortes de violences & meschancetez les plus execrables du monde. A quoy la conuiuence des Iuges & Parlemens, suiets pour la pluspart à ceux de Guise, seruit beaucoup. Tellement qu'en trois ou quatre mois furent massacrez quelques personnes de tous estats, faisans profession de la Religion, dont nous laissons les particularitez à l'histoire de nostre temps. Mais il y a deux particularitez notables en cest endroit ci. Incontinent apres la paix, les Catholiques d'Amiens (entre autres) massacrerent six ou sept vingts personnes de la Religion, de toutes sexes, aages & qualitez. Or pour faire croire qu'on vouloit chastier vn si meschant & malheureux acte, on enuoya sur les lieux le Marechal de Cossé, lequel fit emprisonner les auteurs de ce massacre, qui furent tost apres relaschez & eslargis à l'instance & sollicitation du Cardinal, lequel en plain conseil dit qu'il falloit auoir pitié de ces pources prisonniers, qui auoyent esté induits à ce faire par vn zeile de Religion, & qu'il seroit le premier à demander leur grace: tellement que pour vne couleur & forme de justice on fit fouetter trois ou quatre coquins, ausquels on persuada de confesser qu'ils en estoient, & fit on executer en effigie ceux qui le deuoyent estre en personne, & qui estoient presens à l'execution de leurs effigies.

Sur la fin du mois de Iuin au mesme an 1558. René de Sauroye Sieur de Sipierre, ayant esté massacré en Prouence avec trentecinq Gentils-hommes & soldats de sa suite, suyuant le mandement qui en auoit esté enuoyé par ceux de Guise au Baron des Arts: quinze iours auant ce massacre, le Cardinal de Guise dit en grande compagnie, qu'il falloit desia conter le Sieur de Sipierre pour vn chef tué, & qu'on auroit ainsi les autres.

Par tels & infinis autres pareils actes ceux de la Religion au lieu d'estre receus en leurs maisons avec liberté de leurs consciences, suyuant l'edict, furent mesmes contrains de

les fuir, n'estans plus les villes, villes, mais tasnières de Tiz-  
gres & de Lions. En apres, les gouuerneurs, Parlemens &  
autres officiers, desquels le Cardinal dispoisoit à son appet-  
tit, & qui auoyent desia pour la pluspart, peu de volenté  
de faire publier la paix, & moins encores de l'entretenir, de  
peur de perdre le moyen de butiner à leur maniere accou-  
stumee, eurent leur excuse toute prestee alaanoir que les peu-  
ples estans ainsi irritez, il n'estoit question de passer outre  
de peur de tout gaster. Cependant le Roy mesme non seule-  
ment fut entretenu par mille fausses & impudentes calom-  
nies, en la desfiance desia conceue de ses suiets, qui est le  
plus grãd malheur qui sautoir auenir à vn Prince: mais aussi  
contre la generosite Royale fut intimidé & reduit iusques à  
ce point, qu'estant persuade qu'il ne luy estoit possible de  
se faire obeir qu'en ruinant vne pattie de ses suiets par l'aut-  
re, il ne fut difficile au Cardinal de tourner l'edict de paix  
en occasion de mille millions de troubles.

Outre cela, le Cardinal voyant que si ceux de la Religion  
estoyent du tout iettez aux champs, ils se pourroyent amas-  
ser & fortifier en plusieurs lieux, il y pourueut, comme s'en  
suint, voire iusques à oser escrire aux Prouinces, qu'on n'ad-  
ioutast point de foy aux lettres du Roy, si lon n'y voyoit  
certaines siennes enseignes. Premièrement, il fit publier l'e-  
dict peu à peu, tantost ici, tantost là, pour attirer les plus ne-  
cessiteux & les plus simples dans les villes: mais auet le mot  
du guet, de garder les portes en armes plus soigneusement  
mesmes que durant la guerre, de desarmer entierement ceux  
de la Religion, en y entrant de n'en laisser sortir pas vn de  
ceux qui seroyent entrez encores qu'ils se reuoltassent de la  
Religion. En tout cela, le Cardinal fut si bien obey, qu'il y  
eut peu de villes ou lon ne massacrast publiquement, outre  
toutes autres sortes de violences exercees, pour faire reuol-  
ter les plus fermes: ce qui ne pouuoit faillir d'auenir, ayant  
osté le glaue au Roy & à iustice, pour le mettre entre les  
mains de la populace, avec toute impunité. Et pour mieux  
s'asseurer que pas vn de la Religion n'eschapperoit, le Car-  
dinal donne à entendre au Roy qu'il ne seroit iamais en as-  
seurance contre les entreprises des Huguenors, si les villes  
qui auoyent esté tenues par eux, ou qui estoient voisines  
de leurs chefs, n'estoyent munies de bonnes & fortes gar-  
nisons. Ce qui fut aussi tost commandé que conseillé.

## LA LEGENDE DV

Et pour mieux faire encores, s'il y auoit quelque Capitaine renommé d'estre pillard ou cruel, aucun qui eust quelque mauuaise affection particuliere, vne compagnie desbordée à tous vices: voila ceux qui furent preferez, tant que on en peut trouuer, pour remplir les villes aussi tost qu'elles furent rendues, & tenir enuironnées les maisons du Prince de Condé, de l'Amiral, & autres Seigneurs que le Cardinal hayssoit & craignoit le plus. Et comme sur vn tel auis quelqu'un du priné conseil du Cardinal luy eust remonstré qu'il estoit à craindre qu'on ne descouurist par trop qu'on ne vouloit garder l'edict, & mesmes que les Catholiques se plainussent d'y estre foulez, estans si grands frais du tout insupportables au Roy: Vous ne sachiez que vous dites, respondit le Cardinal: Car quât au premier de ces deux points la response sera preste, que c'est pour entretenir les deux parties en paix, selon l'edict: & quant au second, estans les soldats logez chez les Huguenots, & iceux surchargez au centuple, quant aux confiscations, tout tombera sur leurs coffres: & quoy qu'il en soit, leurs confiscations rembourseront tout, voire mesmes payeront les debtes du Roy, apres toutes recompenses.

Le Cardinal non content de cela, pour empescher que les Seigneurs de la Religion ne vissent à la Cour, & pour pouuoir executer ses desseins plus seurement, persuada au Roy qu'il ne seroit en assurance de sa personne, sinon en se tenant comme enclos dedans Paris, pour vn temps, sans aucunement s'en escarter que peu à peu. Ce qu'ayant obtenu, pour mieux garder son prisonnier, il dressa ponts-leuis & gardes sur toutes les auenues & corps de gardes par toute la ville de Paris, comme au temps de la plus grande hostilité.

Ayant ainsi dressé ses filez, il bastit vn edict de par le Roy, pour attirer tous ceux de la Religion dans les villes, afin de les y faire mourir, ou demeurer prisonniers en leurs maisons, à la merci de toutes sortes de brigāds, iusques à l'heure assignee des vespres Siciliennes. Et afin qu'on iuge mieux de cela, nous auons couché ici ce bel edict, contenant ce que s'ensuit. Comme pour faire garder, entretenir, & inuiolablement obseruer entre nos suiets le contenu en nostre edict fait sur la pacification des derniers troubles auenus en ce Roy nostre Royaume, nous eussions ci deuant escrit & mādē

*dit du  
oy dres-  
sē par le  
Cardinal  
à quel  
fin.*



dé aux gouuerneuts de nos Prouinces nos vouloit & intention estre. Que les portes de nos villes fussent ouuertes, à ceux de nostdits suiets qui sont de la Religion reformee, & eux establis & receus en leurs maisons, avec iouissance de leurs biens, comme ils estoient auparauant lesdits troubles: laissant leurs armes à l'entree desdites villes, selon le reiglement que nous auons enuoyé à ceste fin, par tous les lieux & endroits de nostredit Royaume. Toutesfois nous auons esté depuis auertis que plusieurs de nos suiets de ladite Religion, prenans argument que lon ne les veut recevoir esdites villes, ou quand ils y sont entrez, n'y peuuent demeurer sans estre opprimez & trauaillez par ceux de dedans, tienēt les champs à grosses troupes & en armes, faisans vne infinité de maux & oppressions à nostre pource peuple, tellement qu'il seroit à craindre que cela ne fust cause de ietter nostredit Royaume en nouueaux troubles. A quoy desirās pouruoir selon qu'il est bien necessaire, nous auōs de nouueau dit & declairé, disons & declairons que nostre intention a tousiours esté & est, Que lesdits de la Religion pretenduē reformee, tant ceux qui auront porté les armes, que tous autres de la qualité portee par nostredit edict, soyent receus & rentrent chascun au lieu de sa demeure, ou nous voulons & entendons qu'ils soyent admis par les gouuerneurs de nos Prouinces & villes, Baillifs, Seneschaux, & autres nos iusticiers & officiers d'icelles, par lesquels ils serōt sommez de ce faire, avec toute la douceur qu'il sera possible, maintenus en plaine possession & iouissance de leursdits biens, & gardez de toute iniure & oppression: afin qu'en toute seureté & repos ils vinent avec nos autres suiets de la Religion Catholique, sous le benefice, & en ensuyuant nostre edict de pacification: les prenant en nostre protection & sauuegarde, & donnant en garde les vns aux autres. Et en cas de contrauention, voulons & nous plait les contreuenans estre punis selon la rigueur de nos edicts & ordonnances, de quelque Religion qu'ils soyent, & sans acception de personnes. Et où apres auoir esté ainsi sommez & appelez, il se trouueroit quelques ennemis du repos public, qui voulussent continuer à tenir les champs, fouler nostredit peuple, & se remettre ensemble en armes, pour recommencer nouueaux troubles: nous voulōs & entendons que par nostdits gouuerneurs de Prouinces & villes Baillifs, Seneschaux

## LA LEGENDE DV

& autres nos iusticiers & officiers, chascun endroit soy, & comme à luy appartiendra, soit faite assemblée de tel nôbre de gens de guerre, soit de nostre gendarmerie, gens de pied estans à nostre solde, ou habitâs des villes & villages, qu'ils verront estre expedient & necessaire, selon les auis qu'ils auront du nombre que seront leddits perturbateurs du repos public, pour leur courir sus, & par toutes les voyes qu'ils iugeront les plus expedientes, les rompre & tailler en pieces, de façon que la force & obeissance nous en demeurent. Car tel est nostre plaisir. Donné à Paris le 19. iour de May 1568. Charles. Robertet.

Il y a infinies captions & fraudes du Cardinal en cest edit, pour exterminer ceux de la Religion, tant es villes qu'es champs, comme les meurtres qui s'en ensuyrent, & vne autre pratique que nous verrons maintenant le verifient par trop, au grand interest de tout le Royaume, & ignominie perpetuelle du nom Royal.

*Autres  
raisons du  
Cardinal  
pour al-  
lumer la  
troiesme  
guerre  
civile.*

Chascun fait que l'aissance de tous pays gist principalement es cōmerces & trafiques, ce qui recommande la France par dessus tous les Royaumes du monde. Or fut il dit expressement en la pacification, que les villes seroyent incontinent remises en tel estat qu'au parauant les troubles, & les trafiques & commerces restablis. Le Cardinal ne pouuant supporter cela, & voulant qu'il y eust bien tost en Frâce autant de brigandages dressez, voire aux despens du Roy & de son poutre peuple, qu'il y a de ponts & de passages de riuieres: briefasin qu'il n'y eust trafique, lettres & bourses, q̄ treize garnemens ne visitassent de lieue en lieue, pour en faire rapport au Cardinal, il fant considerer l'ordre qu'il y mit, sous ombre d'empescher (disoit-il) que ceux de la nouvelle Religion ne s'assemblassent pour machiner contre le Roy. Cōme de fait son but tēdoit bien là aussi en partie, & à quelques desseins plus hauts, si les entreprises dressees à l'encōtre du Prince de Condé, de l'Amiral & autres Seigneurs de la Religion eussent bien succedé lors. Mais la commission qu'il fit despescher lors, mōstre mieux cōbien de tort il faisoit au Roy & au Royaume, & le grand desir qu'il auoit de rebrouiller tout pour agrandir sa maison de la ruine de ses ennemis. Telle est la teneur de ceste cōmission faite en mesme tēps par l'edit sus inseré, asauoir au mois de May 1568. Le Capitaine N. est cōmis par le Roy en la ville de N. pour demeu-

demeurer Capitaine & garde du pont & passage: auquel sera baillé douze hommes pour estre pres de sa personne, pour leur cōmander ce qu'il verra estre à propos, & à faire pour le seruice du Roy. Lesquels douze hōmes sa Maieité payera, outre & par dessus l'entretienement qu'elle luy dōnera. Il donnera ordre en premier lieu de faire vn pont leuis au passage, lequel sera gardé de iour & de nuict bien soigneusement & diligemment par luy & ses douze hommes: & ne laissera passer aucun, qu'il ne sache d'où il vient, quelle part il va, pour quel afaire, & qui il est. Et s'il void qu'il se presente nombre de gens au passage dudit pont, le fera soudain leuer, & ne leur permettra le passage qu'il n'ait pourueu à la seurété d'iceluy, & qu'il ne sache bien qu'ils n'ayent aucun moyen de nuire. Et afin que luy & les douze hōmes estans avec luy puissent demeurer continuellement à la garde du pont, avec la cōmodité requise, donnera ordre de faire faire incontinent vne loge couuertē pres & ioignant ledit pont: en laquelle luy & ses soldats se pourront retirer, loger & accommoder, sans s'esloigner dudit pont, ny abandonner la garde d'iceluy: & pour cest effect, sa Maieité a escript aux habitans de ladite ville de faire faire, à leurs despens, ladite loge & pont leuis. Et d'autant qu'il peut grandement seconuer audit Capitaine pour plus seurement garder ce pont, & pouruoir à ce qu'il ne s'y puisse faire aucune surprise, de sauoir ce qui se fera tant audit lieu qu'es environs, il mettra peine de descouurir le plus auant qu'il pourra des actions & desseins de ceux de la nouuelle Religion. Et s'il apprend quelque chose qui soit preiudiciable au seruice du Roy, se tiendra sur ses gardes, & en aduertira le Capitaine cōmis à la garde du pont & passage de la plus prochaine ville: & sera fait le semblable par tous les autres Capitaines, cōmis à la garde des ponts & passages, iusques à ce que le Roy en soit aduerty pour y pouruoir. Et encores que la principale occasion, pour laquelle le Roy veut que ce Capitaine demeure au lieu dessusdit, soit pour la garde du pont & passage: Il ne laissera de sa part à prendre diligemment garde que par ceux de la Religion nouuelle ne se face aucun presche ou exercice de ladite Religion en autre lieu qu'en ceux qui sont ordonnez & establis par sa Maieité, tant par le contenu d'iceux edits de pacification, que par le reglement qui en a esté fait, depuis la publication du dernier edit. Aura l'œil ouuert,

menent à s'asseurer: & mesmes aucuns se viennent à brul-  
ler à la chandelle: & encores on a en outre bonne esperâce,  
qu'il y en ad'autres qui feront le mesme, lesquels on fait  
desia estre esbranlez. Ce qui fera indubitablement emporter  
bien tost gain de cause, & nous donnera pleine victoire,  
sans grande peine & resistance contre les ennemis de nostre  
foy. Voila les desseins du Cardinal, lesquels avec plusieurs  
autres pratiques que nous toucherons en autres endroits  
propres, attiserent le feu des troisiemes guerres ciuiles plus  
longues & furieuses que les autres.

Le Prince de Condé sur la fin de ce mesme mois se sauua  
en grand haste de Noyers en Bourgongne, où il deuoit estre:  
enclos deux iours apres, & arriua à la Rochelle, contre la-  
quelle le Cardinal auoit dressé beaucoup de pratiques, mais  
il se rompit la teste en vain. Lors la guerre fut ouuerte. Et  
comme les preparatifs se dressoyent pour faire marcher l'ar-  
mee Catholique, sous la conduite du Duc d'Aniou, le Car-  
dinal fit dresser deux edits, publiez en vn mesme iour au  
Parlement de Paris, le 28. de Septembre, asauoir trois iours  
apres qu'ils eurent esté bastis au Conseil. Au premier, le  
Roy ayât fait vn long narré des choses auenues en son Roy-  
aume pour le fait de la Religion, declairoit entre autres cho-  
ses, que l'edit de Ianuier par lequel il donnoit permission à  
ceux de la Religion d'en faire l'exercice, n'estoit que proui-  
sionnel en attendant sa Maiorité, & qu'il n'estoit plus deli-  
beré de faire obseruer les edits touchant le fait de la Religio.  
A ces causes parueniu audit aage de Maiorité, defédoit tout  
exercice d'icelle es pais de son obeissance, voulant irreuoca-  
blement qu'il n'y eust autre exercice de Religion que de la  
Romaine, sur peine de confiscation de corps & de biens. Et  
sur les mesmes peines, commandoit à tous Ministres de la-  
dire Religion de vuider le Royaume dans quinze iours: de-  
fendant neantmoins que ceux de la Religion ne fussent au-  
cunement recherchez en leurs consciences, pourueu qu'ils  
voulussent viure paisiblement en leur maisons. Par l'autre,  
il declairoit que de là en auant il n'entendoit se seruir d'au-  
cuns officiers faisans telle profession, les suspendant deslors  
de leurs estats & charges: leur commandât de s'en aller des-  
faisir entre ses mains, dans quinze iours, autrement que par  
luy il y seroit pourueu. Il y auoit long temps que ces edits  
estoyent sur le bureau, & le Cardinal les monstroit de loin

aux Catholiques, pour les faire venir à l'offrande, & sonner deniers pour la solde de l'armée, en quoy luy, la Roïne mere & se mignons iouèrent leurs ieux accoustumez. Mais ces edits nuisirent plus aux Catholiques qu'ils ne croyoyent, car la pluspart de ceux de la Religion qui n'eussent bougé de leurs maisons, voyans ce periure tout manifeste, duquel le Cardinal diffamoit la race des Valois, se ietterent incontinent en campagne. Les Seigneurs de la Religion enuoyèrent ces edits en Angleterre & Alemaigne, pour certaine preuue, qu'on ne les poursuuyoit, comme seditieux ny affectans la Couronne, (comme ils vouloyent faire croire) ains comme zelateurs à la Religion que les Catholiques vouloyent extirper de France. C'est ce que le Cardinal & les siens gaignerent. En ce temps furent publiez diuers escripts contre l'audace & ambitieuse cruauté de ceux de Guise, spécialement du Cardinal, le naturel duquel fut descript par vn docte Poëte François, avec vne imprecation à la fin, Et pource que le sonnet qu'il en fit est gentil, & non imprimé (que ie sache) ie l'ay voulu icy presenter au Lecteur.

## SONNET.

*De fer, de feu, de sang, Mars, Vulcan, Tisyphone,  
 Bastit, forgea, remplit, l'ame, le cœur, la main  
 Du meurtrier, embraseur, du tyran inhumain  
 Qui tue, brusle, perd la Françoisse Couronne.  
 D'un Scythe, d'un Cyclope, & d'un fier Lestrygone,  
 La cruauté, l'ardeur, & la sanglante faim,  
 Qui l'anime, l'eschauffe, & conduit son dessein,  
 Rien que fer, rien que feu, rien que sang ne reforme.  
 Puisse-il par le fer cruellement mourir,  
 Ou par le feu du ciel horriblement perir,  
 Et voir du sang des siens la terre estre arrousee;  
 Et soit rouillé, estaint, & seché par la paix,  
 Le fer, le feu, le sang, cruel, ardent, espais,  
 Qui tue, ard & rongit la France dissipée.*

Ceste troisieme guerre ciuile commençât au mois d'Octobre mil cinq cens soixante huit, dura iusques au commencement d'Aoust 1570. L'histoire en a esté escripte bien au long & publice, où il appert que les Catholiques & ceux de la Religion ont esté ruinez les vns par les autres, soit qu'on considere les batailles donnees, places assiegees ou prinse

chefs,

qu'il adressera à Monsieur son frere & Lieutenant general qui luy fera response. Et pourra aussi ledit Capitaine faire entendre au Roy & à mondit Sieur tout ce qu'il pourra apprendre, enuoyant ses lettres à celuy qui sera commis à la garde du prochain passage, lequel les fera tenir de main en main, par les autres Capitaines qui auront semblables charges, à sa Maiesté, ou à mondit Seigneur.

Tout homme qui aura tant soit peu de iugement peut remarquer en ceste cōmission de merueilleux artifices du Cardinal, & nouueaux apprests pour la guerre, par le moyen de laquelle il s'auançoit. Aussi par tels moyens la troisieme guerre ciuile fut tost allumee, car en moins de deux mois apres la paix, plus de dix mil personnes furent tuées çà & là. Cependant le Cardinal se vantoit qu'il en feroit plus mourir entre deux treteaux que le Roy avec toutes ses armées: & mandoit ordinairement à Rome & en diuers autres endroits qu'o auoit plus despesché de Huguenots en vn iour depuis ceste paix, qu'en vn mois durant la guerre.

Outre tout ce que dessus, le Cardinal craignant que les Catholiques ne se mutinassent pas assez, fit faire des confrairies, ligues & associations, à quoy plusieurs des Parlemens & de la Noblesse tindrent la main, faisans fond de deniers, prestans serment, entroollans soldats, & faisans autres cas semblables pour l'entretienement des confrairies, qu'ils appelloient du S. Esprit. Notamment en la ville de Dijon par les menées du Sieur de Tauānes, & d'un nommé Begad conseiller au Parlement fut faite vne telle Ligue. Et comme aucuns des assistans demandassent si le Roy les autoriseroit, fut respondu par Begad, qu'il auoit lettres de sa Maiesté à ceste fin, lesquelles Tauānes auoit mises es mains d'un sien secretaire qui ne se peut lors trouuer. Et que si le Roy n'auoit agreable, il ne falloit pour cela rien craindre, pource qu'il sauoit bien oï s'adresser ailleurs. Qu'au surplus il ne se falloit arrester aux lettres que le Roy escriuoit ordinaires-ment à Tauannes & à la Cour de Parlemēt pour l'observation de l'edit, d'autant qu'il y auoit vn iargon entr'eux que tout le mōde n'entendoit pas. En plusieurs autres de Bourgogne & des autres Prouinces furent faits semblables.

Cependant l'exercice de Religion est defendu es hauts & bas pays d'Auuergne, & es pays appartenans aux freres du Roy, & a quelques Princes du sang. Les autres Prouinces



chefs & soldats tuez : tellement que les François ont fait contre eux-mesmes, ce que (peut estre) tous les autres peuples de l'Europe amassez ensemble n'eussent sceu executer. Cependant le Cardinal regardoit iouer ceste sanglante tragœdie, desployant tous ses moyens pour ruiner les vns par les autres. Et d'autant que ce seroit vn labeur infiny de descrire le tout, ce nous sera assez de remarquer icy quelques vns de ses artifices pendant ceste troisieme guerre.

Premierement, il s'assura de la personne du Roy, qu'il menoit çà & là, selon les occurrences des affaires, & pourvoir que rien ne se fist que par son auis. Il seruoit aussi de boutefeu pour enflammer le Roy de plus en plus à l'encontre de ceux de la Religion, specialement des principaux, contre lesquels on desploya toutes violences & trahisons pour en venir à bout. Les vns après auoir esté prins prisonniers furent tuez, nonobstant qu'on leur eust promis la foy, les autres furent empoisonnez, contre les autres furent apostez des meurtriers, ausquels mesmes, le Cardinal fit donner de grandes récompenses.

En apres il donna ordre d'auoir force seruiteurs au près du Duc d'Aniou Lieutenant general du Roy, afin de l'envenimer contre lesdits de la Religion. Ce qui fut de si pernicieuse consequence au Prince de Condé qu'il fut tué par Montesquiou Capitaine des gardes dudit Duc d'Aniou, estant entre les mains des Sieurs d'Argence & de S. Jean qui l'auoyent prins prisonnier. La mesme ruse fit que ce Duc ne voulut donner sauf-conduir au Sieur de l'Estrange député de la part des Princes & Seigneurs de la Religion au mois de Iuin 1569 pour aller presenter leur requeste au Roy, sur les moyens & remedes qu'ils conoissoyent estre plus propres & conuenables pour faire cesser la guerre & establir vne bonne paix.

De mesme ruse se seruit le Cardinal pour empescher que la paix ne s'auançast : car estant auertty que l'Amiral auoit enuoyé au Marechal de Montmorency son cousin ceste requeste, pour la presenter au Roy, il preuint, disant au Roy, que ce n'estoit nullement raison que les suiets ainsi rebelles parlassent de loin, & s'ils ne venoyent se presenter à sa mercy, il ne les faloit escouter, mais en auoir le bout par les armes. Snyuant cela, le Roy dit au Marechal de Montmorency, qu'il ne vouloit rien voir ny ouir de ceux de la Religion,

## LA LEGENDE DV

gion, spécialement de l'Amiral, que premierement il ne se fust remis en bonne grace, à quoy il seroit receu se mettant en son deuoir. Comme si l'Amiral & les siens n'eussent au parauant supplié instamment le Roy, comme ils faisoient encores par ceste remonstrance, où ces mots estoient contenus: Ils supplient tres-humblement vostre Maiesté de vouloir ottroyer & accorder generallyment à tous vos sujets, de quelque qualité & condition qu'ils soyent, libre exercice, de la Religion, en toutes les villes, villages & bourgades, & en tous autres lieux & endroits de vostre Royaume & pays de vostre obeissance & protection, sans aucune exception, modification ou restriction de personnes, de temps ou de lieux, avec les seuretez necessaires & requises: & outre, ordonner & enioindre de faire profession manifeste de l'une ou l'autre Religio, afin de couper chemin à plusieurs, lesquels abusans de ce benefice & grace, sont tombez en Atheisme & en liberte charnelle, s'estans licenciez de tout exercice & profession de Religion, & ne desirans rien plus que de voir vne confusion en ce Royaume, & tout ordre, police & discipline Ecclesiastique renuersee & abolie: chose trop dangereuse & pernicieuse, & qui ne se doit aucunement tolerer. Et d'autant Sire, que lesdits Sieurs Princes, & les Seigneurs, Cheualiers, Gentils-hommes & autres qui les accompagnent, ne doutent point que ceux qui ont tousiours iusq's à maintenant assis le fondement de leurs desseins sur les calomnies qu'ils publient impudemment pour les redre odieux, mesmes vers ceux qui (par la grace de Dieu) sont affranchis de la seruitude & tyrannie de l'Antechrist, ne faudront de mettre en auant qu'ils veulent plustost opiniaistrement defendre, sans raison, ce qu'ils ont vne fois resolu croire touchant les articles de la Religion Chrestienne, que de se corriger & retracter, lesdits Sieurs Princes, & les Seigneurs, Cheualiers, Gentils-hommes & autres qui les accompagnent, declairent & protestent, cōme ils ont tousiours fait, q si en quelque point de la Confession de foy cy deuant presentee à vostre Maiesté par les Eglises reformees de vostre Royaume, on les peut enseigner par la parole de Dieu, cōprinse és Liures Canoniques de l'Eseriture sainte, qu'ils se soyent eslongnez de la doctrine des Prophetes & Apostres, que promptement ils donneront les mains, & cederont tres-volontiers à ceux qui les instruiront mieux par la parole de Dieu.

Dieu, qu'ils n'auroyent esté dès le commencement, s'ils eurent en quelque article. Et pour cest effect, ne desirerent rien tant que la conuocation d'un Concile libre, general, & legitimement conuocé, auquel vn chascun pourra estre ouy, pour deduire ses raisons, lesquelles seront consermees ou conuaincues par la seule parole de Dieu, qui est le moyen vltre de toute ancienneté en pareille occasion.

Cependant le Cardinal esleuoit le Duc d'Aniou aux despens du Clergé & des Catholiques, pour ruiner ceux de la Religion, & auoir nouuelle corde à son arc pour tirer d'autres coups, si la guerre auoit tels succès qu'il pretendoit. Car quant à la paix, la trouuoit & faisoit impossible & hors d'esperance d'estre contractee que par la ruine & total aneantissement de ses parties aduerses. Or a il tousiours finement dissimulé son intereât particulier, & pour faire que le Roy trouuaſt aussi de sa part la paix impossible, & que par cōsequent il hazardast tout auant que d'en venir là, il proposoit deux empeschemens. Le premier emprunté de la diuersité de la Religion, qui ne peut (disoit-il) ni ne doit estre toleree en ce Royaume. L'autre, est composé du nom de la Maieſté du Roy qu'il disoit auoir esté bleſſee par ceux de la Religio, & qu'il n'estoit possible de guerir vne telle playe, sinō qu'eux posans les armes se vinſſent rendre la corde au col, à la misericorde du Roy, seāt au liēt de la iuſſice du Cardinal. Mais il s'aidoit de ces raisons (ausquelles ceux de la Religion ont infinies fois respondu suffisamment) non tant pour zele à la religio, de laquelle sera parlé aux liures ſuyuans, ni pour affection qu'il portast au Roy, contre qui il conſpiroit, que pource qu'auant que de cōdescendre à aucune ouuerture de paix, il vouloit estre asſeuré qu'en tout euenemēt luy & les ſiēs demeureroient au ſmier lieu du cōſeil du Roy & du Royaume, qu'il pourroit deſtituer, & inſtituer les officiers de la courōne à ſa diſcretio, qu'il ordōneroit & diſpoſeroit de la Iuſſice & des fināces, ſelō ſa cōuoiſiſe: brief q̄ le Royaume prédroit de lui les loix du faire & nō faire, du taire & du pler & qu'e vn mot il remueroit ſelō ſon bō plaisir, les ames, les corps & les biēs, du chef & des mēbres d'iceluy Royaume.

Aussi craignoit-il que ſi le Roy laiſſoit approcher de ſes oreilles les remōſtrāces, ou les deputez de ceux de la Religion, avec le temps il n'apperceust aiſement q̄ les Conſeillers qui luy ont fait entendre que la guerre estoit le ſeul moyen d'oſter

## LA LEGENDE DV

d'oster du Royaume la diuersité de Religion, estoient Atheistes ou gēs esceruellez & ignorans iusques au bout. Que le Roy se pourroit souuenir que depuis le retour du Cardinal du Concile de Trente, le corps du Conseil priué auoit esté diuisé & bandé en deux diuerses opinions, les vns ne conseillans que la paix, & les autres la guerre: & que par conséquent le Cardinal & ceux de sa maison pourroyent estre mal traitez. Partant il se resout avec les siens de faire durer la guerre rāt que possible sera, pour corrompre & façonner le Roy à son humeur & ruiner ceux de la Religion, afin d'auoir vn chemin plus aisé aux entreprises secrettes. Il se persuadoit d'auoir à la longue lesdits de la Religion. Premièrement, pource qu'estans chassez de la pluspart des villes du Royaume & reduits aux extremitez d'iceluy en vn petit anglet de Saintonge, seroyent aisément enfermez dedans ce recoin de pays, par le moyen des riuieres & villes qui sont sur les marches d'Angoumois & lieux d'alentour: & qu'estans vne fois rangez en telles barrières, la famine & la contagion de l'air, suscitée par l'infection de leurs troupes, les contraindroit dedans peu de mois de se rendre la corde au col, à sa discretion & misericorde. En apres, que la principale force du camp des Princes cōsistant en estrangers, pour lesquels payer des arterages seulement qui leur estoient deux iusques alors, ceux de la Religion s'estoyent presque espuisez, & auoyent peu de moyens de les payer à l'auenir: d'amis on les pourroit rendre ennemis, & seroit aisé de les pratiquer, sinon à combattre lesdits de la Religion, pour le moins à se retirer en leur pays, moyennant le remboursement de leur deu. Finalement, le Cardinal fondonoit le prolongement de la guerre sur l'incertitude de l'euenement des batailles, à cause des inconueniens de son particulier. Tous ceux qui entendoient que toute la Noblesse & plus belliqueuse partie du peuple François estoit lors en campagne fort à point, pour s'entremettre, si vne bataille se donoit, fremissoient d'horreur & deploroient la miserable condition du Roy & du Royaume, panchans à leur ruine par l'euenement d'vne telle rencōtre à quelque party que demeurast la victoire. Le Cardinal & les siens cependant auoyent si peu d'esgard à cela qu'ils eussent bien voulu que l'vne des parties gisant par terre eust laissé l'autre tellement nauree que iamais elle ne se sust peu releuer: non pas pour espe-

rance

rance de creer vne nouuelle Noblesse Françoisse, avec vne feuille de papier, ou vne peau de parchemin & quatre onces de cire (suyuant l'apophtegme du Cardinal que le Roy pouuoit faire plus de Gentils-hommes en vne heure, qu'il n'en sauroit mourir au combat en dixans) mais plustost d'autant que la Noblesse Françoisse estant estainte il seroit plus aisé de paracheuer les proiects Guysiens, & (avec la faueur des Maires, Escheuins, & Conseillers de la plusspart des villes du Royaume affectionnez de longue main au Cardinal, aussi bien q̄ les Cours de Parlement, sous couleur de maintenir l'eglise Catholique) vendiquer le droit de la Couronne, qu'ils se sont vantez de si lōg temps appartenir à la maison de Lorraine, en vertu d'une succession imaginaire de l'estoc de Charles le Grand. Mais le Cardinal craignant que la bataille ne vinst à se desmesler, plustost par vn effroy & route de l'une des armées, que par grande effusion de sang, il aima mieux s'assurer en la longueur du temps que bastir son esperance, sur ce fondement mouuant & hazardeux. Car si la victoire eust fauorisé ceux de la Religion, ceux de Guise estoient perdus, ce leur sembloit. Si elle demeueroit à l'armée du Cardinal, encores preuoyoit-il que la cholere eust refroidie, quelques Catholiques luy pourroyent attacher vne querelle aussi difficile que ceste là, & redemander la vie des Seigneurs & Gentils-hommes immolez sur l'autel de son ambition. Car tous ceux qui portoyent les armes sous le Duc d'Aniou, n'estoyent pas si deuots au seruice de ceux de Guise, qu'eux eussent bien voulu.

Ainsi, le Cardinal fila ceste corde de guerres ciuiles le plus long qu'il peut, encorés qu'en ses considerations, y eust de grandes inconsiderations, lesquelles ie ne veux descouurir ni refuter, cela appartenant à quelqu'un qui auroit le loisir de dresser des discours politiques, & monstrier l'aucuglement des Gentils-hommes François Catholiques, qui pour faire profession d'estre gens d'entreprise & d'execution, se sont laissez beffler à routes restes par vn prestre, plus couard qu'une femme, & qui sous son chapeau & parmi ses familiers se moquoit d'eux à bouche ouuerte, comme nous le verrons en son endroit ci apres.

Le Duc d'Aumale estoit sur les frōtieres de Bourgongne & de Lorraine avec grosses troupes, auxquelles il commandoit, pour empescher l'entree des Reistres qui venoyent au secours

secours de ceux de la Religion. En quoy il fut aussi heureux qu'en ses autres exploits de guerre, ses soldats disans tout haut & bien souuent que leur General auoit plus de chair que d'esprit. Et de fait, encor qu'il fust en pays propre pour l'infanterie qui l'accompagnoit en grand nombre, & de gens aguerris, si ne fit-il chose qui valust, & fut en danger d'estre battu plusieurs fois, ayant mesmes refuse de choquer ses ennemis à son auantage. Mais le Cardinal fut aussi cause en partie de ceste procedure, car il ne vouloit pas qu'on vinst si tost aux mains, esperant ou gaigner les estrangers, ou les auoir mieux à l'auantage, & en somme voulant brouiller les cartes de plus en plus, pour rencontrer meilleur ieu.

Quant au ieune Duc de Guise, pour estre fort fauorisé du Duc d'Aniou, avec qui il auoit fort estroite accointance, il fut auancé en ces guerres, ioint qu'il estoit grand maistre. Lors son oncle le Cardinal l'enuironna de plusieurs Capitaines qui luy seruirent bien à Poitiers specialement. Le Marquis du Maine son frere estoit peu de chose alors, pour sa ieunesse. Le grand Prieur & le Marquis d'Ellebeuf freres, estoient morts quelques annees auparauant, sans qu'on se soit beaucoup soucie d'eux, comme aussi ils auoyent eu auant d'esprit seulement que le Cardinal de Lorraine leur frere leur en auoit distribué, & n'estoyent factieux que par ses instructions & commandemens.

Mais à l'auanture auons nous assez estendu le propos en ceste premiere partie de la Legende de messieurs de Guise. Partât nous laisserons reprendre haleine aux lecteurs, & quelque loisir à nostre plume pour poursuyure le reste, asauoir des deportemens du Cardinal & des siens, au troisieme edict de pacification, & des moyens tenus par eux pour venir à la iournee de S. Barthelemy: & des choses qui sont depuis auenues de leur part, à la confusion du Roy Charles & de son estat. Item des meschans tours qu'ils ont iouéz au Roy Henry troisieme à present regnant, à tous les Princes du sang, aux grands Seigneurs, à la Noblesse, à la Iustice, au Clergé, au peuple tant de l'une que de l'autre Religion, à leurs fauoris & amis, voire à eux-mesmes entre eux. Cy deuant nous auons veu vne partie de leurs façons de faire sous François premier, Henry second, François troisieme & Charles neuuiesme: mais les particularitez diuerfes qui seront marquées es autres liures suyuaंस descouuriront qu'en